

ಆಖೀರಿ ತೀರ್ಮಾನ

ಶ್ರೀಮತಿ ಬಲ್ಯಮಾಡ ದೇವಕ್ಕಿ ಗಣಪತಿ



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ, ಮಡಿಕೇರಿ

ಪ್ರಕಟಣೆ ಸಮಿತಿ

ಅಧ್ಯಕ್ಷ

ಶ್ರೀ ಚರಿಯಪಂಡ ಎಂ. ರಾಜಾ ನಂಜಪ್ಪ,

ರಿಜಿಸ್ಟ್ರಾರ್

ಶ್ರೀ ಕೆ. ದಾಮೋದರ,

ಶ್ರೀಮತಿ ಉಳ್ಳಿಯಡ ಡಾಟಿ ಪೂವಯ್ಯ

ಶ್ರೀಮತಿ ತಾತಂಡ ಪ್ರಭಾ ನಾಣಯ್ಯ

ಶ್ರೀ ಚಕ್ಕೇರ ಎ. ತ್ಯಾಗರಾಜ್

ಶ್ರೀ ಐತಿಚಂಡ ರಮೇಶ್ ಉತ್ತಪ್ಪ

ಶ್ರೀ ಅಮ್ಮಣಂಡ ಎಂ. ಅಣ್ಣಯ್ಯ

BVP-1058-9/1/17

(5) 1001 - 37/87

ಆಷ್ಠರಿ ತ್ರಿಪೂರ್ಣ

ಶ್ರೀಮತಿ ಬಲ್ಯಮಾಡ ದೇವಕ್ಕಿ ಗಣಪತಿ



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,
ಮಡಿಕೇರಿ

'AAKIRI THEERMANA' - A Novel written by
Balyamada Devakki Ganapathy, Published by the
Karnataka Kodava Sahithya Academy, Madikeri During
April-2004.

- ಕ್ರಯ - ಉರ್‌ಪಿಯ - 20/-
- ಹಕ್ಕು - ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,
ಮಡಿಕೇರಿ
- ಬೊಳಿಪಡ್‌ತನವು - ರಿಜಿಸ್ಟ್ರಾರ್
ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ
ಸ್ಕಾಟ್ ಭವನ
ಜಿಲ್ಲಾ ಕ್ರೀಡಾಂಗಣ,
ಮಡಿಕೇರಿ - 571 201
☎ - 229074
- ಅಚ್ಚುಮಾಡ್‌ನವು
ಪಿಂಞ ಮುದ್ರಣ - ಶಕ್ತಿ ಪ್ರಿಂಟರ್ಸ್,
ಇಂಡಸ್ಟ್ರಿಯಲ್ ಎಸ್ಟೇಟ್,
ಮಡಿಕೇರಿ
☎: 228829, 228382
- ಎದಿಕೆ ಪಾಳೆ ವಿನ್ಯಾಸ - ಹೈಷಿಕೇಶ್ (ಅಪ್ಪು)

ಅಧ್ಯಕ್ಷರ ತಕ್ಕ

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿರ ಮೂಲಕ ಕೊಡವ ತಕ್ಕ, ಸಾಹಿತ್ಯ, ಪದ್ಧತಿ, ಪರಂಪರೆರ ಬೊಳಚೆಕ್ ಒತ್ತಾಸೆ ಕೊಡಪ ಉದ್ದೇಶತ್. ಎಚ್ಚಕೋ ಕಾರ್ಯಕ್ರಮ ನಡತಿಯಂಡುಂಡ್ ಆ ಪೈಕಿ ಪುದಿಯ ಪುದಿಯ ಸಾಹಿತಿಯಡ ಪುಸ್ತಕತ್‌ನೋ ಬೊಳಿಪಡ್‌ತಿತ್ ಆಪಚ್ಚಕ್ ಕಮ್ಮಿ ಕ್ರಯಕ್ ಓದುಗಂಗಡ ಕೈಕ್‌ಎತ್‌ಚಿಟ್ಟುಂಡುಂಡ್.

ಅದೇ ಪೋಲೆ " ಆಖೀರಿ ತೀರ್ಮಾನ" ಎಣ್ಣಾವ, ಸಾಮಾಜಿಕ ಕಾದಂಬರಿನ ಶ್ರೀಮತಿ ಬಲ್ಯಮಾಡ ದೇವಕ್ಕಿ ಗಣಪತಿ ಎಳ್‌ದಿತ್ ಅಕಾಡೆಮಿಕ್ ಅಯಿಚಿ ತಂದಾನ ಪ್ರಕಟಣಾ ಸಮಿತಿಕಾರ ಆಯ್ಕೆ ಮಾಡಿತ್ ಪ್ರಕಟಪಡ್‌ತಿಯಂಡುಂಡ್.

ಈ ಕಾದಂಬರಿಲ್ ಮಾನವ ಜನಾಂಗ ಎಚ್ಚಕೇ ಆಸ್ತಿ ಅಂತಸ್ತ್ ಪಡಂದಿತುಂಡೇಂಗಿಯೂ ದೇವಡ ಮಹಿಮೆಪೋಲೆ ವಿಧಿ ಎತ್ತುವದಲ್ಲತೆ ಕೊದಿ ಎತ್ತುಲೆ ಎಣ್ಣುವಾನ ಎಳ್ತಕರ್ತಿ ದುಂಬಾ ಚಾಯಿತೆ ನೆಜ್ಜಿತ್ ಸಮಾಜಕ್ ಬಟ್ಟೆ ಬೊಳಿಕಾಟಿತ್. ಇದ್‌ನ ಓದುಗಂಗ ಕ್ರಯಕ್ ಎಡ್‌ಕಂಡ್ ಓದ್‌ಚೇಂಗಿ, ಎಳ್ತಕರ್ತಿರ ಪಿಂಞ ನಂಗಡ ಪ್ರಯತ್ನ ಸಾರ್ಥಕ.

ಮಡಿಕೇರಿ

8-4-2004

ಚಿರಿಯಪಂಡ ಯಿಂ. ರಾಜಾ ನಂಜಪ್ಪ

ಅಧ್ಯಕ್ಷ

ಎಳ್ಳುಕರ್ತೃ ರಚ್ಛ

ಕೊಡವ ಸಾಹಿತ್ಯ ಕ್ಷೇತ್ರತ್ ಚೆರಿಯಚೆರಿಯ ತಮಾಷಿ, ಗಾದೆ, ಕಥೆ, ಲೇಖನಂದ್ ಎಳ್ಳಾದಿಯಂಡಿಂಜಲ್ಲಿ ಓರ್ ಚೆರ್ಕಥೆ 'ನಾಲಾ ಬದ್ಕಂದೆಣ್ಣುವದ್ ಕೊಡವತಕ್ಕ ಎಳ್ಳುಕಾರಡ ಕೂಟತರ ಸಾಹಿತ್ಯ ಮಾಲೆಲ್ ಬೊಳಿಕಂಡಿತ್. ಇಕ್ಕ "ಆಖೀರಿ ತೀರ್ಮಾನ" ಎಣ್ಣುವ ಆದ್ಕ ಕಾದಂಬರಿನ ಕೊಡವ ಸಾಹಿತ್ಯ ಅಕಾಡೆಮಿ ಬೊಳಿಪಡತಿಯಂಡುಳ್ಳದ್ ನಾಕ್ ಕುಷಿತಂದಿತ್. ಇದಲ್ ಬಪ್ಪ ಘಟನೆ ಎಲ್ಲಾ ಕಾಲ್ಪನಿಕ. ಇದ್ಂಗೆ ಸಂಬಂಧ ಪಟ್ಟನ್ನನೆ ಓದುಗಂಗಡ ಅಭಿಪ್ರಾಯಕ್ ನಾಡ ಸ್ವಾಗತ ಉಂಡ್.

ಈ ಕಾದಂಬರಿಲ್ ನಂಗಕ್ ಆಸ್ತಿ, ಪಣ, ಅಂತಸ್ತ್ ಎನ್ನನೆ ದೇವಡ ಕೊಡುಗೆಯೋ ಅನ್ನನೇ ಮಕ್ಕಳೂ ದೇವಕ್ ದಾರ್ಕ್ಕ ಎಂತದ್ ಎಚ್ಚಕ್ ಕೊಡ್ಕಂಡೂಂದ್ ಗೊತ್ತುಂಡ್. ಅದ್ಂಗೆ ಮೀರಿ ನಂಗ ಬಯಂದಕ ಅದಲ್ ಕಷ್ಟವೇ ಜಾಸ್ತಿ.

ಸ್ವಂತ ಕುಂಞ ಅಕಸ್ತಿ ಕವಾಯ್ತ್ ಇಲ್ಲತಾನಲ್ಲಿ ಓರ್ದತ್ತ್ ಕುಂಞ ಎಡ್ತಂಡತ್. ಆದೂ ಎನ್ನನೆ ಇಲ್ಲತಾಚಿ. ಆಂಗ್ ದಾರ್ ಹೊಣೆ... ಆ ತೀರ್ಮಾನ ಸರಿಯಾಂದ್ ಓದುಗಂಗಡ ವಿಮರ್ಶೆಕ್ ಬುಟ್ಟಿಯೆ. ಇನ್ನನೆ ನೆಜ್ಜ ಕತೆಯೇ ಇದ್.

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿರ ಅಧ್ಯಕ್ಷ, ಪದಾಧಿಕಾರಿಯಕ್ ನಾಡ ಮನದುಂಬ್ನ ವಂದನೆ. ನಂಗಡಂತ ಪುದಿಯ ಎಳ್ಳುಕಾರಕ್ ಪ್ರೋತ್ಸಾಹ ತಾತೇಂಗಿ ಸಾಹಿತ್ಯ ಕ್ಷೇತ್ರ ಬೊಳಿವ. ಅನ್ನನೇ ಸಹಕರ್ ಚಿಟ್ಟಾಯಿಂಗಳೆಲ್ಲಾ ವಂದನೆ.

ಬಲ್ಯಮೂಡ ದೇವಕಿ ಗಣಪತಿ

ದೀಪ್ತಿ ನಿವಾಸ ಪೊನ್ನಂಪೇಟೆ

"ಅಖಿಲ ತೀರ್ಮಾನ"

ಅಬ್ಬ! ಎಲ್ಲೆಲ್ಲಿಯೂ ಬಸ್ಸು, ಕಾರ್, ಲಾರಿ, ಬೈಕ್, ಆಟೋರೀಕ್ಷಾಂದ್ ಅಬ್ಬರತ್ತರ ಸದ್ದೋ ಸದ್ದೋ ಒಪ್ಪೊಮ್ಮ ಪೋಲೆ ಪಾರುವ ಏರೋಪ್ಲೇನ್!..... ಎಲ್ಲಿಯೋ ಕೂತ್‌ಡುವ ರೈಲ್ ಆಹಾ..... ಬೆಂಗಳೂರ್?.....ಎನ್ನನಿಜತ್ ಎನ್ನನೆ ವಿಸ್ತಾರ ಆಚಿ.... ಈಂಡಡಲ್ ಒಮ್ಮ ಮನೆ ಸೇರ್‌ಚೇಂಗಿ ಮದೀಂದ್ ಆಯಿಂತಿತ್ ವಾಣಿಕ್ಕಿ!..... ಮನೆಂಜಿ ಶಾಪಿಂಗ್‌ಕ್ಂದ್ ಮೊಟ್ಟ್ಳಂಜಕ ಒಂದ್ ಒಂದ್ಂದ್ ಗೇನಮಾಡ್‌ನ ನೇರಕ್ ಒಂದೂ ಆಪಾಲೆ. ಓರೋರ್ ಜಾಗತ್ ಕಾರ್‌ಕ್ಕ ಪಾರ್ಕಿಂಗ್‌ಕ್ ಜಾಗ ಇಲ್ಲತೆ ಎಲ್ಲಿಯೋ ನಿಪ್ಪಾಚಿಟ್ಟಿತ್ ಆ ಜನಡಡಲ್ ನುಗ್ಗಿತೂ ನೂಕಿತೂ ಓಡಿತೂ ತಿರ್‌ಗಿತ್ ಕಾಲ್ ನೊಂಬಲ ಶುರುವಾಯಿಂತಿತ್. ನಂಗಕ್ಕ ಬೋಂಡಿಯಾನ ವಸ್ತುಕ್ಕ ಪತ್ ಅಂಗಡಿ ಪತ್ತಿತ್ತೂ ಇಳಂಜಿತ್ತೂ ಕಡೇಕ್ ಏದೇಂಗೊಂದ್ ಮದೀಂದ್ ಎಡ್‌ತಂಡದೂ ಉಂಡ್. ವಾಣಿಯೂ ವಸಂತನೂ ದಂಡಾಳೇ ಬಂದಿತಿಂಜಕ ಅದ್ ಓರ್ ಥರ... ಆಚೇಂಗಿ ಇಕ್ಕ ಜೊತೆಲ್ ಅಭಿಲಾಷ್ ಉಂಡ್. ಶುರೂಲ್ ಚೆನ್ನ ಚೆನ್ನ ನಡ್‌ಂದಿತ್, ಕಂಡಾಂಗಲ್ಲಾ ಕೈಕಾಟಿತ್ ತೆಳಿಚಂಡ್ ಕಳಿಚಂಡಿಂಜದ್ ಇಕ್ಕ ಮುಂಡತಾಯಿತ್ ಮುಸುಮುಸು ಎಣ್ಣೆಯಂಡ್ ಅಪ್ಪಂಡ ಸೊಂಟ ಪತ್ತಿಂತಿತ್. "ಎಲ್ಲಿಯೇಂಗಿ ಓರೋರ್ ಐಸ್‌ಕ್ರೀಂ ತಿಂಗನ ವಸಂತ"ಂದ್ ಕೇಟಾಂಗ್ ಚೋತ ಕಾಲ್‌ಕ್ಕ ಚೆನ್ನ ರೆಸ್ಟೇಂಗಿ ಕಾಟ್ವಾಡ್‌ಂದ್ 'ಇರ್ ಅಲ್ಲಿ ಯಂ.ಜಿ. ರೋಡ್‌ಲ್ ನಂಗ ಮಾಮೂಲ್ ತಿಂಬಲ್ಲಿಕ್ಕ ಪೋಕನಾ ಅಲ್ಲಿ ಪಾರ್ಕಿಂಗ್‌ಕ್ ಚಾಯುಂಡಲ್ಲಾಂದ್ "ಎಡ್‌ತ ಸಾಮಾನತ್ತರ ಪ್ಯಾಕನ ವಾಣಿರ ಕೈಕ್ ಕೊಡ್‌ತಿತ್ ಕಾರ್ ಬೆಚ್ಚಿಲ್ಲಿಕ್ ಬಾತ್ ಎಲ್ಲಾರೂ.

ಐಸ್‌ಕ್ರೀಂ ತಿಂದಿತಾನದ್ ತಡಿಕ್ಕು, ಮನಸ್ಸಕ್ಕು ಚೆನ್ನ ತಂಪು ಆಚಿ. "ಬಾಕಿ

ಎಂತದರೇ ಎಡ್‌ಪಕುಳ್ಳ ಒಮ್ಮೆ ಗೇನ ಮಾಡ್ ನೇರಾಚಿ ಪೋಕನಾ" ಎಲ್ಲಾ ಆಚೀಂದ್ ಕಾಂಬ. ಅಭಿಲಾಷ್‌ಕ್ಕ್ ಓರ್ ಡಾಲ್ ಎಡ್‌ತಕ್ಕ್ ಮದಿ. ನಾಕೂ ಸುಸ್ತ್ ಬೆರಿಯ ಪೋಕನಾ. ಅಲ್ಲಿ ಪೋಪಕ ಕ್ಕಟ್ಟುವಲ್ಲಾ ಕಿಡ್ಸ್‌ಕಾರ್ನರ್"ಂದ್ ಎಲ್ಲಾಂಗೂಡಿ ತೇಂದನ್ನನೆ ಎಣ್‌ಚಿ ವಾಣಿ.

ಕಿಡ್ಸ್‌ಕಾರ್ನರ್‌ಂದ್ ಎಣ್ಣೆನಕ್ಕಲೂ ಬಲ್ಯಯಿಂಗಳೋ ಮರ್‌ಳ್ ಮಾಡುವನ್ನನೆ ಇಂಜತ್ ಗೊಂಬೆಯ ಕಲವು ನೇರಾಯ್ತು ಮನುಷ್ಯಂಗಳನ್ನನೇ ತೆಳಿಪ್ಪದೂ, ಡ್ಯಾನ್ಸ್ ಮಾಡುವದೂ, ಮೆಯಾಲೋಕಕ್ಕ್ ಪೋನನ್ನನೆ ಆಪಂತ್. ಓರೋರ್ ಭಾಗತ್ ತಂದ ಗಿಪ್ಪ್ ಕೂಪನ್‌ನ ಕೇಟಂಡ್ ಆನ ಇಂಞೋರ್ ಜಾಗತ್ ಕೊಡ್‌ತಂಡ್ ಅರೆ ಗಂಟೆ ಆಚೀಂಗಿಯೂ ಅಭಿಲಾಷ್‌ಕ್ಕ್ ಓರ್ ಗೊಂಬೆಯೂ ಇಷ್ಟ ಆಯಿಲೆ. ಇವನ ಬುಟ್ಟತೇಂಗಿ ನಂಗ ಇಲ್ಲಿಯೇ ಒಳಿಂಜೋಪಾಂದ್‌ಕಾಂಬ ನೀನೇ ಒಂದಾನ ಸೆಲೆಕ್ಟ್ ಮಾಡ್‌ರೇಂದ್ ವಸಂತ್ ಎಣ್‌ಚಿ. ಓರ್ ಸೇಲ್ಸ್‌ಕ್‌ಣ್ಣ ಬೊಳ್‌ತ ಗೊನ್‌ಟ್ಟ ಚಾಯಿಕರ್ತಿ ಮೂಡಿ ಗೊಂಬೆನ ಕಾಟುವದೂ ಅಭಿಲಾಷ್ ಕೈ ನೋಟ್‌ಚಿ. ಆಂಡ ಕೀ ಕೊಡ್‌ಕಲ್ ಕಳಿನೆಲ್ಲಾ ಕಾಟಿತಾನದು ವಸಂತ್ ಬಿಲ್ಲ್ ಕೊಡ್‌ತಿತ್ ಎಲ್ಲಾರೂ ಪೊರಮೆ ಬಾತ್. ಕಾರ್‌ರ ಬಯ್ಯತ್ ಸೀಟ್‌ಲ್ ಆಂಡ ಕೂಡೆ ಕಳ್‌ಚಂಡ್ ಇಚ್ಚನೇರ ಚೋತದೆಲ್ಲಾ ಮರಂದಿತ್ ಕುಶೀಲಿಂತ್ ಅಭಿಲಾಷ್.

ಮನೆರ ಪೂಮೊಗತ್ತ್ ಕಾರ್ ನಿಂದತ್. ವಸಂತಂಡ ಮನಸ್ಸು ಪೋಲೆ ನಿಂದಿತ್ ಕೆಟ್ಪಚಿಟ್ಟಮನೆ ದುಡ್ಡೂ, ಮಂಡೆಯೂ ಇಂಜ ಪಿಂಞ ಮನೆರ ಕೆಲಸ ಸುಲಭವೇ ಅಲ್ಲಾ.. ಸಿಟಿಲ್ ಅಚ್ಚಕ್ಕ್ ಮನೆರ ಕೂಟ್‌ಲೂ ಎದ್‌ದ್‌ಕಾಂಬಂತ್. ಮಿಂಞಾಲಾ ಆಂಗೊತ್ತ ಪೂತೋಟ ಇಂಞ ಓರ್ ಗರಿ ಕೂಟ್‌ನನ್ನನೆ ಇಂಜತ್. ಕುಂಞಿರ ಪೆದತ್ತನೇ ಮನಕ್ಕೂ ಬೆಚ್ಚಿತಿಂತ್. ಆಫೀಸ್‌ಂಜಿ ಬಂದದೇ ನೇರ ಶಾಪಿಂಗ್‌ಕ್‌ಂದ್ ಪೋಯಿತಿಂಜದ್ ಅವಂಗ್ ದುಂಬಾ ಸುಸ್ತಾಪಕ್ಕ್ ಕಾರಣ. ಆಳ್‌ಕ್‌ಣ್ಣ ರವಿ ಕಾರ್‌ಸದ್‌ದ್‌ಕ್ಕ್ ಪೊರಮೆ ಬರಣೆ ಅಭಿಲಾಷ್ ಕೇದ ಕ್ಕಳಂಚಿತ್

ಅವಂಗೊಮ್ಮೆ ಗೊಂಬೆರ ಕಳಿನ ಕಾಟಕೊಡ್ತಿತ್ ಅಲ್ಲಿಯೇ ಕಾಲನ್‌ಟಿ ಅಳಾತತ್. ರವಿ ಕ್ಕಣ್ಣ ಉಳಂಜ ಪೇಕೇಟ್‌ನ ಎಡ್‌ತಂಡ್ ಒಳಾಕ್ಕ್ ಪೋಚಿ. ವಸಂತ್ ಒಳಾಕ್ಕ್ ಪೂಯ್‌ಬಟ್ಟೆ ಮಾತಿತ್ ಫ್ಯಾನ್ ಇಟ್ಟಂಡ್ ಸೋಫಾತ್ ಅಳಾತ್ ಟಿ.ವಿ. ಆನ್ ಮಾಡ್‌ಚಿ. ಅಕ್ಕಣೆ ಮ...ಮ್ಲೀ...ಂದ್ ಓರ್ ಕೂತ್‌ಕೇಟನ್ನನೆ ಆಚಿ. ಎಂತದ್...?.....ಪೂರಮೆ ಬಕ್ಕಣೆ ನ್ಯೂಟ್ರಲ್‌ಲಾ ನಿಪ್ಪಾಚಿಟ್ಟಿ ಕಾರ್ ಪೋರ್ಟ್‌ಕೋತ್ ಕಳಚಂಡಿಂಜ ಅಭಿಲಾಷ್‌ರ ಮೇಲೆ ಪತ್ತಿತ್ ಕೋದ್‌ಲ್ ಪೂ ತೋಟತ್ ನಿಂದಿತಿಂತ್. ಅಭೀ...ಂದ್....ಓಡಿ ಬಂದ ವಸಂತ್ ಮಂಡೆ ತಿರ್‌ನನ್ನನೆ ಆಯ್ ಬುದ್ ಪೋಚಿ. ಅವ ಕಣ್ಣ ತೊರಪ್ಪಕ್ಕ್ ಪತ್ತ್ ನಿಮಿಷವೇ ಆಯಿತಿಂತ್.

ಆಂಡೊಳಾತ್ ಒಳಂಜಿ ಕೂತ್‌ಕ್ಕ್ ಪೂರಮೆ ಬಂದ ವಾಣಿ ಈ ನೋಟತ್‌ನ ಕಂಡಿತ್ ಅಲ್ಲಿಯೇ ಕುಂಞಿರ ಮೇಲೆ ಮಂಕಾಯ್ ಬುದ್ಧಿತಿಂತ್. ಆಳುವಡ ಕೂತ್‌ಪಡೆಕ್ಕ್ ನೆರೆಮನೆಕಾರ ಎಲ್ಲಾ ಬಂದ್ ಕೂಡಿತಿಂತ್. ಪತ್ತ್ ನಿಮಿಷ ಕಯಿಂಜಪಿಂಞ ಕಣ್ಣ ತೊರಂದ ವಸಂತ್‌ಕ್ಕ್ ನೇರಾನ್ ಅರ್‌ಂಜವಕ್ಕ್ ಚಿನ್ನನೇರವೇ ಆಚಿ. ದಾರೋ ನೀರ್ ಕಾಟಾನಾನ ಕುಡ್‌ಚಿತ್ ಆಳಾಕ್‌ಣ್ಣ ರವಿರ ಕೂತ್‌ಕ್ಕ್ ಅತ್ತಟಿನೋಟಣೆ ಬೊಳಾತ ಬಟ್ಟೆನ ದಾರೋ ಕುಂಞಿಕ್ಕ್ ಪೊದಪ್ಪಾಚಿಟ್ಟಂಡಿಂಜತ್. ಎದ್ದಾ ನಿಂತ ಮೆಲ್ಲೆ ಅಭಿಲಾಷ್ ಬುದ್ಧಿಲ್ಲಿಕ್ಕ್ ಕಾಲ ಬಲ್‌ಚಂಡ್ ಎತ್ತ್‌ಚಿ. ಅಲ್ಲಿಯೇ ಕುತ್ತಿ ಅಳಾತಂಡ್ ಮೆಲ್ಲೆ ಬಟ್ಟೆನ ನೀಕ್‌ಚಿ. ಪೂಕುಂಞ "ಅಭಿ" ನಾಳೇಂಜಿ ಮೂಂದ್ ಬಯತ್ ನಡಪ. ಅವಂಡ ಬರ್ತಡೇರ ಶಾಪಿಂಗ್‌ಕ್ಕ್‌ಂದೇ ಪೋಯಿತಿಂಜಿಯೆ. ಅದೇ ಗೊಂಬೆ ಕೈರಪ್ಪಡ್‌ತತ್ ಇಂಞಾ ಉಂಡ್. ವಿಧಿ ಇನ್ನನೆ ಮಾಡಿರ್‌ತಲ್ಲಾ....ಂದ್ ಮಂಡೆಕ್ಕ್ ಕೈ ಬೆಚ್ಚಂಡ್ ಬಾಯಿಕ್ ಬಂದಾನ ಎಣ್ಣೆಯಂಡ್ ಮೊರಡುವ ಕೂಡ್‌ಚಿ ವಸಂತ್. ಅಕ್ಕಣೆ ಅವಂಡ ಬಾಸ್, ಅಫೀಸ್‌ಕಾರಳೆಲ್ಲಾ ಬಂದ್ ಕಾರಳಂಜತ್ ದಾಡದೋ ಕೈ ಅವಂಡ ಬೆನ್ನ ಮುಟ್ಟುವಕ್ಕ್ ಮಂಡೆ ನೇತನ

ವಸಂತ್ ಬಾಸಾನ್ ಕಂಡಿತ್ ಇಂಞ. ಜಾಸ್ತಿ ಮೊರಡುವಕೂಡ್ಚಿ. ಚೆನ್ನನೇರ ಎಲ್ಲಾರೂ ಮೌನವಾಯ್ತ್ ಇಂಜತ್. ಚೆನ್ನ ನೇರತ್ ಅವಂಡ ದುಃಖ ಚೆನ್ನ ಕಮ್ಮಿ ಆನದು ಆಣ್ಣ ಸಮಾಧಾನ ಮಾಡ್ಚಿ. ಅಕ್ಕ ಅವಂಗ್ ವಾಣಿರ ಗೇನಬಾತ್ ಅಕ್ಕು ವಾಣಿ ಎಲ್ಲಿಯಾ?..... ಓರ್ ಡಾಕ್ಟರ್ ಒಳ್ಳೆಕ್ ಪೋನಾನಕಂಡ ಪಿಂಞ ಅವಂಡ ಗಾಬರಿ ಜಾಸ್ತಿ ಆಚಿ. ನಾಡ ವಾಣಿ ಎಲ್ಲಿಯಾ?

ಈನ ನೋಟಿತ್ ವಾಣಿ ಎನ್ನೇಂಗಿ ಮಾಡಿಯಂಡ್ತಾ? ಎಲ್ಲಿಯ ಅವಳೆ ಕಾಂಬದೇ ಇಲ್ಲೆ. ಒಮ್ಮೆಕೇ ಅವಂಡ ಎದೆ ಬಡಿತ ನಿಂದನ್ನನೆ ಆಚಿ. ಎದ್ದಿತ್ ಒಳ್ಳೆಕ್ ಓಡ್ನವನ ದಾರೋ ತಡತ್ ನಿಪ್ಪೆಚಿಟ್ಟಿತ್. ಅವಕ್ ಪ್ರಜ್ಞೆ ಇಲ್ಲೆ. ಒಳ್ಳೆಲ್ ಬುದ್ಧವ ಕಾಕಿತ್ ಡಾಕ್ಟರ್ ಬಂತ ಬೇಚಾರ ಮಾಡತೀಂದ್ ಮೆಲ್ಲೆ ನೋಟಣೆ ಪ್ರಜ್ಞೆ ಇಲ್ಲತ ವಾಣಿ ವಸಂತಕ್ ಎನ್ನ ಮಾಡುವಂದ್ ಗೊತ್ತಾಯಿಲೆ. ಕುಂಞಾರ ಕೂಡೆ ವಾಣಿಯೂ ಪೋಯಿರ್ತೇಂ...ಗಿ? ಗೇನಮಾಡಿತೇ ಬೆವರಿ ಪೋಚಿ. ಪೊರಮೆನಿಂದ ಕಾರ್ಕ್ ತಿತ್ ಬೆಚ್ಚುರುವಚ್ಚಕ್ ಚಡಿಬಾತ್ ನಾಡದೇ ಅಜಕರೂತೆ ಸೆರಿಕ್ ನಿಪ್ಪೆಚಿಟ್ಟಿತಿಂಜಕ ಇನ್ನನೆ ಆಪಕಿತಾ? ನಾಡ ಕುಂಞಾನೇ ತಿಂದ್ ರಾತಲ್ಲ!..... ಮನುಷ್ಯಂಡ ಅಜಾಗರೂಕತೆ ಇನ್ನನೆ ಪಾಳೆಮಾಡುವಂದ್ ಅರಿವಾಚಿ. " ಅಟ್ಟಿ ಪಿಂಞ ಒಲೆಕತ್ ಚಿ ಕೆಟ್ಟಿ ಪಿಂಞ ಬುದ್ಧಿ ಬಾತ್ಂದ್ " ಎಣ್ಣುಪ ಗಾದೆ ಎಚ್ಚಕ್ ಸರಿಯಲ್ಲ!.... ಎಲ್ಲಾಂಗೂಡಿ ಕೈ ದಾಟಿ ಪೋಯಿತಿಂತ್.

ಎಂತ ನಿಂದಕಲೂ ಸಮಯನಿಪ್ಪದುಂಡಾ?.. ಗಂಟೆ ಓಡ್ಚಿ ದಿನ ಆಚಿ. ಪನ್ನಂದನೇ ದಿನತ್ ದೇವಸ್ಥಾನತ್ ಕುಂಞಾರ ಪೆದತ್ ಸಮಾರಾಧನೆ ಮಾಡಿತ್ ಅನ್ನದಾನ ಮಾಡ್ಚಿ ವಸಂತ್. ವಾಣಿಕ್ ಪ್ರಜ್ಞೆ ಬಂದಿತಿಂಜಾಲೆ. ಆಸ್ಪತ್ರೆಕ್ ಬೋಂಡ ಮನೆಲೇ ಉಪಚಾರ ಮಾಡುವೀಂದ್ ಎಣ್ಣಾನ ಪೋಲೆ ಡಾಕ್ಟರ್ ಮನೆಲೇ ವ್ಯವಸ್ಥೆ ಮಾಡಿತಿಂಜತ್. ಒಮ್ಮೊಮ್ಮೆ ಚೆನ್ನ ಕಣ್ಣೆತೊರಂದಕ್ಕಲೂ ಕೂಡನ್ನೆ ಮುಂಕಾಯಿರುವಂತ. ದ್ರಿಪ್ಸ್ ಕೊಡ್ತಂಡೇ ಇಂಜತ್.

ಕುಂಞಿಪೋನವ್ಯಸನತ್ತರ ಕೂಡೆ ವಾಣಿರ ಈ ಸ್ಥಿತಿ ವಸಂತಂಡ ಮಂಡೆ ಪೂರ್ತಿ ಮಂಕಾಪನ್ನನೆ ಮಾಡಿತಿಂತ. ತೆಳಿಗಳಲ್ ದುಂಬಿತಿಂಜ ಮನೆ ಸ್ತಶಾನತ್ತರನ್ನನೆ ಆಯಿತಿಂತ. ದಾಡ ಮೂಡಲೂ ಕಳೆಯೇ ಇಲ್ಲೆ. ಕಾಟಾಚಾರಕ್ಕ ಉಂಬ ಕುಡಿಪ ಮಾಡಿಯಂಡಿಂಜತ್ತ ಕುಂಞಿ ಕಳಚಿ ಜಾಗ ಅವಂಡ ಕಳಿನ ಎಲ್ಲಾ ವಸಂತನ ನೋಟಿತ್ತ ತೆಳಚನ್ನನೆ ಆಪಂತ. ಮಾವಿ ಎಲ್ಲಾನೋ ಒಳಲ್ ಒಳಪ್ಪೆಚಿಟ್ಟಿತ್ತ.

ಅಭಿಲಾಷ್ ಚತ್ತಿತ್ತ 15 ದಿನತ್ತ ವಾಣಿ ಕಣ್ಣ ತೊರಂದಿತ್ತ ಮೆಲ್ಲೆ ದಂಡ್ ತಕ್ಕ ಪರಂದತ್. ಅವಳ ಸಮಾಧಾನ ಮಾಡುವಕ್ಕ ವಸಂತಂಗಲ್ಲತೆ ದಾರಕ್ಕೂ ಕಯ್ಯತಾಚಿ. ಆಪಚ್ಚಕ್ ಮೊರಟಿತ್ತ ದುಃಖ ಪೊರಬೂಕಡೆಂದ್ ಡಾಕ್ಟರೂ ಎಣ್ಣಿತಿಂತ. ಮಂಡೆ ಸೆರಿ ಇಲ್ಲತನ್ನನೆ ಒಮ್ಮೊಮ್ಮ ಕಳಿಪಂತ. ಒನ್ನಾದ್ ವಸಂತ ನಿಮಾನ್ಸಕ್ಕ ಕಾಕಿಯಪೋಚಿ. ಅಲ್ಲಿ ವಿಷಯ ಅರಂಜ ಡಾಕ್ಟರ್ ಅವ ಚಾಯಿತೆ ಉಂಡ್. ಆಚೇಂಗಿ ಶಾಕ್ಕ್ಕ ಇನ್ನನೆ ಆಯೆಂದ್ ಎಣ್ಣಿತ್ತ ನಿಂಗ ಚೆನ್ನ ದಿನಕ್ಕ ಜಾಗ ಬದಲ್ ಮಾಡಿ. ಚಾಯಾಪಾಂದ್ ಎಣ್ಣಿಚಿ. ಅಲ್ಲಿಂಜಿ ಬಂದ ಪಿಂಞ ಪುನಃ ಬಾರೀಂದ್ ಎಣ್ಣಿತಯಿಚತ್.

ನೆಮ್ಮದಿ ಕಳಂದಂಡ ವಸಂತ ಚೆನ್ನ ದಿನ ರಜಕ್ಕ ಎಳೆದ್ಚಿ. ಊಟಿಕ್ಕ ಪೋಪಕುಳ್ಳ ಏರ್ಪಾಡ್ ಮಾಡ್ಚಿ. ಇಲ್ಲಿ ನಾಡ ಕುಂಞಿ ಒಬ್ಬನೇ ಆಯಿರುವಾ ನಾನ್ ಎಲ್ಲಿಕೂ ಬಪ್ಪಾಲೆಂದ್ ಹಟ ಮಾಡ್ಚಿ ವಾಣಿ. ಎನ್ನನೆಯೋ ಒಪ್ಪೆಚಿಟ್ಟಿತ್ತ ರೆಡಿ ಆಚಿ.

ಬಟ್ಟೆ ಉದ್ದಕ್ಕೂ ಪರದಾಡಿಯಂಡೇ ಇಂಜವಳ ಸಮಾಧಾನ ಮಾಡಿಯಂಡ್ ಊಟಿಕ್ಕ ಎತ್ತಚಿ. ಓರ್ ಹೊಟೇಲಲ್ ರೂಂ ಮಾಡಿತ್ತ ಕುಳಚಿತ್ತ ಪೈಶ್ ಆನಪಿಂಞ ಚೆನ್ನ ಚಾಯಾನನ್ನನೆ ಆಚಿ ವಸಂತಂಗ್. ಅಂದ್ ಎಲ್ಲಿಕೂ ಪೋಕತೆ ಅಲ್ಲಿಯೆ ಕಯಿಚತ್. ಪಿತ್ಯಾಂದ್ ಬೊಟ್ಟಾನಿಕಲ್ ಗಾರ್ಡನ್‌ಕ್ಕ ಪೋನಲ್ಲಿ ವಾಣಿ ಅಲ್ಲಿ ಟೂರಿಸ್ಪದಾಡದೋ ಚೆರಿಯ ಕುಂಞಿನ ಓಡಿಪೋಯ್ತ್

ಎಡ್‌ತಂಡ್. ಅಯಿಂಗ್ ಬೊತ್ತಿ ಪೋಯಿತಿಂತ್. ವಸಂತ್ ವಿಷಯತ್ನನ ಎಣ್ಣಾನ ಪಿಂಞ "ಅಯ್ಯೋ ಪಾಪಂದ್" ಮುಂಡತಾಚಿ. ಓರ್‌ದಿನ ಕೂನೂರ್, ಪಿತ್ಯಾಂದ್ ವೆಲ್ಲಿಂಗ್ವನ್‌ಂದ್ ತಿರ್‌ಗ್‌ಚ್ಚಿ. ಸಮಯ ಕೊಟ್ಟುಂಚ್ಚಿ ಅವಳ ಸಮಾಧಾನತ್ನ ವಿಷಯತ್ನನ ಅರಿವು ಮಾಡಿತ್ನ ಇಕ್ಕ ಚೆನ್ನ ಗಟ್ಟಿ ಮನಸ್ಸಿ ಆನನ್ನೆ ಕಾಂಬತ್. ಎಣ್ಣಾವಕ್ಕೆಲ್ಲ ಚೆರಿಯ ಮಕ್ಕಡನ್ನನೆ ವಸಂತನೇ ನೋಟಿಯಂಡ್ ಮಂಡೆ ಆಟುವಂತ್ ವಾಣಿ.

ಓರ್ ತಿಂಗ್ ಆಪಕ ಅವ ಚೆನ್ನ ಚಾಯಾನಾಂಗ್ ವಾಪಾಸ್ ಬಾತ್. ಒಮ್ಮೊಮ್ಮೆ ಚೆರಿಯ ಮಕ್ಕಳ ಕಾಂಬಕ, ಟಿವಿಲ್ ಸಿನೀಮಾತ್, ಮಕ್ಕಡ ಕಥೆ ಬಪ್ಪಕ ಚೆನ್ನ ಮಂಕಾಪಂತ್. ಡಾಕ್ಟರ್ ಎಣ್ಣಾನನ್ನನೆ ಪುನಃ ನಿಮಾನ್ಸಕ್ಕ್ ಕಾಕಿಯು ಪೋಚಿ. ಅಪಚ್ಚಕ್ಕ್ ಸೂಕ್ಷ್ಮವಾಯ್ ನೋಟಿಯವಂಡು ನಿಂಗ್ ಅದೇ ವಯಸ್ಸಿರ ಕುಂಞಿನ ದತ್ತೆಡ್‌ತಂಡತೇಂಗಿ ಇಂಞಿ ಚಾಯಾಕೂಂದೂ, ಇಲ್ಲೇಂಗಿ ಇಂಞಿಲೋರ್ ಕುಂಞಿ ನಿಂಗಕೇ ಆಚೇಂಗಿ ಇದ್‌ನ ಮರಕೂಂದೂ ಸಲಹೆ ಕೊಡ್‌ತತ್.

ಈಂಡೆಡೆಲ್ ವಸಂತಂಗ್ ಜೀವನವೇ ಬೇಜಾರಾಯಿ ಪೋಯಿತಿಂತ್ ಪೊಣ್ಣಾ, ಕುಂಞಿ ನಲ್ಲ ಉದ್ಯೋಗ ಸರ್ವಜ್ಞ ಎಣ್ಣಾನನ್ನಕೆ 'ಬೆಚ್ಚಿನೆಯಾಮನೆ, ಇಚ್ಚಿಯಾ ಹೆಂಡತಿ. ವೆಚ್ಚಕ್ಕೆ ಹೊನ್ನಿರಲು ಸ್ವರ್ಗಕ್ಕೆ ಕಿಚ್ಚುಹಚ್ಚೆಂದ " ಎಣ್ಣಾವನ್ನನೆ ನೋಟುವಯಿಂಗಡ ಕಣ್ಣ ಪಡುವನ್ನನೆ ಇಂಜ ಸಂಸಾರ ಈ ತರ ಆಯಿಪೋಚಲ್ಲಂದ್ ಊಜಳೆ ಬುಟ್ಟಿಂಡ್ ಅಳತವ್ವನ್ನನೆ ಮಾಡಿತಿಂತ್. ಪ್ರಪಂಚತ್ ತಾನೋರ್ ಪಾಪಿ ನತದ್ಯಷ್ಟೆಂದ್ ಆಚವಂತ್. ಕುಂಞಿನ ಎನ್ನನೆ ಚಾಕಂಡು, ಓದ್‌ಚಿಡಂಡ್, ಮಂಗಲ ಕಯಿಕಂಡುಂದ್ ಕುಂದ್‌ನಚ್ಚಕ್ ಆಸೆ ಬೆಚ್ಚಿತಿಂತ್. ಈ ನಾಲ್ ತಿಂಗತ್ ಕುಂಞಿನ ಕಳಂದಂಡ ಬುದ್ಧಿ ಭ್ರಮಣೆಯಾನ ಪೊಣ್ಣಾ... ಭೇ ಇದೆಂತಾಯಿಟಂದ್ ಆಚಿ.

ಬೆಂಗಳೂರ್‌ಲ್ ಓರ್ ನಲ್ಲ ಕಂಪೆನಿಕಾರ ಕೆಲಸಕ್ಕ್ ಕಾಕುವಕ್ಕ್ ನಾಡ್‌ಲ್

ಇಂಜಂಡ್ ಕುಂಞಿನ ಹಾಸ್ಪಲ್ಲ್ ಬುಟ್ಟುಂಡ್ ನಂಗೋರ್ ಬರಿ ಅದೋರ್
 ಬರಿ ಎನ್ನಂಗ್ಂದ್ ಕುಟ್ಟತ್ತ್ ಆಚ್ಚನಲ್ಲ ತೋಟತ್ತನ ರೈಟರ್ ವಶಕ್ಕ್
 ಬುಟ್ಟಿತ್ತ ಇಲ್ಲಿಯೋರ್ ಫ್ಲಾಟ್ನ ಎಡ್ತಂಡ್ ಅದೊಲಿಂಜಂಡೇ ಈ
 ಮನನೋ ಕೆಟ್ಟಿನೇತಿತ್ ಕೂಡಿತ್ ಓರ್ಕಾಲತ್ತ್ ಇದೆಂತಕೇತರೆ ಆಚಿ?...
 ಅಪ್ಪಂಡ ಒಂದುಳ್ಳ ಮೋವ ವಸಂತ್. ಅಂಜಿತಲೆಮಾರ್ಕ್ಕ್ ಅಳ್ತ
 ಉಂಡಿತ್ ತೀವತಚ್ಚಕ್ಕ್ ಆಸ್ತಿ ಅಪ್ಪ ಕುಟ್ಟಿಪ್ಪ ಮಾಡಿಚಿಟ್ಟಿತಿಂತ್.
 ಇಂಜಿನಿಯರಿಂಗ್ ಕಡೇ ಕಾಲ ಆದಿಯಂಡಿಪ್ಪಕ್ಕಲೇ ಅಪ್ಪ. ಅವ್ವ ತಂಗೆ
 ಎಲ್ಲಾರೂ ಬೆಂಗಳೂರ್ಂಜಿ ಬಂದಂಡಿಪ್ಪಕ ಮೈಸೂರ್ಲ ಪಕ್ಕ
 ಲಾರಿಕ್ಕ್ಡ್ಚಿತ್ ಎಲ್ಲೂರೂ ಅಲ್ಲಿಯೇ ಚತ್ಪೋಯಿತಿಂತ್. ಅಚ್ಚ ಬಲ್ಯ
 ಆಸ್ತಿಪಾಸ್ತಿರ ಏರಬೇರ ಒಂದೂ ಅರಿಯತ ವಸಂತ್ಂಗ್ ಎಂತಂದೇ
 ಅರಿವಾಯಿಲೆ. ಓದುವಂದ್ ಪೊರಮೇ ಕಯಿಚವ ಇಲ್ಲಿ ರೈಟರ್ ಎಣ್ಣನಾಂಗ್
 ಮಂಡೆ ಆಟಂಡಿಯ ಬಾತ್. ದೂರತ್ತರ ಬೆಂದ್ಕ ಮೆಲ್ಲೆ ಪಕ್ಕ ಬಪ್ಪಕಾಚಿ,
 ಮೂಡಿ ಮಾಡುವಯಿಂಗಡ ಕಾಟವೂ ಜಾಸ್ತಿ ಆಚಿ. ನೆರೆಮನೆ ಚೆಟ್ಪಚ್ಚ
 ಅಜ್ಜಮಾತ್ರ ಇವಂಗ್ ಸೂಕ್ತ ಸಲಹೆ. ಸೂಚನೆ ಕೊಡ್ಪಂತ್. ಅನ್ನನೇ ವಾಣಿರ
 ಆಯ್ಕೆಯೂ ಆಚಿ. ಅಡಿಪಾಡಿ ಮಂಗಲವೂ ಆಚಿ. ಇಕ್ಕ ಇವಂಡ ಜೊತೆಕ್ಕ್
 ಮಾವ, ಮಾವಿ ಇಂಜಾಂಗ್ ಚೆನ್ನ ಮನಃ ಸಾಂತಿ ಕೊಟ್ಟಚಿ.

ಮಡಿಕೇರಿಲ್ ಲಾಯರ್ ಅಪ್ಪಚ್ಚುರ ದಂಡನೆ ಮೋವಳೇ ವಾಣಿ. ಅಪ್ಪಚ್ಚುಕ್ಕ್
 ದಂಡ್ ಮೂಡಿಯ ಮಾತ್ರ. ಪೆರಿಯವ ರಾಣಿ ಡಾಕ್ಟರ್. ಇವ ಇಂಜಿನಿಯರ್
 ಮಾಡಿತಿಂತ್ ರಾಣಿ ಅಪ್ಪಂಡನ್ನನೆ ಶಾಂತ ಸ್ವಭಾವ. ನಲ್ಲ ಕಲರ್, ಉದ್ದ ಚುರ್ಕ್
 ಎಲ್ಲಾ. ವಾಣಿ ಅಪ್ಪಂಡ ಎಲ್ಲಾ ಗುಣ ಸ್ವಭಾವ ಎಡ್ತ ಬಂತಿಂತ್. ರಾಣಿ
 ಮಂಗಲಾನದೇ ವಡಿಯಂಡ ಕೂಡ ಅಮೇರಿಕಾಕ್ಕ್ ಪೋಯಿರ್ತಿಂತ್.
 ವಾಣಿಯೂ ಅನ್ನನೇ ದೂರ ಪೋಯಿರೊಂದೆಣ್ಣುವ ಪೋಡಿಕ್ಕ್ ತೋಟಕ್ಕಾರ
 ವಸಂತಂಡ ತಂದ್ಕ್ಕ್ ಅಪ್ಪಚ್ಚು ಒತ್ತಂಡತ್. ಇವಳಾಚೇಂಗಿಯೂ ನಂಗಡ

ಕಣ್ಣ್ ಮಿಂಗಳಲ್ ಇಕ್ಕಡ್ಂದ್ ವಯಸ್ಸಾನಯಿಂಗಡ ಆಸೆ ತಪ್ಪಲ್ಲಲ್ಲ!..ಆಡಂಬರತ್ತರ ಮಂಗಲ ಸುಮಾರ್ ತಿಂಗಳೆತ್ತಣೆ ಜನ ಆಂಡ ವಿಚಾರ ಎಣ್ಣಾವದ್ ಕೇಪಂತ್. ದುಡ್ಡ್ ಉಂಡ್ಂದ್ ಅನ್ನನೆ ಖರ್ಚ್ ಮಾಡಂಡುವಾ...?...

ಅಯಿಂಕೆನ್ನಪ್ಪಾ ಉಂಡ್, ಇಲ್ಲತವ ಎನ್ನ ಮಾಡುವ?... ಇನ್ನನೆ ಜನಡ ಪಳಮೆ ಮಂಗಲಾಯಿತ್ 6 ತಿಂಗಳ ಆಪಕ್ಕ ವಾಣಿಕ್ಕ ವಾಂತಿ ಶುರು ಆಚಿ. ಇದ್ ಮಾಮೂಲ್ಂದ್ ಎಲ್ಲಾರೂ ಎಣ್ಣೆಚೇಂಗಿಯೂ ವಸಂತ್ ಗಾಬರಿಲ್ ಡಾಕ್ಟರ್ನೋ ಕಾಕ್ ಚಿಟ್ಟಿತ್ ಮಾವಿಕ್ಕು ಪೋನ್ ಮಾಡ್ಚಿ. ವಾಣಿಕ್ಕ ವಾಂತಿ ನಿಂದದೇ ಇಲ್ಲೆ. ತಿಂದದೊಂದೂ ನಿಕ್ಕತಾಚಿ. ಮಾವಿ ಮಡಿಕೇರಿಕ್ಕ ಕಾಕಿಯ ಪೋಯ್ತ. ಆಸ್ಪತ್ರೆಕ್ಕ ಕೂಟಿತ್ ಡ್ರಿಪ್ಸ್ ಕೊಡ್ತಿತ್ ಚೆನ್ನ ಚಾಯಾಚಿ. ಕೆಲವು ಜನಕ್ಕ ಇನ್ನನೆ ಇಪ್ಪ. ಪೂರ್ತಿ ರೆಸ್ತ್ ಬೋಂಡೂಂದ್ ಅವ ಅಲ್ಲಿಯೇ ಇಕ್ಕಡ್ಂದ್ ಎಣ್ಣೆನಾಂಗ್ ವಾಣಿ ಪೆರಿಗೆ ಆಕಣೆ ಅಲ್ಲಿಯೇ ಇಂಜತ್.

ಒಯಿಂಬದ್ ತಿಂಗದುಂಬುವಕ ಡಾಕ್ಟರ್ ಆಸ್ಪತ್ರೆಕ್ಕೇ ಕೂಟುವಕೆಣ್ಣೆಚಿ. ವಾಣಿ ದುಂಬಾ ಲಾಚಾರಾಯಿತಿಂತ್. ಅಲ್ಲಂಜಿ ಪತ್ತನೇ ದಿನ ನೊಂಬಲ ಶುರುವಾಪಕ ವಸಂತನೂ ಅಲ್ಲಿ ಕೆತ್ತಿತಿಂತ್. ಎಲ್ಲರೂ ಉಳ್ಳದೇವಕ್ಕೆಲ್ಲಾ ಪರಕೆ ಮಾಡಿಯಂಡ್ ಒಮ್ಮೆ ಚಾಯಿತೆ ಆಚೇಂಗಿ ಮದೀಂದ್ ಗೇನಮಾಡಿಯಂಡಿಕ್ಕಣೆ ಡಾಕ್ಟರ್ ವಸಂತನ ಓರ್ ಬರಿಕ್ಕ ಕಾಕ್ಚಿ. ಸಿಸೇರಿಯನ್ ಮಾಡಂಡಿಯಾಪ ನಿಂಗಡ ಒಪ್ಪಿಗೆ ಬೋಂಡೂಂದ್ ಕೇಟತ್ಂದ್ ಅಪ್ಪಚ್ಚುಕೆಣ್ಣೆಚಿ. ಅರೆಗಂಟೆ ಆನದು ಕುಂಗಳಿರ ಮೊರೆ ಕೇಪಕ ಎಲ್ಲಾಡ ಮೂಡೂಬೀಂದತ್. ಪೊರಮೆ ಬಂದ ನರ್ಸ್ "ಕುಂಗಳಿ ಕುಂಗಳಿ"ಂದೆಣ್ಣೆಚಿ. ಕುಂಗಳಿನ ನೋಟ್ಟುಕ್ಕ ಒಳಕ್ಕ ಓಡ್ಚಿ. ವಾಣಿ ಮಾತ್ರ ಪ್ರಜ್ಞೆ ಇಲ್ಲತೆ ಇಂಜತ್. ಬಲ್ಯಡಾಕ್ಟರ್ ಅಪ್ಪಚ್ಚುನೋ ವಸಂತನೋ ಕಾಕಿತ್ ವಿಷಯ ಎಣ್ಣೆಚಿ. "ನಾನ್ ದುಂಬಾ ಪ್ರಯತ್ನ ಪಟ್ಟಿತ್ ಅವ್ವನೋ ಕುಂಗಳಿನೋ ಬಚಾವು ಮಾಡಿಯೆ ಆಚೇಂಗಿ ಮಿಂಗಳಿಕ್ಕ ಇವಕ್ಕ

ಮಕ್ಕ ಆಪ್ಲೇಂದ್" ದಂಡಾಳೂ ಮೂಡ್‌ಮೂಡ್ ನೋಟಿಯಂಡತ್. ಗುಟ್ವಾನ ದಾಕೂ ಎಣ್ಣೆಲೆ. ಎಲ್ಲಾ ಡೆದಿಕೆ ತೆಳಿಚಂಡೇ ಓಡಿಯಾಡ್‌ಚಿ. ವಸಂತ್ ಮಡಿಕೇರಿ ಕುಟ್ಟಂದ್ ದಂಡ್ ಕಡೆ ಪೋಯಂಡ್ ಬಂದಂಡ್ ವಾಣಿರೋ ಕುಂಞಿರೋ ಎಚ್ಚರ ಎಡ್‌ತಂಡಾಂಗ್ ಅಪ್ಪಚ್ಚುಕ್ಕ್ ತೊಂದರೆ ಆಯಿಲೆ ಕ್ಕಣ್ಣ ಕುಂಞಿ ಇಲ್ಲತ ಕೊರವುನ ವಸಂತ್ ನೀಕಿತಿಂತ್. ಓರ್‌ತಕ್ಕೇ ಉಂಡಲ್ಲ "ಮೂಡಿ ಮಕ್ಕಂದ್ ಅಸಡ್ಡೆ ಮಾಡಂಡ ನಿಂಗಕ್ ಕ್ಕಣ್ಣ ಕುಂಞಿಯೂ ಮೈಮನೇ ಆಪಂದ್" ಅದ್ ನೇರೆ. ಅಪ್ಪಚ್ಚುಕ್ಕ್ ಓರ್‌ಕೆಣ್ಣ ಇಂಜಿತಿಂಜಕಅವ ಬೋರೆ ಎಲ್ಲಿಯೇ ಚಾಕರಿ ಮಾಡಿಯಂಡ್ ಇಯಂಗಡ ಕಾಯಕಷ್ಟಕ್ಕ್ ಆಪಂತಾ?... ಎಲ್ಲಾ ಋಣಾನಿಬಂಧ ಕುಂಞಿರ ತೆಳಿಂಗಳಿಲ್ ಮೂಂದ್ ತಿಂಗ ಆಪಕ್ಕ್ ಪೆದ ಇಡುವ ಶಾಸ್ತ್ರ ಮಾಡುವ ಏರ್ಪಾಡಾಚಿ. ಅಕ್ ರಾಣಿಯೂ ಅಕ್‌ಲೇ ಇಂಡಿಯಾಕ್ಕ್ ಬಪ್ಪಾನಗುಂಡ್ ಓರ್ ತಾರೀಕ್ ನಿಗದಿಮಾಡಿತ್. ಪೆದವೂ ಇಟ್ಟತ್. "ಅಭಿಲಾಷ್"ಂದ್ ವಾಣಿಯೇ ಆಂಜೆಡ್‌ತ ಪೆದ. ದಂಡ್ ತಿಂಗ ಇಂಜಿತ್ ರಾಣಿ ಅಪ್ಪರ ಪೋಪದು ವಸಂತ್ ಮೆಲ್ಲೆ ಮಾವಿಕ್ಕ್ ಕುಟ್ಟುಕ್ಕ್ ಪೋಪಕುಳ್ಳ ಇರಾದೆನ ಎಣ್ಣೆಚಿ. ಅಕ್ಕು... ಶಾಸ್ತ್ರಕ್ಕಾಚೆಂಗಿಯೂ ಪೋಕಂಡು. ಅಲ್ಯತ್ತರ ವ್ಯವಹಾರವೂ ಪಾಳಾಯಿರುವ ಅನ್ನನಾಯ್ ಎಲ್ಲಾರೂ ಆಪ್ಪರ ಪೋಪನ್ನೆ ಆಚಿ. ಕುಂಞಿರ ಕೂಡೆ ಕಳಿಪಕ್ಕ್ ಇಲ್ಲಿಯೇ ಇಂಜ "ರವಿ" ಕ್ಕಣ್ಣನೋ ಕಾಕಿಯ ಪೋಚಿ.

ರವಿ ಕ್ಕಣ್ಣ ಅಪ್ಪಚ್ಚುರ ತೋಟತ್ತಲಿಂಜ ಓರ್ ಎರವಂಡ ಕುಂಞಿ. ಆಂಗೋರ್ ಆರ್ ಬಯತ್. ಆಂಡ ಅಪ್ಪಚಿತ್ತ ಪೋಚಿ. ಆ ಮಂದಿ ಓರ್‌ದಂಡ್ ತಿಂಗತ್ತಲೇ ಈ ಕ್ಕಣ್ಣನ ಬುಟ್ಟಿತ್ ಇಂಞಿೋರ್ ಎರವಂಡಕೂಡೆ ಎಣ್ಣೆತೇ ಪೋಯಿರ್‌ತ್. ದಾರೂ ಇಲ್ಲತಾನ ಅಪ್ಪಚ್ಚು ಮನೆಕ್ ಕಾಕಿಯ ಬಂತ್ "ಗಂಗೂ ಇಲ್ಲಿಬಾ ಜೀಪ್‌ಲ್ ದಾರುಳ್ಳಂದ್ ನೋಟಾ"ದೆಣ್ಣೆಚಿ. ಗಂಗು ದಾರೋ ಬೆಂದ್‌ಕಾಂದ್ ನೋಟಣೆ ಮೂಕೇಂದಿಯೊಡ್ ದದ್ದ್ ಬಟ್ಟೆರೊಳ್‌ಲ್ ಕಡ್ಡಿ ನನ್ನನೆ ಉಳ್ಳ ಕ್ಕಣ್ಣ..? ಮೊರಡುವನ್ನನೆ ಕಾಂಬಂತ್. ಇಹೀ.... ಇದ್ ದಾರಪ್ಪಾ

...ಈನೆನ್ನಂಗ್ ಕಾಕಿಯ ಬಂದಿಯಾಂದ್ ಜೋರ್ತೆ ಎಣ್ಣೆ ಮಿಂಗಳೇ ಮೊರಡುವಕ್ಕ ರೆಡಿ ಆಯಿಂತಿಂಜದ್ ಓಲಗ ಉರುಪುವಕ್ಕೂಡ್ಚಿ. ಬೆರಿಯ ಓಡಿಬಂದ ಅಪ್ಪಚ್ಚು ಪೊಣ್ಣಾಕ್ಕ್ ಗದರುವಂಜಿ ಆಂಡ ಕಥೆನೆಲ್ಲಾ ಎಣ್ಣೆಚಿ. ಇಕ್ಕ ಗಂಗುಕ್ಕ್ ಪಾಪಂದಾಚಿ. ಮೆಲ್ಲೆ ಜೀಪ್‌ಂಜಿ ಉಳಾಪಿತ ಆಡಿಗ್ ಪೊಣ್ಣಾಳ್ ಲೀಲಂಗ್ ಆನ ಕಾಕಿಯ ಪೋಯ್. ಕುಳಾಪ್‌ಚಿಟ್ಟಿತ್ ಬೋರೆ ಬಟ್ಟೆ ಇಡುವೆಣ್ಣೆಚಿ. ಪ್ರಪಂಚತ್ ಅವ್ವನೇ ಇನ್ನನೆ ಮಾಡುವಲ್ಲಾಂದ್ ಆಶ್ಚರ್ಯವೂ ಆಚಿ. ಮನೆಲ್ ಪೂಂಘ, ನಾಯಿರ ಕೂಟಕ್ಕ್ ಇದೂ ಇರಡ್, ನಾಕೆನ್ನ ಓರ್‌ಚುತ್ತೆಕೂಳ್ ಕೊಡ್‌ಪಕಯ್ಯುಲೆಯಾ? ಆಚೇಂಗಿ 'ಕಾಕೆರ ಕುಂಘ ಕಾಕೆಕ್ ಬಲ್ಯದ್'ಂದೆಣ್ಣೆವನ್ನನೆ ಆಂಡವ್ವಂಗೆನ್ನಂಗ್ ಬಲ್ಯದಾಯಿಲೆ? ಇನ್ನನೆ ಗೇನ ಮಾಡಿಯಂಡಿಕ್ಕಣೆ ಲೀಲ ಕುಳಾಪ್‌ಚಿಟ್ಟಿತ್ ಉದ್ದಾನ ಬುಶ್‌ಕೋಟ್ ಇಟ್ಟಿತ್ ಕಾಕಿಯ ಬಾತ್. ಗಂಗು ಜೋರ್‌ತಕ್ಕ್ ಪರಂದಾಗೆನ್ನೋ ಲೀಲನ ಪತ್ತಿಯಂಡೇ ಒಳಾಕ್ ಪೋಚಿ. ಪಿತ್ಯಾಂದ್ ಪೇಟೆಕ್ಕ್ ಕಾಕಿಯ ಪೋಯ್. ಕ್ರಾಪ್‌ಮಾಡಿತ್ ಪುದಿಯ ಬಟ್ಟೆ ಎಲ್ಲಾ ಕೊಂಡ್‌ಬಾತ್ ಅಪ್ಪಚ್ಚು. ಓರ್ ವಾರ ಆಯಿತಿಕ್ಕು ಟಿ.ವಿನ ಕಣ್ ಮುಚ್ಚತೇ ನೋಟಿಯಂಡಳತಾನ ಕಾಟಿತ್ ವಾಣಿ ಅಮ್ಮಂಗ್ ಪಚ್ಚೆಟಿ "ನೋಟಮ್ಮ ರವಿ ಕ್ಕಣ್ಣನ ಎಚ್ಚಚಾಯಿ ಉಳ್ಳಂದ್, ಇಟ್ಟರೆ ತೊಟ್ಟರೆ ಪುಟ್ಟಿಕ್ಕ ಚೆಂದ"ದೆಣ್ಣೆವನ್ನನೆ ಕರ್ತಿತುಂಡೇಂಗಿಯೂ ಚಾಯಾಂಡಲ್ಲಂದೆಣ್ಣೆಚಿ. ಅಕ್ಕು ಇಕ್ಕ ಅದ್ ಒರೋರ್ ಚೆರಿಯ ಪಣಿಯೂ ಕೆಯ್ಯುವ ಇಂಜತ್. ಇಕ್ಕ ಎಲ್ಲಾಕೂ ರವಿಯೇ ನಾಡ ಇದ್‌ಕಂಡಿಯರಾ? ಶೂ ಪಾಲಿಶ್‌ಡ್‌ರಾ.. ಜೀಪ್‌ಲ್ ಬಾರಾ...ಇನ್ನನೆ ಆಂಗ್ ಅಳಾಪಕ್ಕೇ ಪುರುಸೊತ್ತಿಲ್ಲತನ್ನನೆ ಪಣಿ ಎಣ್ಣುವಾನ ಕಂಡಿತ್ ಒಮ್ಮೆ ಅಪ್ಪಚ್ಚು ರೇಗಿತಿಂತ್. "ಅದ್ ತೆಳಾಚಂಡ್ ಮಾಡುವಾಂದ್ ನಿಂಗೆನ್ನ ಅದ್ ಮಿಶನ್‌ಂದ್ ಗೇನ ಮಾಡಿರಾಂದ್", ಇನ್ನನೆ ಮನೆ ಮೋಂವಂಡನ್ನನೆ ಉಳ್ಳಕ್‌ಣ್ಣ ಇಕ್ಕ ಕುಂಘಿರ ಕೂಡೆ ವಾಣಿರಲ್ಲಿಕೂ ಪಾರ್ಸಲಾಚಿ. ಆಂಗ್ ಪುದಿಯ ಜಾಗ ಕುಂಘಿಂದ್ ಕುಶಿಯೋ ಕುಶಿ. ಆಡಿಪಾಡಿ

ಕುಂಞಾಕ್ ಓರ್ ವಯಸ್ಸು ಆಚಿ. ಗೌಜಿಲ್ ಬರ್ತಾಡೇ ಮಾಞತ್ ಅಪ್ಪಚ್ಚು ಗಂಗು ಮಡಿಕೇರಿಕ್ ವಾಪಸ್ಪಾಚಿ. ವಾಣಿ, ವಸಂತ್, ಕುಂಞಾಂದ್ ಚಿಕ್ಕ ಸಂಸಾರ ಚೊಕ್ಕ ಸಂಸಾರಂದೆಣ್ಣು ವನ್ನನೆ ಚಾಯಿತೇ ಇಂಜತ್. ಮೂಂದನೇ ಬರ್ತಾಡೇ ಆನದು ಇಗ್ಗು ತಪ್ಪಂಡಲ್ಲಿಕ್ ಪೋಯ್ತಾ ಅಕ್ಷರ ತಿದ್ದ್ ಚಿಟ್ಟತ್. ಅಭಿಲಾಷ್ ಬೆರಿಯ A,B,C,D,ಪಡ್ ಚತ್. ಇವನ ಎಲ್ಲಿ ಸ್ಕೂಲ್ ಕ್ಯಾ ಕೂಟುವೋಂದ್ ಇಕ್ ಪೀಕಲಾಟ ಶುರುವಾಚಿ. ಮನೆಂಚೇ ಎಲ್ಲಿಕೇಂಗಿ ಅಯಿಪಕ್ಕೂ ಕಯ್ಯಲೆ. ಇಚ್ಚೆ ಚೆರಿಯಾನ ಹಾಸ್ಪಲ್ ಕ್ಯಾ ಎನ್ನನೆ ಬುಡುವೋಂದ್ ಕಡೆಕ್ ಓರ್ ತೀರ್ಮಾನಕ್ ಬಂತಿಂತ್.

ಬೆಂಗಳೂರ್ ಫ್ಲಾಟ್ ಎಡ್ ತಂಡ್ ಅಲ್ಲಿ ಇಂಜಂಡ್ ಕುಂಞಾನ ಸ್ಕೂಲ್ ಕ್ಯಾ ಅಯಿಪಂದ್, ಬಂತ ಪಿಂಞ ಓರ್ ಮನೆನೋ ಕೆಟ್ವಾಚಿಟ್ಟಿತ್ ಅದಲ್ ಚಾಯೋಡೆ ವಾಸ ಇಂಜಡ್ ಪುಕ ಆನ ಕೇತರೆ ಇದಿಚ್ಚಕ್. ಬಂದ ಕಾಲವೇ ಪಕ್ಕುತುಳ್ಳ "ಪ್ಲೇಹೋಂಕ್" ಅಯಿ ಕನಾಂದೆಣ್ಣು ವಕ ಮನೆಲ್ ಅಡಿಗಕ್ ಪೊಣ್ಣಾಳುಂಡ್ ಕಳಿಪಕ್ ರವಿ ಕಣ್ಣ ಉಂಡ್ ನಾಕೆನ್ನ ಅವಂಡ ತೊಂದರೆ ಒಂದೂ ಇಲ್ಲೆಲ್ಲಾ. ಇದೇ ಅಯಿಂಗಳಕ್ ಕಳಿಪ ತೆಳಿಪವಯಸ್ಸು ಬಪ್ಪಕಾಲತ್ಂಚಿ ಸ್ಕೂಲ್ ಕ್ಯಾ ಕೂಟೊನ ಪಿಂಞ ಉಂಡೇ ಉಂಡಲ್ಲ ಓದುವ. ಎಳೊದುವಂದ್ ವಸಂತ್ ರ ಬಾಯಿ ಮುಚ್ಚಿ ಚಿಟ್ಟಿತಿಂತ್. ಮಧ್ಯಮಧ್ಯ ವಸಂತ್ ಕುಟ್ಟಕ್ ಪೋಯ್ತಾ ಬಪ್ಪಂತ್ ನಲ್ಲ ರೈಟರ್ ಇಂಜಾಂಗ್ ಅವಂಗ್ ಕಷ್ಟ ಆಪಂಜಿಲೆ. ಎಡೆಲ್ ನಲ್ಲ ಕಂಪೆನಿಲ್ ಕೆಲಸ ಕೆಟ್ವಾನಾಂಗ್ ಅದ್ಂಗೆ ಕೂಡಿತಿಂಜತ್ ವಸಂತ್.

ಅಭಿಲಾಷ್ ಚತ್ತಿತ್ ದಂಡ್ ಕಾಲ ಆಯಿತಿಂತೆಂಗಿಯೂ ಕಾಲ ಉರ್ಂಡಿತಿಂತ್ ಆಚೇಂಗಿ ವಿಷಯ ಮರಂದಿತಿಂಜ್ಲೆ. ವಾಣಿ ಚಾಯಾಯಿತಿಂಜ್ಲೆ. ಉಂಬ ವರುವ ಅವಡ ಇಷ್ಟ ಪ್ರಕಾರ ಎಕ್ಕೇಂಗಿ ಮಾಡುವಂತ್. ಚೆರಿಯ ವಿಷಯಕ್ಕೂ ಚೆಡಿ ಬಂದ್ರುವ, ಮುಂಡತೆ ಮೊರಡುವ

ಇನ್ನತದ್ ಮಾಮೂಲಾಯಿತಿಂತ್.

ಡಾಕ್ಟರ್ ಸಲಹೆಪೋಲೆ ಅಭಿಲಾಷ್ ಜಾಗಕ್ಕು ಬೋರೆ ಕುಂಞಿ ಬಾತೇಂಗಿ ಮಾತ್ರ ಅವಚಾಯಾಪಂದ್ ಎಣ್ಣೊನದ್ ವಸಂತ್ ಮಂಡೆ ತಿಂಬಕೂಡ್ಚಿ. ಸುತ್ತಿ ಬಳಸಿ ಒಮ್ಮೆ ವಿಷಯ ಎಣ್ಣೊನಾಂಗ್ ಎನ್ನಂಗ್ ನಂಗ ದತ್ತ್ ಎಡ್ತವೊ ನಂಗಕ್ಕೇ ಇಂಞೋರ್ ಕುಂಞಿ ಆಚೇಂಗಿ ಆಚಲ್ಲಂದ್ ಬಂದ ಅವಡ ಪ್ರಶ್ನೆಕ್ಕ್ ವಸಂತ್ ಮುಂಡತಾಚಿ. "ಎನ್ನೇಂಗಿ ಮಾಡಿತ್ ನಿಗಲೇ ಅವಕ್ಕು ವಿಷಯ ಎಣ್ಣೊಂದ್ ಡಾಕ್ಟರ್‌ಕ್ಕ್ ವಹಿಸ್‌ಚಿ. "ಸರಿ ಒನ್ನಾಂದ್ ಕ್ಲಿನಿಕ್‌ಕ್ಕ್ ಕಾಕಿಯ ಬಾರಿ ನಾನೇ ಎಣ್ಣೊವಿ. ಇಕ್ಕ ಚೆನ್ನ ಶರೀರ ಎಲ್ಲೊನೋ ತಡ್‌ಪಚ್ಚಕ್ಕ್ ಚಾಯಾಯ್ತ್ "ಂದೆಣ್ಣೊಚಿ ಡಾಕ್ಟರ್.

ಜನರಲ್ ಚೆಕ್ ಅಪಕ್ಂದ್ ಡಾಕ್ಟರ್‌ಲ್ಲಿಕ್ ಬಂದದು ವಸಂತ್ ಚೆನ್ನ ಕೆಲಸ ಉಂಡ್ಂದ್ ವಾಣಿನ ಒಬ್ಬಳೇ ಬುಟ್ಟಿತ್ ಜಾಗ ಖಾಲಿ ಮಾಡ್‌ಚಿ. ವಾಣಿಕ್ಕೂ ಡಾಕ್ಟರ್‌ಕ ಕೂಡೆ ಚೆನ್ನ ತಕ್ಕು ಪರೆವಕಿಂಜಂದ್ ನಲ್ಲ ಸಂದರ್ಭ ಆಚಿ. ಚೆಕ್‌ಪ್ ಆನದು ಡಾಕ್ಟರೇ ಶುರುಮಾಡ್‌ಚಿ. "ನೋಟಿ ಮಿಸೆಸ್ ವಸಂತ್ ನಿಗ ಇಂಞಿ ಕುಂಞಿನ ಮರಂದಿತೇ ಇಲ್ಲಿಯಾ? ಅದ್ ಮರಪಂತ ವಿಷಯವೂ ಅಲ್ಲ" ಪುತ್ರ ಶೋಕ ನಿರಂತರ'ದ್ ಉಂಡಲ್ಲ. ಆಚೇಂಗಿಯೂ ನಿಗಡ ಸುತ್ತಮುತ್ತ ಉಳ್ಳಯಿನ ನೋಟಿ. ವಸಂತನ ನೋಟಿ. ಅವಂಗೂ ದುಃಖ ಉಂಡಲ್ಲ. ಜೊತೆಕ್ಕ್ ನಿಗಲೂ ಇನ್ನನೆ ಆಯಿಟಕ್ಕ ಎಂತ ಮಾಡುವಂದ್ ಗೇನ ಮಾಡಿರಾ? ಎಲ್ಲಿಯೇಂಗಿ ನಿಗಡ ಬೆಂದ್‌ಕಡ ಮಕ್ಕಳ ಕಾಕಿಯ ಬಂತ್ ಜೊತೆಲ್ ಬೆಚ್ಚೋಳಿ ಇಲ್ಲೇಂಗಿ ನಲ್ಲ ಓರ್ ಕುಂಞಿನ ದತ್ತ್ ಎಡ್‌ತೋಳಿ ಎನ್ನನೆ?.....ಗೇನಮಾಡಿತ್ ಉತ್ತರ ತಾರೀಂದೆಣ್ಣೊಚಿ ಅಲ್ಲ!... ಡಾಕ್ಟರ್ ಅಲ್ಲಿ ವಸಂತನೂ ಈ ದತ್ತರ ವಿಚಾರವೇ ಎಣ್ಣೊವಲ್ಲ!... ನಂಗಕ್ಕೆನ್ನ ವಯಸ್ಸಾಯಿಪೋಚಾ? ನಂಗಕೇ ಮಕ್ಕಪಾಲಿಯಾ...?

ನೋಟವ್ಮಾ ನೀಡ ಮಿಂಞಾತ್ತರ ಪೆರಿಗೆಲ್ ದುಂಬಾ ಕಷ್ಟ

ಅನುಭವಿಚಿಟ್ಟಿತುಳ್ಳಿಯಾ. ಸಿಸೇರಿಯನ್ ಮಾಡಂಡಿಯಾಚಿ ದೇವಡ ದಯತ್ತ್ ನಿಂಗದಂಡಾಳುರೋ ಜೀವ ಬಚಾವಾನದೇ ಬಲ್ಯದ್. ಆಂಡೆಡಲ್ ಗರ್ಭಕೋಶತ್ತ್ನೇ ಎಡ್ಕಂಡಿಯಾಚಿ. ಅದ್ ನೀಕ್ ಗೊತ್ತಿಲ್ಲೆ. ನೀನ್ ಗೊತ್ತ್ತಮಾಡುವ ಸ್ಥಿತಿಯೂ ಇಂಚ್ಲೆ. ಇಂದ್ ನೀನ್ ಕೇಪಸ್ಥಿತಿಲುಳ್ಳಾಂಗ್ ಎಣಿಯಂಡುಳ್ಳ ವಸಂತಂಗ್ ಅಕ್ಕಲೇ ಗೊತ್ತುಂಡ್. ಅವ ಮನಸ್ಸಲೇ ಬೆಚ್ಚಂಡ್ ಪೇಚಾಡಿಯಂಡುಂಡ್. ಆಂಗಾಯ್ತೇ ದತ್ತರ ವಿಚಾರ ಎಣ್ಣಿಯಂಡುಳ್ಳಂದ್ ಡಾಕ್ಟರ್ ಇಪ್ಪರ ತಿರಣೆ ವಾಣಿ ಮೇಜಿಕ್ಕ್ ಕೌಂಜಿಪೋಯಿಕತಿಂತ್. ಒಳಕ್ಕ್ ಬಂದ ವಸಂತ್ ಇದ್ನ ಕಂಡಿತ್ ಗಾಬರಿ ಆಚಿ. ಒಂದೂ ಆಯಿತಿಲ್ಲೆ. ಚಾಯಾಪಾಂದ್ ಮಂಡೆಕ್ಕ್ ನೀರ್ ತಣಿಚಿತ್ ಎಚ್ಚರ ಮಾಡ್ಚಿ. ವಸಂತ್ನ ಕಂಡದೂ ಜೋರಾಯ್ತೆ ಮೊರಡುವಕ್ಕ್ ಶುರುಮಾಡ್ಚಿ. ವಾಣಿ ಧೈರ್ಯವಡ್ತ ದೇವನಂಗಕ್ಕ್ ಅಚ್ಚಕೇ ತಂದಿಯೆ. ದಂಡ್ಕಾಲತ್ಂಜಿ ಇದ್ನ ನಾನೊಬ್ಬನೇ ಎನ್ನನೆ ಸಹಿಸಿತಿಕ್ಕುಂದ್ ಗೇನಮಾಡ್. ನೀನೇ ಸಮಾಧಾನ ಮಾಡಿಯಂಡ್ ಏದ್ ತೀರ್ಮಾನ ಎಡ್ತವಿಯೇ ಆಂಗ್ನಾನ್ ರೆಡೀಂದೆಣ್ಣಿಚಿ ವಸಂತ್.

ಅಂದೇ ಅವಳ ಓರ್ವಾರತ್ತರ ಮಟ್ಟಿಗೆ ಮಡಿಕೇರಿಲ್ ಬುಟ್ಟಿತ್ ಬಾತ್. ವಾಣಿಕ್ಕ್ ಅಲ್ಲಿಯೂ ಚಾಯಯ್ಲೆ. ಓರ್ ನಾರಾಚಿ ಅವ್ವಂಡ ಕೂಡೆ ಕಾರ್ಲಾ ಬಂದ್ಳಂಜತ್. ಚೆನ್ನ ಲವಲವಿಕೆಲ್ ಉಳ್ಳನ್ನನೆ ಕಂಡತ್ ಫಾಣಿನ ಮಾವಿನ ಚೆನ್ನ ದಿನ ಇಪ್ಪಕೆಣ್ಣಿಚಿ ವಸಂತ್. ಅದ್ಂಗೂ ಕಾಲ್ನೊಂಬಲ ಸೊಂಟನೊಂಬಲಂದ್ ಅಪ್ಪರಿಪ್ಪರ ಬಪ್ಪಪೋಪದ್ ಕಷ್ಟವೇ ಆಯಿಂತಿಂತ್.

ಓರ್ ದಿನ ಅವ್ವ ಇಪ್ಪಕೆಲೇ "ನಂಗೋರ್ ಅನಾಥಶ್ರಮಕ್ಕ್ ಪೋಯ್ತ್ ಬಕ್ಕನಾಂದೆ"ಣ್ಣಿಚಿ ವಾಣಿ. ವಸಂತ್ ಮಾವಿರ ಮೂಡ್ ನೋಟ್ಚಿ. ಸರಿ ಬೆಂಗಳೂರ್ಲಾ ಬೋಂಡಚ್ಚಕ್ ಅನಾಥಾಶ್ರಮ ಉಂಡ್ ಏದ್ ನಲ್ಲದ್ಂದ್ ಡಾಕ್ಟರ್ಕ್ ಗೊತ್ತಿಕ್ಕು ಅಯಿಂಗಳೇ ಫೋನ್ಲಾ ಕೇಕನಾಂದ್ ಮೊಬೈಲ್ ಎಡ್ತತ್. ದಂಡ್ ಡಾಕ್ಟರ್ಗಳೇ ನಡತಿಯಂಡುಳ್ಳದ್ ಚೆನ್ನ ಪರೋಲೆ ಅಲ್ಲಿಕ್

ಪೋಯಂದ್ ಸಲಹೆ ಆ ಬರಿಂಜಿ ಬಂದಾಂಗ್ ಎಲ್ಲರೂ ಪೊರಟತ್.

ಬಲ್ಯ ಕಾಪಾಂಡ್ ಮರಗಿಡ ಪೂ ತೋಟ ಎಲ್ಲಾ ಪಚ್ಚೆ ಯಾಯ್ ದೂರಕ್ಕೇ ಚಾಯಿಕಾಂಬತ್. ಮಧ್ಯತ್ ಬಲ್ಯೋರ್ ಕಟ್ಟಿದ. ಎದಿಕ್ಕೆ ಉಳ್ಳ ಬೋರ್ಡ್‌ನ ಓದಿತ್ ಒಳ್ಳೆಕ್ ಕಾಲ್‌ಟ್ಟತ್. ಅರೆವಯಸ್ಸರ ಪೊಣ್ಣೆಳುವ ಯೂನಿಫಾರಂ ಇಟ್ಟಂಡ್ ಓಡಿಕಳಿಪಂತ. ಕೆಲವು ಜನ ಗಿಡಕ್ ನೀರ್ ಬೂಕಿಯಂಡೂ, ಬಾಕಿ ಜನ ಒಡ್ಕಿಯಂಡ್ ಇಂಜತ್. ಚೆರಿಯ ಮಕ್ಕಕ್ ಕಳಿಪಕುಳ್ಳದ್ ಓರ್ ಬರಿಲ್ ಇಂಜತ್. ಅದಲ್ ತರಾವರಿ ಬಯತ್‌ರ ಮಕ್ಕ ಕಳಚಂಡಿಂಜತ್. ಕೆಲವು ಬಲ್ಯ ಮೂಡಿಯ ಪೊರಮೆ ಏದೆಲ್ಲೋ ಕೆಲಸತ್‌ಂಜಿ ಬಂದಂಡೂ ಇಂಜತ್. ಅಕ್ಕಣೆ ಓರ್ ಆಣಾಳ್ ವಸಂತರ ಪಕ್ಕ ಬಂತ ಅಯಿಂಗಡ ಆಫೀಸ್‌ಕ್ ಕಾಕಿಯ ಪೋಚಿ. ಅಲ್ಲಿ ಅಳತ ಓರ್ ಮನುಷ್ಯ ಮೇನೇಜರ್ ತಾನೇಂದ್ ಪರಿಚಯ ಎಣ್ಣೆತ್ ಬಂದ ವಿಷಯ ಕೇಟತ್.

ಇಲ್ಲಿ ಚೆರಿಯ ಬಯತ್‌ರ ಮಕ್ಕ ಅಲ್ಲತೆ ಅಬಲೆ ಪೊಣ್ಣೆಳುವಳೂ ಉಂಡ್‌ಂದೂ ಅಯಿಂಡಯಿಂಡ ವಿದ್ಯಾರ್ಹತೆರ ಮೇರೆ ಇಷ್ಟಪಟ್ಟ ಚಾಕ್ರಿಕ್ ಕೂಟಿತ್‌ಂದೂ, ಮಂಗಲವೂ ಮಾಡಿತ್ ಬುಡುವಾಂದ್ ಆ ಸಂಸ್ಥೆರ ಎಲ್ಲಾ ಕೆಲಸತ್‌ನೋ ಎಣ್ಣೆಚಿ. ದುಂಬಾ ಚೆರಿಯ ಮಕ್ಕ ಇಕ್ಕ ಬಪ್ಪದೇ ಅಪರೂಪಂದೂ, ವಸಂತರ ವಯಸ್ಸರ ಮೇರೇ ಇಲ್ಲಿ ಮಕ್ಕಳ ತಪ್ಪಾಂದೂ, ಚೆನ್ನ ದುಡ್ಡ್ ಸಂಸ್ಥೆಕ್ ತಕ್ಕಂಡಿಯ ಬಪ್ಪಾಂದೂ. ದಂಡ್ ಕಾಲಕೆತ್ತನೆ ಪ್ರತೀ ತಿಂಗ ಕುಂಞಿನ ಕಾಟಂಡುಂದೂ, ಅಂಡೊಳ್‌ಲ್ ಅದ್ ಒಗ್ಗತೇ ಪೋಚೇಂಗಿ ವಾಪಸ್ ಮಾಡಂಡೂಂದೂ ಏದೆಲ್ಲೋ ಕಾನೂನು ಕಾಯ್ದೆನ ಎಣ್ಣೆಚಿ. ಎಲ್ಲಾಂಗೂ ದಂಡ್ ದಿನ ಬುಟ್ಟಿತ್ ಬಪ್ಪಾಂದೆಣ್ಣೆತ್ ಬಾತ್.

ಬಪ್ಪಕ ಎಲ್ಲಾ ಮಕ್ಕಳೂ ಇಯಂಗಲೇ ನೋಟಿಯಂಡಿಂಜತ್. ಕೆಲವು ನಂಗಳ ಕಾಕಿಯಪೋಕುಂದೆಣ್ಣುವ ಆಸೆಲ್ ನೋಟ್‌ವನ್ನನೆ ಕಾಂಬತ್. ಒರೇ ತಕ್ಕಲ್ ಎಣ್ಣಂಡೂಂದೆಣ್ಣಕ ಒಂದಾಂಡ ಮೂಡ್‌ಲೂ ಓರ್ ನೇರಾನ ತಳಿ ಇಂಜ್‌ಲೆ.

ಮನೆಕ್ಕು ಬಂದ ಪಿಂಞ ವಾಣಿ ಅವ್ವಂಡ ಕೂಡೆ ಪರೆವದ್ ವಸಂತಕ್ಕು ಕೇಟತ್. "ಅಲ್ಲಮ್ಮ ಆ ಮಕ್ಕ ದಾಡದೋ ಎನ್ನೋ. ಆಂಡ ಅಪ್ಪ ಅಪ್ಪ ಏದ್ ಜಾತಿಯೋ, ಎಂತ ಬುದ್ಧಿಹೀನಗಳೋ, ಕಳ್ಳಗಳೋ ಎನ್ನೋ. ಮಕ್ಕಡಲ್ಲಿ ಅಯಿಂಗಡ ಚೋರೆ ಅನ್ನೆ ಉಳ್ಳ. ಅದ್ ಬಲ್ಯದಾಪಕ ತಾಂಡ ನಿಜ ಸ್ವರೂಪ ಕಾಟತಿಪ್ಪಾ ಅನ್ನತಯಿಂಗಳ ನಂಗ ಕೊಂಡ್ ಬಕ್ಕುವಾ? ನಾಕೆನ್ನಂಗೋ ಈ ದತ್ತಾಗಿತ್ತ್ ಬೋಂಡಾಂದಾಪ. ಇಪ್ಪಲಿಲಕೆತ್ತನೆ ಚಾಯಿತೆ ಉಂಡ್ ಕುಡ್ ಚಿತ್ ಚಾಪೊ. ಆಂಗೂಂಜಿ ನಂಗಡ ರವಿ ಕಾಣ್ಣ ಎಚ್ಚಕೋ ಮೇಲ್ಂದ್" ಎಣ್ಣೆ ಚಿ.

ಅಲ್ಲಿ ಉಳ್ಳದೆಲ್ಲಾ ನೀನೆಣ್ಣೆ ನನ್ನನೆ ಕಳ್ಳಂಗಡ, ಪೋಲಿಯಡ ಮಕ್ಕಳಾ. ಗರೀಬತನತ್ತಲೋ, ಸಮಾಜಕ್ಕು ಬೊತ್ತಿತೋ, ಕಾಯಿಲತ್ತ ಚತ್ತಯಿಂಗಡದೋ ಎನ್ನಂಗ್ ಆಯಿತಿಪ್ಪಕ್ಕಾಗ? ಅದ್ ಆಂಗೂಂಜಿ ನಂಗ ಚಾಕ್ ನನ್ನನೆ ಮಕ್ಕ ಬೊಳಂದ ಪರಿಸರ ಚಾಯುಂಡೇಂಗಿ ಎಂತವನೂ ಬದಲಾಪ. ನಲ್ಲ ಅಪ್ಪವ್ವಂಡ ಮಕ್ಕಳೇ ಬೋಂಡತ ಕೇತರೆ ಮಾಡುಲಿಯಾ? ಕಳ್ಳಂಗಳಾಪಾಲಿಯಾ, ಪೋಲಿಂದ್ ಕೇಳಿಕೇಪಾಲಿಯಾ? ಒರೇ ಅವ್ವಂಡ ದಂಡ್ ಗಿಳಿ ಕುಂಞಿಯಳ ಓರ್ ಸನ್ಯಾಸಿ, ಓರ್ ಬೇಡ ಚಾಕ್ ನಲ್ಲಿ ಸನ್ಯಾಸಿರಗಿಳಿ, ಬಾರಿ ಅಳೆರೀಂದ್ ಸತ್ಕಾರ ಮಾಡುವದೂ, ಬೇಡಂಡದ್ ಬಡಿ, ಪುಡಿ, ಕೊಲ್ಲ್ಂದ್ ಎಣ್ಣೆವದೂ ಕಥೆಲ್ ಕೇಟಿತಿಲ್ಲಿಯಾ? ಅನ್ನನೆ ನಂಗ ಚಾಯಿಲ್ ಚಾಕಿತ್ ಬುದ್ಧಿ ಪಡ್ ಪ್ ಚಿಟ್ಟಕ ನಲ್ಲದೇ ಆಕುಂದ್ ಗಂಗೂ ಓರ್ ಚೆರಿಯ ಭಾಷಣವೇ ಬಿಗಿದತ್.

ನೀಕ್ ಒಟ್ಟಾರೆ ಇಷ್ಟು ಇಲ್ಲೆಂದೆಣ್ಣೆ. ಬೋಂಡತ ಪೋಚೇಂಗಿ ಬೋಂಡ ಬುಡ್ಂದ್ ಮಧ್ಯಕ್ಕು ಬಂದ ವಸಂತ್ ಪೂರ್ಣವಿರಾಮ ಇಟ್ಟತ್. ಪಿತ್ಯಾಂದ್ ಗಂಗು ಬಯ್ಯಕ್ ಪೋಪ ಮೊಳಿ ಇಟ್ಟತ್. ವಾಣಿ ಒಂದೂ ಎಣ್ಣೆಲೆ. ವಸಂತ್ ಬುಟ್ಟಿತ್ ಬಾತ್.

ಎಕ್ಕಲೂ ಮಂಕಾಯಿತಿಪ್ಪ ವಸಂತನ ಅವಂಡ ಕೂಟ್ಕಾರ ಕಾರ್ಯಪ್ಪ ನೋಟಿಯಂಡೇ ಇಂಜತ್. ಒನ್ನಾಂದ್ ಕೇಂಟಿನ್ಲ್ ಧೈರ್ಯಮಾಡಿತ್ ಕೇಟತ್.

"ನಿಂಗ ಅಂದ್ ಪೋನದ್ ಎನ್ನಾಚಿ ವಸಂತ್?" " ಅಯ್ಯೋ ವಾಣಿಕ್ಕ್ ಒಂದೂ ಸರಿ ಆಯಿಲೆ. ಅವಡ ಅಭಿಪ್ರಾಯತ್ ದತ್ತ್ ಎಡ್ತವಕ್ಕೇ ಇಷ್ಟ್ ಇಲ್ಲೆ. ಮನೆಲ್ ನೆಮ್ಮದಿಯೂ ಇಲ್ಲೆ. ನಾಕಂತೂ ಒಂದೂ ಗೊತ್ತಾಪ್ಲೆಪ್ಪಾ"ಂದ್ ಎಣ್ಣಾಚಿ.

ಅವಕ್ಕ್ ಅಲ್ಯತ್ತರ ವಾತಾವರಣತ್ ಸರಿಕಂಡಿತಿಪ್ಪಕ್ಕಿಲ್ಲೆ. ನಾಕ್ ಗೊತ್ತುಳ್ಳನ್ನನೆ ಕೆಲವು ಚರ್ಚಲ್ ಮಕ್ಕ ಇಪ್ಪ. ಅಯಿಂಗಳೇ ಚಾಕಿಯಂಡಿಪ್ಪ. ಅಯಿಂಗಳ ಅಪ್ಪವ್ವನೋ ಅಯಿಂಗಳ್ ಗೊತ್ತಿಪ್ಪ. ಅಲ್ಲಿ ಪೋಯ್ತ ಕೇಟಚೇಂಗಾಕು. ಚರ್ಚಕಾರಳೂ ಅನ್ನನೆ ಕೊಡ್ಪಕ್ಕ್ ಆಂಜಿ ಅರಚಿತ್ತೇ ಒತ್ತವೋ. ನಿಂಗಡ ಅದೃಷ್ಟತ್ ಕೊಟ್ಟಾಚೇಂಗಿಯೂ ಕೊಟ್ಟು. ನಾನ್ ಅಡ್ರೆಸ್ಸೆತ್ತಪ್ಪಿ ಜೊತೆಲ್ ನಾನೂ ಬಪ್ಪಿ ಪೋಕನಾ"ಂದೆಣ್ಣಾಚಿ

ಪಿತ್ಯಾಂದ್ ನಾರಾಚಿ ಆನಾಂಗ್ ಕಾರ್ಯಪ್ಪ ಅಂದೇ ಪೋಕನಾಂದೆಣ್ಣೆತ್ ನಿಗದಿ ಮಾಡ್ಚಿ. ಇಂದ್ ವಾಣಿ ಬೋಂಡ ನಂಗ ದಂಡಾಳೇ ಪೋಕನ. ನಂಗಕ್ಕ್ ಸರಿ ಕಂಡತೇಂಗಿ ಪಿಂಞ ಒನ್ನಾಂದ್ ಕೂಟ್ಟಪೋಕನಾಂದೆಣ್ಣಾಚಿ ವಸಂತ್. ಎಂತದೋ ಆಫೀಸ್ ಕೆಲಸ ಉಂಡ್ಂದ್ ವಾಣಿ ಕೆಣ್ಣೆತ್ ವಸಂತ್ ಪೊರಟತ್.

ಚರ್ಚರ ಪೊರಮೆ ಫಾದರ್ ಜೋಬ್ಕ್ ಕೈ ಇಟ್ಟಂಡ್ ಎತ್ತಟಿಯೋ ನೋಟಿಯಂಡಿಂಜತ್. ನಾಲಂಜಿ ಚೆರಿಯ ಮಕ್ಕ ಕಳಚಂಡಿಂಜತ್. ಕಾರ್ಯಪ್ಪಂಗ್ ಫಾದರ್ನ ಪರಿಚಯ ಇಂಜಾಂಗ್ "ಹಲೋ ಫಾದರ್"ಂದ್ ಎಣ್ಣುವಕ ಇಪ್ಪರ ತಿರಚಿ ಮನುಷ್ಯ. ಉದ್ದ ಬೊಳಾತ ಗೌನ್ಲಾ ದೃಢವಾನ ನಲ್ಲ ಆಳ್ ಫಾದರ್. ಆ ಪದವಿಕ್ಕ್ ಎಣ್ಣೆಮಾಡ್ನನ್ನನೆ ಇಂಜತ್. ಮೂಡಲ್ ಓರ್ ಕಾಂತಿ ಮಿನ್ನುವಂತ್. ವಸಂತರ ಕೈಯೂ ಮೇಲೆ ನೇಂದತ್. ಅಪ್ಪರಿಪ್ಪರ ಪರಿಚಯ ಆನದು ಫಾದರ್ ಅಲ್ಲಿಯೇ ಲಾನ್ಲಾ ಬೆಚ್ಚಿತಿಂಜ ಕುರ್ಚಿಕತ್ತಟಿ ಕೈಕಾಟ್ಚಿ. ಮೂಂದಾಳೂ ಅಳಾತತ್. ನಾಲಂಜಿ ತಕ್ಕ್ ಪರಂದಿತಾಪಕ ಓರ್ ಕೊಣ್ಣು ಕುಡಿಪಕ್ಕ್ ಜ್ಯೂಸ್ ಎಡ್ತ ಬಾತ್. ಇಯಂಗಳಕ್ಕ್ ಕುಡಿಪಕ್ಕಾಯಿತಿಂಜಾಂಗ್ ಉಪಚಾರ ಮಾಡ್ಚೊಟ್ಟಿವತೇ ಗ್ಲಾಸ್ ಖಾಲಿ

ಮಾಡ್‌ಚಿ. ಚರ್ಚೆರ ಕೆಲಸ ಇಂಚು ಆಪಕುಳ್ಳದ್ ಎಲ್ಲಾ ಪರೆಂದ ಪಿಂಚಾ ಗೊತ್ತಾಚಿ ವಸಂತಕ್ಕ್ ಕಾರ್ಯಪ್ಪ ಅಪ್ಪಂಡ ಪೆದತ್ತ್ ಚರ್ಚೆಕ್ಕ್ ಚೆನ್ನ ಪಣ ಸಹಾಯಮಾಡಿತ್‌ಂದ್. ಇದೇ ಇಚ್ಚೆಕ್ಕ್ ದೋಸ್ತಿಕ್ಕ್ ಕಾರಣವಾಂದಾಚಿ ವಸಂತಕ್ಕ್. ಮೆಲ್ಲೆ ಎಣ್ಣೆಚಿ ಕಾರ್ಯಪ್ಪ ಇಂದ್ ವಿಷಯ ಬೋಂಡ ನಾಳೇ ಮತ್ಯಂದ್ ಬಕ್ಕನ ಅಕ್ಕ ಪರೆಯಲೊಂದ್. ಸರಿ ಎಲ್ಲಾಂಗೂಡಿ ವಾಪಾಸ್ ಬಾತ್.

ಬಟ್ಟೆಲ್ ಕಾರ್ಯಪ್ಪ ವಸಂತಾನ್ ಕೇಟತ್ ಅಲ್ಲಿ ಚೆನ್ನ ಮಕ್ಕ ಕಳಚಂಡಿಂಜಂತಲ್ಲಾ ಅದ್ ಫಾದರ್ ಚಾಕ್‌ನದ್. ಅಯಿಂಗಡ ಖರ್ಚೆಕ್ಕ್ ಪಣ ಸಹಾಯ ಕೇಟವ. ಅದೊಂಚೇ ಒಂದಾನ ಕೇಕನಾ. ನಾಳೆ ನಾನೊಬ್ಬನೇ ಪೋಯಿತ್ ನಾಡ ವಿಚಾರ ಎಣ್ಣೆವಿ. ಫಾದರ್ ಎನ್ನಣ್ಣುವಾ ನೋಟನಾ. ತಪ್ಪಂತ ಮಕ್ಕ ಉಂಡಾಂದ್ ಗೊತ್ತಾಪಾಂದ್ ಎಣ್ಣೆಚಿ.

ವಸಂತಂಗ್ ಒಂದೂ ಬೋಂಡ. ಎನ್ನಂಗ್ ಮಂಡೆಕ್ಕ್ ಬಲೆಚಿತ್‌ಟ್ಟಿವೋ. ಅವ ಚಾಯಾಪ ಮಾದರಿ ಕಾಂಬಾಲೆ. ದೇವಡ ಮೇಲೆ ಭಾರ ಇಟ್ಟಿತ್ ಮುಂಡತಿಪ್ಪಕ್ಕ್ ನೋಟಾಚಿ. ಪೊರಮೆ ಆಫೀಸಾಲಿಪ್ಪಕ್ಕ್ ಗೊತ್ತಾಪಂಜಿಲೆ. ಮನೆಕೆತ್ತುವಕ್ಕ್ ಓರ್ ಮೂಲೆಲ್ ಅಳಾತಂಡ್ ಕಿಟಕಿಕ್ಕಾಲೆ ಎತ್ತಟಿಯೋ ನೋಟಿ ತಳಾತ ವಾಣಿ, ಅವ್ವ ಕಾಫಿ ಕುಡ್‌ಚಿತಿಲ್ಲೆ. ಉಂಡಿತಿಲ್ಲೆ ಮೊರಡುವಂದೆಲ್ಲ ರವಿ ಕೊಣ್ಣಂಡ ಪುಕಾರ ಕೇಟಿತ್ ಅವಂಗೂ ಬೇಜಾರಾಪಂತ್. ವಾಣಿನ ನೋಣೆಮಾಡಿತ್ ಎಂತೇಂಗಿ ತಿಂಬೆಚಿಟ್ಟಿತ್ ತಾನ್ ಚೋತಿತುಂಡೇಂಗಿಯೂ ಅವಳ ಕಾಕಿಯಂಡ್ ಓರ್ ರಾಂಡ್ ಬಪ್ಪಂತ್. ಅಕ್ಕಕ್ಕೊಮ್ಮೆ ಚೆನ್ನ ತೆಳಿ ಮೂಡ್ ಕಾಂಬತ್ ವಾಣಿರ.

ಬೈಟ್ ಪತ್ತಾಗಂಟೆ ಆಯಿತಿಂತ್. ಆಫೀಸ್ ಫೈಲ್‌ರೊಳಾಲ್ ಮುಳಿಪೋನ ವಸಂತಾನ್ ಅಲ್ಲಿಯೇ ಅಳಾತಿಂಜ ವಾಣಿ"ನಿಂಗಡ ಪುಂಡ್ ಕಾರ್ಯಪ್ಪ ಪೋನ್ ಮಾಡಿತಿಂತ್ ನಿಂಗ ಕುಳಚಂಡಿಚಿರಲ್ಲ ಅಕ್ಕ. ಈ ನಾರಾಚೆ ಎಲ್ಲಿಯೋ ಚರ್ಚೆಕ್ಕ್ ಪೋಪಕ್ಕ್ ಬಪ್ಪಲೋ ರೆಡಿ ಆಯಿತಿಪ್ಪಕೆಣ್ಣೆಚಿ. "ಓ ಅವ ಪೋನ್ ಮಾಡಿತಿಂತಾ. ಅದೇ ಅಲ್ಲಿ ಮಕ್ಕ ಇಪ್ಪಲೋ ನೋಟಿತ್ ಬಕ್ಕನಾಂದ್. ನೀನೂ

ಬಾ ಪೋಕನಾಂದೆಣ್ಣ್ ಚಿ.

ನಾರಾಚೆ ಚೆನ್ನ ಚೂಟಿಯಾಯ್ತಿ ಕಂಡತ್ ವಾಣೆನ. ವಸಂತಂಗ್ ಪೋಪ ವಿಚಾರತ್ತನ ಅವಳೇ ಗೇನ ಬಪ್ಪಚಿಟ್ಟಿತ್. ಚೆನ್ನ ಮನಸುಳ್ಳನ್ನೆನೆ ಕಾಂಬಾಂದಾಚಿ ವಸಂತಕ್ಕ್. ಎಣ್ಣನೇರಕ್ಕ್ ಸರಿಯಾಯ್ತ್ ಕಾರ್ಯಪ್ಪನೂ ಬಾತ್. ಎಲ್ಲರೂ ಚಚ್ಚಕ್ಕ್ ಎತ್ತ್ ಚಿ. ಫಾದರ್ ಕ್ ಇಯಂಗ ಬಂದ ವರ್ತಮಾನ ಎತ್ತ್ ಚಿ. ಏಸು, ಮೇರಿರ ಮೂತಿನ ನೋಟಿತ್ ಫಾದರ್ ರ ಮನೆಕ್ಕ್ ಬಾತ್. ಓರ್ ಬ್ರದರೂ ಫಾದರ್ ಕೂಡೆ ಇಂಜತ್. ವಾಣೆನ ಮಾತ್ರ ಪರಿಚಯ ಆಂಡಿಜಿಯ. ಬಾಕಿ ವಸಂತ ಕಾರ್ಯಪ್ಪ ಮಿಂಞಾಲೇ ಕಂಡಿಂಜಾಂಗ್ ಫಾದರ್ ವಾಣೆರ ಕೂಡೆ ಚೆನ್ನ ಉಪದೇಶಕ್ಕ್ ಳ್ಂಜತ್.

ನಿಂಗಡ ವಿಚಾರ ಎಲ್ಲಾ ಕಾರ್ಯಪ್ಪ ಎಣ್ಣ್ ಚಿ. ನಿಂಗಳೂ ಬುದ್ಧಿವಂತಗಳೇ ಆಚೇಂಗಿಯೂ ಆದ್ಯಾತ್ಮ ರೀತಿಲ್ ಎಣ್ಣ್ ಚೇಂಗಿ ಇದೆಲ್ಲಾ ದೇವಡ ನಾಟಕ. ಬೋಂಡುದೇಣ್ಣವವಂಗ್ ಕೊಡ್ ಪ್ಪಾಲೆ. ಬೋಂಡಾಂದೆಣ್ಣವವಂಗ್ ಬಾತಿ ಕೊಡ್ ಪ. ದೇವ ಎಂತಾನ ನಂಗಕ್ ತಪ್ಪೋ ಅದ್ ನ ಸ್ವೀಕರ್ ಚಿಟ್ಟಿಂಡ್ ತೃಪ್ತಿಲ್ ಇಪ್ಪವನೇ ಸುಖಿ. ಇದ್ ಎಣ್ಣವಚ್ಚಕ್ ಆಚಾರತ್ ಸುಲಭ ಅಲ್ಲ, ಪ್ರಪಂಚತುಳ್ಳ ಮಕ್ಕಳೆಲ್ಲಾ ನಂಗಡಾಂದ್ ಅರಿವಂಡು. ಸ್ವಂತ ಮಕ್ಕಳ ಪ್ರೀತ್ ಚಿಡುವ. ಚಾಕುವ, ವಾತ್ಸಲ್ಯ ಕಾಟುವದ್ ಬಲ್ಯ ಸಂಗತಿ ಅಲ್ಲ. ಅದ್ ಅಯಿಂಗಡ ಕರ್ತವ್ಯ ಮಾಡಿತ್ತೇ ಮಾಡಂಡು. ಆಚೇಂಗಿ ಬೋರೆಮಕ್ಕಳ ಪ್ರೀತ್ ಚಿಡುವದ್ ಬಲ್ಯ ವಿಷಯ. ಇದ್ ಎಲ್ಲಾಕೂ ಕಯ್ಯಲೆ. ಮನುಷ್ಯ ಮನುಷ್ಯನ ಪ್ರೀತ್ ಚಿಡತವು ಪ್ರಾಣಿ, ಪಕ್ಷಿಯಳ, ಪರಿಸರತ್ತನ ಗಿಡಮರ ಇಂತಾನೆಲ್ಲಾ ನೇರಾಯ್ತು ಪ್ರೀತಿಚುಡುಲೆ. ನಿಂಗಕ್ ಓರ್ ಕುಂಞಿನ ತಂದಿತ್ ದೇವ ಬಯ್ಯಕೇ ಕಾಕಿಯಂಡತ್. ಆಂಗಾಯ್ತ್ ಜೀವಮಾನ ಎಲ್ಲಾ ಕೊರಗಿಯಂಡೇ ಅಳ್ ಪಾಲ್ ಅರ್ಥ ಇಲ್ಲೆ. ನಿಂಗಡ ಸುತ್ತ ಉಳ್ಳವು ಬೇಜಾರ್ ಮಾಡುಲಿಯಾ. ನಿಂಗಡ ವಡಿಯಂಗೂ ನಿಂಗಡಚ್ಚಕ್ಕೇ ವ್ಯಸನ ಇಲ್ಲಿಯಾ? ಒಂದಾನ ಮರಕ್ಕಂಡುವೇಂಗಿ ಆ ಜಾಗಕ್ಕ್ ಇಂಞೊಂದ್ ಬಕ್ಕಂಡು.

ಮಿಂಚು ನಿಂಗಡ ಮನಸ್ಸು ಈಂಗೆ ತಯಾರಾಂಡು. ಅಂದಕ ಮಾತ್ರ ಮನಸ್ಸುಕ್ಕ್ ನೆಮ್ಮದಿ ನಾಡಲ್ಲಿ ಮೂಂದ್ ಮಕ್ಕ ಉಂಡ್. ಅಯಿಂಗಕ್ ಅಪ್ಪ ಅಮ್ಮ ಎಲ್ಲಾ ನಾನೇ. ಇಚ್ಚಕ್ ಕೆಲಸತ್ತರ ಮಧ್ಯವೂ ನಾನಾ ಅಯಿಂಗಡ ಕೂಡೆ ಕಳಿಪಿ. ತೆಳಿಪ್ಪಿ. ಅಲ್ಲಿ ಕ್ಕಟ್ಟುವ ಆನಂದ ನಾಕ್ ಎಲ್ಲಿಯೂ ಕ್ಕಟ್ಟುಲೆ. ಅವೂ ನಾಡ ಕೂಡೆ ಅನ್ನನೇ ಉಂಡ್. ಓರ್ ದಿವಸವೂ ನಾನಯಿಂಗಳ ಬುಟ್ಟಿತಿಂಜವನಲ್ಲ. ಅದೋ ಅಲ್ಲಿನೋಟಿ ಕಳಚಂಡುಂಡಲ್ಲ ಆ ಮೂಂದ್ ಮಕ್ಕಾಂದ್ "ಕಳಿಚಂಡಿಂಜ ದಂಡ್ ಕ್ಕಣ್ಣ ಮಕ್ಕ ಪಿಂಚ ಒಂದು ಮೂಡಿಕುಂಚಿನ ಕಾಟ್ಚಿ.

ಅಕ್ಕಣೆ ವಸಂತನೂ ಕಾರ್ಯಪ್ಪನೂ ತಿರ್ಗಾಡಿಯಂಡ್ ಮಕ್ಕಳಿಪಲ್ಲಿ ನಿಂದಿತಿಂತ್. ಬಾರಿ ನಂಗಳೂ ಅಲ್ಲಿಕ್ ಪೋಕನಾಂದ್ ಫಾದರ್ ವಾಣಿನ ಅಲ್ಲಿಕ್ ಕಾಕಿಯಪೋಚಿ. ಕ್ಕಣ್ಣಂಕಿಂಜ ಮೂಡಿ ಕುಂಚ ಚೂಟಿಯಾಯ್ತಿಂತ್. ದಂಡರೆ ವಯಸಿಕ್ಕೂ ಚಾಯಿಕರ್ತಿಯೂ, ಮುದ್ದಾಯ್ತ್ ಇಂಜತ್.

ಶಾಂತಿಕ್ಕ್ ಎಣ್ಣೆ ಮಾಡ್ ನನ್ನನೆ ಇಂಜತ್ ಆ ವಾತಾವರಣ. ನಿಂಗಕ್ಕ್ ಇಲ್ಲಿ ಮನಸ್ಸುಕ್ಕ್ ಶಾಂತಿ ಕ್ಕಟ್ಟುವೇಂಗಿ ಬಂದಂಡಿರಡ್ಂದ್ ಫಾದರ್ ಎಣ್ಣೆಚಿ. ದಾರೋ ಕಾಂಬಕ್ ಬಂದಯಿಂಗಡ ಕೂಡೆತಕ್ಕ್ ಪರಿವಕ್ ಫಾದರ್ ಎದ್ದತ್. ನಂಗಳೂ ಬಪ್ಪಾಂದೆಣ್ಣೆತ್ ಕಾರ್ಕತ್ತಟಿ ಬಾತ್. ಕಾರ್ಯಪ್ಪಂಡ ಮನೆ ಅಲ್ಲಿಯೋ ಪಕ್ಕ ಇಂಜಾಂಗ್ ಅವನ ಡ್ರಾಪ್ ಮಾಡಿತ್ ಓರೂ ತಕ್ಕಿಲ್ಲತೆ ಮನೆಕೆತ್ತಚಿ.

ಉಂಬಕಳತಲ್ಲಿ ವಾಣಿ" ಅ ಫಾದರ್ ಎಚ್ಚಕ್ ನಲ್ಲವನಲ್ಲ. ಅವಂಡ ತಕ್ಕ್ ಜೀಸಸ್ ಪರಂದನ್ನನೆ ಆಚಿ ನಾಕ್. ನಂಗಳ್ ಓರ್ ಕುಂಚಿನೇ ಚಾಕುವಕ್ ಕಷ್ಟ. ಅಂತಲ್ಲಿ ಮೂಂದ್ ಮಕ್ಕಳ ಚಾಕಿಯಂಡುಂಡಲ್ಲ! ಆ ಮೂಡಿಕುಂಚಿ ದುಂಬಾ ಚಾಯುಂಡಲ್ಲ ನಂಗಳ್ ತಕ್ಕುವಾಂದ್" ಕೇಪಕೆಣ್ಣಾ ಕಾರ್ಯಪ್ಪಂಗ್"ಂದೆಣ್ಣೆಚಿ. ಉಂಬಾನ ಬುಟ್ಟಿತ್ ಅವಳೇ ನೋಟ್ಚಿ ವಸಂತ್. ನೇರಾಯ್ತು ಇವ ಬದಲಾಚಾ. ಅಲ್ಲ ನಾಡ ಭ್ರಮೆಯಾಂದಾಚಿ. ಅವಡ ಬಾಯಿಂಜೇ ವಿಷಯ ಬರಂಡೂಂದ್ ಫಾದರ್ ಎಣ್ಣೆತಿಂತ್. ಆಂಗನ್ನ ಎಣ್ಣೆ ನಾಂದ್ ಎದ್ದತ್ ವಸಂತ್.

ಸಮಯ ಕೊಟ್ಟುಕೊಳ್ಳುತ್ತಾ ಚರ್ಚೆರ ವಿಚಾರ ಮದ್ಯಕ್ಕೆ ಬಪ್ಪಂತೆ.

ನಾರಾಚೆ ಎಕ್ಕೆ ಬಪ್ಪಂದ್ ಪಾರಕಾತತ್ ವಾಣಿ. ದುಂಬಾ ದೂರಾಂದಾಚಿ. ಪೋನ್ ಮಾಡನಾಂದೆಣ್ಣಾನಾಂಗ್ ಬೋಂಡ ಕಾರ್ಯಪ್ಪಂಗ್ ಬೇಜಾರಾಕು. ಮತ್ಯಾದನ್ನೆ ನಾರಾಚೆಂದ್ ತಡ್ತತ್ ವಸಂತ್ ಎಂತೋ ಮಂತ್ರ ಮಾಡ್ನನ್ನನೆ ಆ ಕುಂಞಿ ವಾಣಿನ ಬಲ್ಚಂಡಿಂಜತ್.

ಆ ನಾರಾಚೆ ಬೋಂಡಾಂದೂ ಫಾದರೇ ಓರ್ ದಿನತ್ತನ ಗೊತ್ತೆ ಮಾಡಿತ್ ಅರಿಚಿಡುವಾಂದೂ ಕಾರ್ಯಪ್ಪ ಎಣ್ಣಾನದ್ ವಾಣಿಕ್ಕ್ ಬೇಜಾರಾಚಿ. ಆ ಕುಂಞಿನ ನಂಗಕ್ಕೆ ತಪ್ಪಕುಳ್ಳಾಂಗೇ ಈ ಏರ್ಪಾಡ್ಂದ್ ಅರಂಜ ಪಿಂಞ ಸಂಭ್ರಮ ಜಾಸ್ತಿ ಆಚಿ.

ಮಧ್ಯೆ ಚರ್ಚೆಕ್ಕ್ ಕಾರ್ಯಪ್ಪನೂ ವಸಂತನೂ ಪೋಯ್ತ್ ಕೆಲವು ಮುಖ್ಯಸ್ಥಂಗಡ ಕೂಡೆ ತಕ್ಕ್ ಪರಂದಿತ್ ಕೆಲವು ವಿಧಿ ವಿಧಾನತ್ತನ ಎಣ್ಣೆತ್ತೆ ಕೆಲವು ಕಾಗದ ಪತ್ರ ರೆಡಿ ಮಾಡಿತ್ ಬಾತ್.

ಆ ದಿನ ಬಾತೇ ಬಾತ್. ಎಲ್ಲರೂ ಚರ್ಚೆಕ್ಕ್ ಬಾತ್. ಇಯಂಗ ಕಾರ್ನ ಪಾರ್ಕ್ ಮಾಡಿತ್ ಇಳೊಂಜಂಡಿಂಜನ್ನೇ ಫಾದರ್ ಕೈಪುಡ್ಚೆಂಡ್ ಬೊಳತ ಫ್ರಾಕ್ಟ್ ಆ ಮೂಡಿ ಕುಂಞಿ ಪಾರಿಯಂಡ್ ತುಳ್ಳಿ ಯಂಡ್ ಬಂದಡಿಂಜಾಂಡ ಕೆಮಿಲ್ ಎಂತಾನೋ ಫಾದರ್ ಎಣ್ಣಾವದೇ ಓ... ಮಮ್ಮಿ... ಡ್ಯಾಡೀ ನಾನೆಚ್ಚಕ್ ದಿನತ್ತೆಚಿ ನಿಂಗಳ ಪಾರಕಾಪೊ. ನಿಂಗ ಇಂದ್ ಬಪ್ಪಿರಾಂದ್ ಫಾದರ್ ಎಣ್ಣೆಚಿಂದ್ ಓಡಿಬಂತ ವಾಣಿನ ತಬ್ಬಿಯಂಡ್. ವಾಣಿಕ್ಕ್ ಒಂದೂ ಅರ್ಥ ಆಯಿಲೆ. ವಸಂತ್ ಕಣ್ಣೆಸನ್ನೆ ಮಾಡ್ನಾಂಗ್ ಮುಂಡತಾಚಿ. ವಾಣಿರ ತಾಯ್ತನ ಒಮ್ಮಲೇ ಚಿಮ್ಮನನ್ನಾಚಿ. ಬಾತಿತಬ್ಬಿಯಂಡ್ ತಾಂಡ ಅಭಿಲಾಷೇ ಬಂದ್ ರಾತ್ಂದ್ ಕುಂಞಿನ ಮುತ್ತಂಡ್ ಮೊರಡುವ ಕೂಡ್ಚಿ. ವಸಂತ್ ಬೆರಿಯ ಹುಶಾರಾಚಿ. ಕುಂಞಿನ ಎಡ್ತಂಡ್ ಅಕ್ಕುವಮ್ಮಾ ನಂಗ ದೂರ ಪೋಯಿರ್ತಿಂತ್. ಅಕ್ಕ ನಿನ್ನ ಇಲ್ಲಿ ಬುಟ್ತ್ಪತ್ಪೋಯಿ. ಸಾರಿ ಮಾ... ಇಂಞ

ಪೋಪಾಲೆ. ನಂಗ ಬಂದಾರ್‌ತಲ್ಲಾ. ನಂಗಡ ಕುಂಞಿ ನಂಗಡ ಕೂಡೇ ಇಪ್ಪ. ಬುಟ್ಟಿತ್ ಪೋಪಾಲೆಂದ್ ಸಮಾಧಾನ ಮಾಡ್‌ಚಿ. ಬೋರೆ ಮಕ್ಕಕ್ಕ್ ಘಾದರ್‌ಕೆಲ್ಲಾ ಎಡ್‌ತ ಬಂದ ಸ್ವೀಟ್ಸ್‌ನ ಕೊಡ್‌ತಿತ್ ಕಾರ್ಯಪ್ಪನೋಡೆ ಮನೆಕ್ ಕಾಕಿಯ ಬಾತ್.

ರವಿಕ್‌ಣ್ಣಂಗ್ ಕುಂಞಿ ಬಪ್ಪಾಂದ್ ಗೊತ್ತಾನದೇ ಮನೆಲ್ಲಾ ಶೃಂಗಾರ ಮಾಡಿತಿಂತ್. ಮಂಕಾಯಿತಿಂಜಾಂಡ ಮೂಡ್ ಬೀಂದ ತಾವರೆನನ್ನನೆ ಆಯಿತಿಂತ್. ಆಳಕಾಳ ಎಲ್ಲಾ ಸಂಭ್ರಮತ್ ಕುಂಞಿನ ನೋಟುವಕ್ಕ್ ಕಾತಂಡಿಂಜತ್. ರಾಹುಪೊದ್ವಾನನ್ನನೆ ಇಂಜ ಮನೆ ಪೊಲಂದಿತಿಂಜತ್. ಅಕ್ಕಲೇ ವಾಣಿರ ಅಪ್ಪವ್ವಂಡ ಕಾರ್ ಪಟ್ಟಿಲ್ ಕಂಡತ್. ದಾರ್ ಎಚ್ಚಕ್ಕ್ ಕೊಂಡಾಡ್‌ನಕ್ಕಲೂ ಪೋರತನ್ನನೆ ಆಯಿತಿಂತ್ ಕುಂಞಿನ.

ಓರ್ ದಿನ ಚರ್ಚ್‌ಕೇ ಪೋಯ್ ಚೆರಿಯ ಪಾರ್ತಿ ಬೆಚ್ಚಂಡ್ ಅವಡ ಪಳಿಯ ಪೆದತ್ತಾರ ಬದಲ್ "ರಶ್ಮಿ"ಂದ್ ಪೆದ ಇಟ್ಟಿತ್‌ವಾಣಿ. ಅಭಿಲಾಷೆರದೇ ವಯಸ್ಸಾರ ಕುಂಞಿಯಾನಾಂಗ್‌ವಾಣಿ ಚೆನ್ನ ಅವನ ಮರಂದತ್. ಬೆಂದು ಚಂಜಾದಿಯಕ್ಕು ಅಪ್ಪವ್ವಂಗೂ ಎಲ್ಲಾಕೂ ಚೆನ್ನ ನೆಮ್ಮದಿ ಆಚಿ.

ವಾಣಿ ಓರ್ ಗಳಿಗೆಯೂ ರಶ್ಮಿನ ಬುಟ್ಟಿತಿಪ್ಪಂಜಿಲೆ ಅವಡಕಳಿ ಎಲ್ಲಾರ್‌ನೋ ಮೋಡಿ ಮಾಡುವನ್ನಿಂಜತ್. ವಸಂತ್ ಕಾರ್ಯಪ್ಪಂಗ್ ಎನ್ನನೆ ಅಭಿನಂದನೆ ಎಣ್ಣೆವಂದೇ ಗೊತ್ತಾಕತೆ ಕೈ ಪುಡ್‌ಚಂಡ್ ಅವಂಡ ಮೂಡ್‌ನೇ ಒನ್ನಾಂದ್ ನೋಟಿನಿಪ್ಪಕ ಅವನೇ ಎಣ್ಣೆಚಿ. ವಸಂತ್ ಇದ್ ನಾನಂತ ಮಾಡಿಯೆ. ಬರೀ ನಿಂಗಕ್ಕು ಬಟ್ಟೆ ಕಾಟಿತಂದಿಯಚ್ಚಿ ಕೇ ಅದ್ ತಿಂತ ಒಬ್ಬಂಡ ನೊಂಬಲತ್ತನ ಅರ್‌ಂಜಿತ್ ಆನ ನೀಕುವಕ್ಕು ಸಹಾಯ ಮಾಡುವವನೇ ನೇರಾನ ಸ್ನೇಹಿತನಪ್ಪಾ. ಅದ್‌ನೇ ನಾನ್ ಮಾಡಿಯೆಂಡ್ ಸಮಾಧಾನ ಮಾಡ್‌ಚಿ.

ಬುಟ್ಟಿಪೋನ ತೋಟತ್ತರ ವ್ಯವಹಾರ ಎಲ್ಲಾ ಪುನಃ ಮಾಡಿಯಂಡ್ ನಿರಾಳತ್ತ ಉಸ್‌ರಾಡ್‌ಚಿ ವಸಂತ್.

ಒಮ್ಮೆ ಸಿಟಿಕ್ಯಾ ಪೋನೆಯಿಂಗ ವಸಂತ್‌ರ ಓರ್ ಆಂಟಿರಲ್ಲಿಕ್ ಒರ್ ಗಳಿಗೆ ನುಗ್ಗಿದಾಟಿರ್‌ನಾಂದ್ ಪೋಚಿ. ಆಂಟಿಕ್ಯಾ ವಸಂತ್‌ನ ದುಂಬಾ ಅಕ್ಕರೆ. ಅನ್ನನೇ ಟೀ, ತಿಂಡಿ ಬಾತ್. ತಿಂದಿತಾನದು ಪೋಕನಾಂದೆಣ್ಣೆ ಆಂಟಿರ ಓರ್ ಮಚ್ಚಣಿಚಿ. ಅಲ್ಲಿಕ್ ಬಾತ್. ಅದ್ ಇದ್ ನಾಲ್ ತಕ್ಕಾನದೂ ರಶ್ಮಿನ ನೋಟಾಟಿ. ಓ... ಇದೆಯಾ ನೀಡ ದತ್ತಾವಡ್‌ತಂಡ ಕುಂಞಿ ಪಾಪ!... ಅಪ್ಪದಾರೋ ಅಪ್ಪದಾರೋ ತಬ್ಬಲಿ ಅಲ್ಲ!.... ಅಂತೂ ಓರ್ ನಲ್ಲ ಜಾಗ ಕ್‌ಟ್ವಾನದ್ ಆಂಡ ಅದ್ಯಷ್ಟ ಪರೋಲೆ ಇಂಞೋರ್ ಕಾರ್ ಗೀರ್ ನಿಪ್ಪಾಟಿಡುವಕ್ಕ ಎಚ್ಚರ... ಇದ್‌ನೋ ಎನ್ನೇಂಗಿ ಮಾಡ್ಯವತೀಂದ್ ರೈಲ್‌ಬುಟ್ಟಿನ್ನನೆ ಎಣ್ಣಿಯಂಡೇ ಇಂಜತ್. ವಸಂತಂಗ್ ಎನ್ನ ಮಾಡ್‌ಡ್‌ಂದೇ ಗೊತ್ತಾಯಿಲೆ. ಅಕ್ಕಣೆ ಆಂಟಿಯೇ ನೀಕ್‌ಬೋರೆ ಕೇಮೆ ಇಲ್ಲಿಯಾ? ಅನ್ನನೆಯಾ ಅಯಿಂಗಡ ಎದಿಕ್ಕೇ ಪರವೋ. ಎನ್ನೋ ಚೆನ್ನ ಮರಂದಿತ್ ಪೊರ ಬಂದೆಯದೇ ಬಲ್ಯದ್‌ಂದ್ ನಂಗ ಗೇನ ಮಾಡುವಕ ಇವ ಬಂದ್‌ರ್‌ತ್ ಬಲ್ಯ ಬುದ್ದಿವಾದ ಕರ್ತಿ. ನೀಡ ಚಾಳಿ ನೀ ಬುಡುವಿಯಾಂದೆಣ್ಣಿತ್ ತಿರಣೆ ವಾಣಿ ವಸಂತ್ ಮೊಟ್ಟ್‌ಳ್‌ಂಜಿತ್ ಪೋಪಂದೂ ಎಣ್ಣಿತೆ ಪೋಯಂಡಿಂಜತ್. "ಅಯ್ಯೋ ನಾನೆಂತಪ್ಪಾ ಇಲ್ಲತಾನ ಪರಂದನಾಂದ್ ತನ್ನ ತಾನೇ ಸಾಧಾನ ಮಾಡಿಯಂಡತ್ ಅವ.

ಕಾರ್ ಕೆತ್ತುವಕ್ಕ ವಸಂತ್ "ವೋ ಎಂತ ಜನವಪ್ಪಾ ನಂಗಡ ಕುಂಞಿನ ನಂಗ ಬೋಂಡೂಂದ್ ಕೊಂದನ್ನನೆ ಪರೆವಲ್ಲಾ. ಈ ರಶ್ಮಿಕ್ಯ ಎಲ್ಲಾ ಅರ್ಥ ಆಪಾಲಿಯಾ? ಅವಡ ಎದಿಕ್ಕೇ "ಅನಾಥ"ಂದೆಣ್ಣಿರ್‌ತಲ್ಲಾ? ಇಂಞಿ ಎಲ್ಲಿಕೂ ಪೋಪಕೇ ಆಗಂದೆಣ್ಣಿಯಂಡ್ ಕಾರ್ ಸ್ಪಾರ್ಟ್ ಮಾಡ್‌ಚಿ. ಆಂಟಿ ಅಲ್ಲಿಕೂ ಓಡಿಬಂತ" ವಾಣಿ, ವಸಂತ್ ಬೇಜಾರ್ ಮಾಡತಿ, ನಾಡಲ್ಲಿಕ್ ಬಂತ ನಿಂಗಕ್ ಇಂತ ತಕ್ಕ ಕೇಪಕಾಚಿಲ್ಲಾ...ಂದ್ ಎಣ್ಣಿಚಿ. ವಿಧಿನಿಯಮ ನಂಗ ಕೇಕಂಡು, ಅವ ಎಣ್ಣಿಂಡು. ಎನ್ನ ಮಾಡನ ಬಪ್ಪಾಂದ್ ವಾಪಸ್ಸಾಚಿ.

ಬೈಟ್ ವರಕೂಟುವಕ್ ವಾಣಿರ ಕೂಡೆ ಇಂಜ ರಶ್ಮಿ ಕೇಟಿತೇ ಕೇಟತ್.

ಅಲ್ಲ ಮಮ್ಮಿ ಅಲ್ಲಿ ಆ ಅಜ್ಜಿರಮನೆಲ್ ನಿಂಗಳ ನಾಡಮಮ್ಮಿ ಡ್ಯಾಡಿಂದ್ ಗೊತ್ತಿಲ್ಲತೆ ಅಪ್ಪ ದಾರೋ ಅವ್ವದಾರೋಂದ್ ಎನ್ನಂಗ್ ಕೇಟಿಯ ಮಮ್ಮಿ ?... ಆದಾ.... ಆ ಅಜ್ಜಿ ಬೋರೆ ದಾರೋ ಮಕ್ಕಕ್ ದಾರೂ ಇಲ್ಲೇಂದ್ ಎಣ್ಣೆಯೆ ನಂಗಳಲ್ಲಾಂದ್ ತೇಕಚಿ ವಾಣಿ. ಅಂಡ ಚಿರಿ ಮನಸ್ಸು ಇದೇನೇ ಒತ್ತಂಡತ್, ಒರೀರತ್

ಆಚೇಂಗಿ ಅಲ್ಲಾಂಜಿಪ್ಪರ ವಾಣಿ ಎಲ್ಲಿಕೂ ಕುಂಞಿರ ಕೂಡ ಪೊರಡುವಂಜಿಲೆ. ಆಫೀಸ್‌ಂಜಿ ಬಪ್ಪಕ ಕುಂಞಿಕ್ಕಾಯ್ ಎಂತೇಂಗಿ ಎಡ್‌ತವತೆ ವಸಂತ್ ಬಪ್ಪಂಜಿಲೆ. ಇದ್ ಕೆಟ್ಟಚಾಲ್‌ಂದ್ ವಾಣಿ ಎಣ್ಣೆಚೇಂಗಿಯೂ ಇಂಞಿ ದಾಕ್ ಎಡ್‌ತ ಬಪ್ಪಂದ್ ಎಣ್ಣೆತ್ ವಾಣಿನ ಮುಂಡತೆ ಇಪ್ಪನ್ನನೆ ಮಾಡುವಂತ್. ಆನಗುಂಡ್ ವಸಂತ್ ಬಪ್ಪಾನೇ ಕಾತಳಾಪ ಕೂಡುವಂತ್ ರಶ್ಮಿ. ಮೂಂದ್ ವಯಸ್ಸಾಪಕಾಚಲ್ಲ. ಓದುವಕ್ ಎಳಾದುವಕ್ ಮೆಲ್ಲೆ ಅಭ್ಯಾಸ ಮಾಡಿಯಂಡಿಂಜತ್ ವಾಣಿ.

ಇನ್ನನೇ ಇಪ್ಪಕ ಒನ್ನಾಂದ್ ವಸಂತ್ ಬಪ್ಪಕ ಓರ್ ಚಿರಿಯ ತುರುಟ್ಟೋಡೆ ಮೊಟ್ಟಲ್ ರಶ್ಮಿ ಅಳಾತಿತಿಂತ್. ಇವನ ಕಾಂಬಕ ಎದ್ದ ಓಡಿ ಬಂದ್‌ಲೆ. ಮೊರಟನ್ನನೆ ಕಾಂಬಂತ್ ಕಾರಾನ್ ಶೆಡ್ಡಲ್ ಬೆಚ್ಚಿತ್ ಬಂದ ವಸಂತ ರವಿಕ್‌ಣ್ಣನ ಕೇಟತ್ "ನಂಗಡ ಗುಬ್ಬಚ್ಚಿ ಎನ್ನಂಗ್‌ರಾ ಬೇಜಾರತುಳ್ಳೋ.... ಮೊರಟನ್ನನೆಯೂ ಕಾಂಬಾಂದ್ ತಮಾಷಿ ಮಾಡಿಯಂಡೇ ಪಕ್ಕ ಬಾತೇಂಗಿ ಅಪ್ಪರ ಅಳತದಲ್ಲತೆ ಊ...ಹುಂ ಅಕ್ಕಣೆ ರವಿಕ್‌ಣ್ಣ ಮೆಲ್ಲೆ "ಅವ್ವ ಪೊಜ್ಜಿಯೆ"ಂದ್ ಪಚ್ಚೆಚಿ. ವಸಂತಂಡ ಕೆಮಿ ಚೋಂದತ್. ಮೆಲ್ಲೆ ಬೊರ್‌ಚವಳೂ ಅಲ್ಲ. ಎನ್ನಂಗ್ ಪೊಜ್ಜಿತಿಕ್ಕು. ಇಕ್ಕಿಕ್ಕು ಇವಡ ಕೀಟಲೆಯೂ ಜಾಸ್ತಿಯೇ ಅಲ್ಲ ಪಳಿಯದೆನ್ನೇಂಗಿಂದ್ ಪೋಡಿಯೂ ಆಚಿ. ಮೆಲ್ಲೆ ಕುಂಞಿನ ಎಡ್‌ತಂಡ್ ಪೂಸಿಮಾಡಿತ್ ಕೈಲ್ ಇದೆಂತ ನಂಗಡ ಕುಂಞಿರಾಂ...ದ್ ಮೆಲ್ಲೆ ನೋಟಣೆ ಅವ ಬಪ್ಪಕ ಇಟ್ಟಬಂದ ಫ್ರಾಕ್ ನಾ...ನ್ ಆನ್ ಚ...ಚ್ಚೆಕ್ ಪೋಟಿ.....

ಮಮ್ಮಿ ಟೂ...ಟೂ...ಂದ್ ಬಿಕ್ಕಿಯಂಡೇ ಎಣ್ಣೆಚಿ. ಇದೆನ್ನ ಕೇತರೆಂದ್ ವಸಂತಂಡ ಕಣ್ಣೆಲೂ ನೀರ್ ಬಾತ್. ಬಾ..... ಮಮ್ಮಿರ ಕೂಡೆನ್ನೆ ಟೂ.. ನಾನೂ ನಾಡ ಕುಂಞಿಯೂ ಪುಂಡ್ಸ್ ಅಲ್ಲ. ದಾರ್ ನಿನ್ನ ಪೊಜ್ಜಿಯೇ ನೋಟನಾ... ಬಾ..ಂದ್ ಒಳಕ್ ಬಾತ್. ವಾಣಿ ಎಲ್ಲಿಕೋ ಪೋಯಿತ್ ಬಂದನ್ನನೆ ಕಾಂಬತ್. ಸೋಪತ್ತರ ಮೂಲೆಲ್ ಕುತ್ತಿ ಅಳತಂಡ್ ಮಂಡೆನ ಕಾಲರ ಸೆರೆಲ್ ಇರ್ಕಿಯಂಡ್ ಮೊರಡುವನನ್ನನೆ ಕಂಡತ್. ಪಕ್ಕ ಪೋಯ್ತ್. ಏ... ವಾಣಿ ಎನ್ನಾಚಿರೇ ... ಇದಾನೆನ್ನಂಗ್ ಪೊಜ್ಜಿಯೇ... ಎಂತಾಯೆ ನಿಂಗ ದಂಡಾಳ್ಕೂ ಇಲ್ಲಿ ನೋಟೊಂದ್ ಪಕ್ಕ ಅಳತಂಡ್ ವಾಣಿರ ಮಂಡೆನ ನೇತ್ಚಿ.

ಮಂಡೆ ನೇತ್ನವಳೇ ರಶ್ಮಿನ ನೋಟಿಯಂಡ್ ಇದ್ ಇದ್.. ರಶ್ಮೀ ಎನ್ನ ಮಾಡ್ಚಿಗೊತ್ತಾ..ಂದ್ ಬಲ್ಯ ಕತೆನೇ ಎಣ್ಣೆಚಿ.

ರಶ್ಮಿನ ಕಾಕಿಯಂಡ್ ವಾಣಿ ಶಾಪಿಂಗ್ಕ್ ಪೋಯಿತಿಂತೂಂದೂ ಬಪ್ಪಕ ಕಿಡ್ಸ್ ಕಾರ್ನರ್ ಕ್ಯಾಲೆ ಬಪ್ಪಕ ಗೊಂಬೆ ಬೋಂಡುಂದೆಣ್ಣೆ ನಾಂಗ್ ಒಳಕ್ ಪೋಚಿಂದೂ, ಆದ್ ಗೊಂಬೆ ಕಾಟಾಚೇಂಗಿಯೂ ಬೋಂಡಾಂದೆಣ್ಣೆತ್ ಕಡೇಕ್ ಬೊಳತ್ ಫ್ರಾಕ್ ಟ್ಟಿ ಕಣ್ಣೆತಿರುಕುವ ಅದೇ ಗೊಂಬೆನ ಕಂಡಿತ್ ಅದೇ ಬೋಂಡೂಂದ್ ಹಟಪುಡ್ಚಿತ್ಂದೂ ಆಂಗ್ ಅಲ್ಲಿಯೇ ದಂಡ್ ಕೊಡತಿತ್ ಬಲಾಚಬಂತ ಕಾರ್ ಪತ್ತೆಚಿಟ್ಟಿಂದೂ, ಮನೆ ಕೆತ್ತನದೂ ಪುನಃ ದಂಡ್ ಇಡುವಂಜಿ ದವುತನೆಂದೂ ಬಲ್ಯ ಸಾಧನೆ ಮಾಡ್ನನ್ನನೆ ಒರೇ ಉಸಾರ್ಲಾ ಎಣ್ಣೆತ್ ತೇತತ್.

ಓ... ಇದಾ ಸಂಗತಿ... ಆಂಗನ್ನೆ ಗೊತ್ತ್ ಆಗೊಂಬೆರ ಬಯ್ಯಲುಳ್ಳ ಸಮಸ್ಯೆ ವಾಣಿ... ಮಕ್ಕಕ್ ಚಾಯಿಗೊಂಬೆಕಾಂಬಕ ಕೈಕಾಟುವದ್ ಸಹಜ. ನೀನೇ ಎನ್ನೇಂಗಿ ಎಣ್ಣೆತ್ ಸಮಧಾನತ್ ಕಾಕ್ಕಬಪದ್ ಬುಟ್ಟಿತ್ ಇದೆಂತವಾಣಿ?... ಒನ್ನಾಂದೂ ಓರ್ ಬೈಯ್ಯತ್ತವ ಪೊಜ್ಜಿಯಲ್ಲಾ ... ಅವಡ ಕೈಲ್ ಉಳ್ಳ ತುರ್ಚ್ಚಾನ ನೋಟೊ ಎಂತದ್... ಓರೆ ಕಣ್ಣೆಲ್ ನೋಟೊನ ವಾಣಿ ಒಮ್ಮಕ್ಕೆ

ಕೂಳಿಪೊದ್ದನ್ನನೆ ಓಡಿ ಬಂತುಕುಂಞಿನ ಬಾತಿ ತಬ್ಬಿಯಂಡ್ ಮುತ್ತಂಡ್ ಮೊರಟಂಡೇ ನಾಡ ತಪ್ಪಾಚಿಮ್ಮಚ್ಚಿ. ನಾಡ ಸ್ಪೀಟಿಅಲ್ಲ... ನೇತಿಯಂಡ್ ಒಳ್ಳೆಕ್ ಪೋಟಿ. ಇದಾನೆಲ್ಲ ನೋಟಿಯಂಡ್ ಊಜಳೆ ಬುಟ್ಟಂಡ್ ಬಟ್ಟೆ ಬದಲಾಚಿಡುವಕ್ ತಾನೂ ಒಳ್ಳೆಕ್ ಪೋಚಿ ವಸಂತ. ಅಲ್ಲಂಜಿ ಓರೂ ಸಮಸ್ಯೆ ಇಲ್ಲತೆ ಕಾಲ ಉರಂಡಿಯಂಡೇ ಇಂಜತ್.

ಒನ್ನಾಂದ್ ವಸಂತ ಆಫೀಸ್ ಬ್ರೇಕ್‌ಲಾ ಕ್ಯಾಂಟೀನ್‌ಲಾ ಕಾಫಿ ಕುಡ್‌ಚಂಡಿಪ್ಪಕ್ಕ ಓರ್ ಬಾಲೆಕಾರ ಅಪ್ಪರಿಪ್ಪರ ದಾರನೋ ತೇಡಿಯಂಡ್ ನೇರೆ ವಸಂತರ ಮೇಚಿಕಪ್ಪರೇ ಬಂತ. ಅವಂಡ ಮಿಂಞಿಲ್ ನಿಂದತ್. ಇವನೇ ನೋಟಿಯಂಡ್ ಸಂಶಯತ್ "You are Vasanth?....am I correct"ತಾಂಡ ತಕ್ಕನ ದೃಢಮಾಡಿಯಂಡೇ ಕುರ್ಚಿಬಲಾಚಂಡ್ ಅಳತತ್. ಇವ ದಾರ್? ನಾಕ್ ಪರಿಚಯವೂ ಇಲ್ಲೆ. ನನ್ನೇ ನೇರೇ ಕೇಟಂಡುಂಡಲ್ಲ..! ದಾರೆಂಗಿ ಆಫೀಸ್‌ಕ್ ನಾನ್ ರಜತಿಪ್ಪಕ್ಕ ಬಂದ ಪುದಿಯವನಾಯಿತಿಕ್ಕೂಂದ್ ಬಾರತ್ತ ತೆಳಿನ ಬಪ್ಪಾಚಿಟ್ಟಂಡ್ Yes..... I am Vasanth ಕಪ್ಪನ ಬೆಚ್ಚಿತ್ ನೀಟಾನ ಕೈಕ್ Shake handಕೊಡ್‌ತತ್. ಚೆನ್ನ ಕಪ್ಪನರತ್ತಲುಂಡೇಂಗಿಯೂ ಲಕ್ಷಣವಾಯಿತಿತ್. ನಂಗಡ ಊರ್‌ಕಾರನಲ್ಲಾಂದ್ ಭಾಷೆಲೇ ಗೊತ್ತಾಚಿ. ಮನಸ್ಸಲ್ ಏದೋ ಬಲ್ಯ ಬೇಜಾರ್ ಇಂಜನ್ನನೆ ಕಾಂಬಂತ. ನಾಕ್ ನಿಂಗಳ ಗೊ....ತ್ತಾ..ಯಿಲೆಂದ್ ಏಂಗ್‌ಚಿ ವಸಂತ.

ಅವಂಡ ಪೆದ ವಿವೇಕ್‌ಂದೂ, ಸೋಮವಾರಪೇಟೆರ ಓರ್ ಬಲ್ಯ ತೋಟಕಾರಂಡ ಮೋಂವಂದೂ, ಓದಿಯೆ ಎಲ್ಲ ಚೆನ್ನೆಲ್. ಪಿಂಞಿ ಕೆಲಸವೂ ಅಲ್ಲಿಯೇ ಮಂಗಲಾಯ್ 2 ಕಾಲ ಆಚೀಂದೂ ಚುರ್‌ಕಿತ್ ಒರೇ ಉಸ್‌ರಕ್ ಎಣ್ಣೆ ನಿಪ್ಪಾಚಿಟ್ಟಿತ್.

ಇವಂಗ್ ನನ್ನಂಡ್ ಎನ್ನಾಂಡಿಯೆ? ತೋಟಗೀಟ ಮಾರುವಾ ? ಅಲ್ಲಿ ಕುಟ್ಟಿತ್ತಲೆನ್ನೇಂಗಿ ಆಸ್ತಿ ನೋಟಿತಾ ಅಲ್ಲಿ ಬಾಡಿಗಕ್ ನಾಡ ಮನೆ ಎನ್ನೇಂಗಿ

ಉಂಡಾಂದ್ ಕೇಪಕ್ಕಾಂದ್ ಮಂಡೆರೊಳ್‌ಲ್ ಪ್ರಶ್ನೆರ ಮಾಲೆಯೇ ನೆಚ್ಚತ್. ದುಡ್ಡೇನ್ನೇಂಗಿ ಸಾಲ ಬೋಂಡುವಾ? ಕೇಸ್‌ಲ್ ಗೀಸ್‌ಲ್ ಕೆಣಂಜಿತಿಕ್ಕುವಾ, ಪೋ ನಾಕೆನ್ನಂಗ್ ಇಂತಗೇನ ಅವನೇ ಕೇಟತೇಂಗಾಚೇಂದ್ ಅಲ್ಲ....ನಾಡ ಪೆದ ಎನ್ನನೆ ಗೊತ್ತಾಚಿ?...ಇಕ್ಕನೆನ್ನುಂಡ್ ಎಂತಾಂಡಿಯೇ ? ಆಫೀಸ್‌ಕ್ ನೇರಾಚಿ ಬೆರಿಯ ಎಣ್ಣೆ ಚೇಂಗಿ ನಲ್ಲದಿಂತಾಂದ್ ಎಣ್ಣೆ ತಾಂಡ ಪೊನ್ನಾರ ಚೈನಾರ ವಾಚಾನ ನೋಟಿತ್. ಇಕ್ಕಾ ನಿಂಕ್ ಸಮಯ ಇಲ್ಲೇಂಗಿ ಆಫೀಸ್ ಬುಟ್ಟಿತಾನದು ಚೆನ್ನ ನೇರ ನಾಕಾಯ್ ಕಯಿಪಕಯ್ಯುವಾ ? ನಾನು ಅಕ್ಕಣೆ ಬೋರೆ ಚೆನ್ನ ಕೆಲಸತೇತಂಡ್ ಬಪ್ಪೇಂದ್ ಎಣ್ಣೆತ್ ಎದ್ದತ್. ಮಂಡೆನ ಆಟಿತ್ ಆಫೀಸ್‌ಕ್ ಬಾತ್. ವಸಂತಂಗ್ ಕೆಲಸ ಮಾಡುವಕ್ಕೇ ಆಯಿಲೆ. ಪೊರಮೆ ಬಂತ್ ವಾಣಿಕ್ ಬಪ್ಪದ್ ಚೆನ್ನತಡ ಆದಾಂದ್ ಎಣ್ಣೆತ್ ಪೋನ್ ಮಾಡಿತ್ ಅಲ್ಲಿ ಇಲ್ಲಿ ಕಾಲಕಯಿಂಜತ್.

ಅಂಜಿ ಗಂಟೆಕ್ ಸರಿಯಾಯ್ ವಿವೇಕ್ ಹಾಜರಾಚಿ. ಫಳಾಫಳಾಂದ್ ಮಿನ್ನುವ ಕಾರ್ ಅವ ಐಶ್ವರ್ಯವಂತಂದ್ ಕಾಕಿತೆಣ್ಣೆ ನನ್ನನಾಚಿ ವಸಂತಕ್. ದಂಡಾಳೂ ಆಫೀಸ್‌ರ ಪೊರಮೆ ಉಳ್ಳ ಲಾನ್‌ಲ್ ಅಳಾತತ್.

ಅಕ್ಕಲೆ ನಾನೆಣ್ಣೆ ನನ್ನನೆ ನಾಡ ಪೆದ ವಿವೇಕ್‌ಂದ್ ಗೊತ್ತಾಚಿಲ್ಲ. ಒಮ್ಮೆ ನಾನ್ ಮಡಿಕೇರಿಲ್ ನಾಡ ಆಂಟಿರ ಮೋವಡ ಮಂಗಲಕ್ ಬಂದಲ್ಲಿ ಅವಡ ಕೂಟ್‌ಕಾರ್ತಿ ಮೈತ್ರಿನ ಒರೇ ನೋಟಿತ್ ಇಷ್ಟ ಆಚಿ. ಅಲ್ಲಿ ಇಲ್ಲಿ ಮಿಂಚಾನನ್ನನೆ ಓಡಿ ಕಳಿಪಂಜ ಅವಡ ಚಾಯಿ. ಮೋಡ್‌ನ್ ಡ್ರೆಸ್ ನಾಕೆನ್ನಂಗೋ ಆಕರ್ಷಣೆ ಆಚಿ. ಆಂಟಿರ ಮೋವ ಗಿರೀಶ್‌ಂಡ ಕೂಡೆ ವಿಷಯತ್ತನ ಎಣಿತಾಪಕ ಅವಳಾ ನಾಡ ತಂಗೆರ ಆತ್ಮೀಯ ಸ್ನೇಹಿತೆ. ಅವಡ ಕೂಡೆ ಅಕ್ಕಕ್ಕ ಮನೆಕ್ಕು ಬಂದಂಡಿಂಜತ್. ಅನ್ನನೆ ನಾಕೂ ನಂಗಡ ಮನೆ ಮೂಡಿರ ಮಾದರಿ ಅಯಿಪೋಯ್ ಬೋಲ್. ಒಂದಾಂಗೂ ಬಯ್ಯಕ್ ನಿಪ್ಪಾಲೆ. ಆಚೇಂಗಿ Love at first sight ಎಂದೆಣ್ಣೆ ವನ್ನನೆ ಆಚಿಲ್ಲಪ್ಪಾ! ಅವಕ್ ನಿನ್ನ ಇಷ್ಟ ಉಂಡೋ

ಇಲ್ಲಿಯೇ ಏದುಂಗೂ ಶಶಿಕ್ಕ ಎಣ್ಣೆ ತನೋ ಟುವಿ. ಶಶಿ ಇಕ್ಕ ಮಂಗಲಕರ್ತಿ ಈಂಡೆಡಲ್ ಎನ್ನನೆ ಎಣ್ಣೆಂಡೆಂದ್ ನೆರಕ್ಕಿಕ್ಕಚತ್. ಗಿರೀಶ್ ನಾಡ ಆಂಟಿಕ್ಕ ಎಣ್ಣೆ ಚೀಂದ್ ಕಾಂಬ. ಆಂಟಿ ಸಾಮಾನ್ ಎಂತಾನೋ ಕೆಟ್ಟುಚಿಟ್ಟುಂಡಿಂಜದ್ ವಿವೇಕ್‌ನ ಪಕ್ಕ ಕಾಕಿತ್ ನೀರೆನ್ನಂಗ್‌ರಾ ಆ ಮೂಡಿನ ಇಷ್ಟ ಆಯಿಟೇ ಬೋಂಡ ಬುಡ್. ನಾನ್ ಬೋರೆ ಎಲ್ಲೆಂಗಿ ಮಾಡುವಿಂದಚ್ಚಕ್ಕೆ ಎಣ್ಣೆತ್ ಪೋಯಿರ್‌ತ್. ಇದ್‌ಂಗೆಲ್ಲ ಇನ್ನನೆ... ಇರಡ್ ಏದ್‌ಂಗೂ ಓರ್ ವಾರ ಇಪ್ಪಿಯಲ್ಲಾ ಆಂಡೋಳ್‌ಲ್ ಇದ್‌ನ ಪರಂದಿತೇ ಪರಿಯಂಡು ಎಣ್ಣೆಯಂಡ್ ತೀರ್ಮಾನಕ್ಕ ಬಾತ್.

ಮನೆ ಮುಟ್ಟುವಕ್ಕ ಬಂದ ಶಶಿಕ್ಕ ವಿಚಾರ ಎಣ್ಣೆನದೂ, ಅವಳಾ... ನಾನೂ ಅವಳೂ ಒಂದನೇ ಕ್ಲಾಸ್‌ಂಜಿ ಕಾಲೇಜ್‌ಕೆತ್ತಣೆ ಒಕ್ಕಚೇ ಇಂಜವು. ನಲ್ಲ ಮೂಡಿ ಇಕ್ಕ ಅವ ಯಂ.ಎ. ಎಲ್ಲಾ ಬೆಂಗಳೂರ್‌ಲ್ ಮಾಡಿಯೆ. ಈ ಮೂಂದ್‌ಕಾಲ ಮಾತ್ರ ನಂಗ ಪಿರ್‌ಂಜಿಯೆ. ನಲ್ಲಮೂಡಿ ನಾನೆಣ್ಣೆನಕ ಅವ ಒತ್ತವು. ಎಣ್ಣೆರಡಾಂದ್ ಕೀಟಲೆಯೂ ಮಾಡ್‌ಚಿ. ಪಪ್ಪ ಮಮ್ಮಿಕ್ಕ ಎಣ್ಣೆತೆ ನಾನೇ ಮುಂದುವರಿಯುವದ್ ಸರಿಯಾ ತಪ್ಪಾಂದ್ ಮನಸ್ಸರ ಮೂಲೆಲ್ ಪ್ರಶ್ನೆ ಎದ್ದತ್. ಮೂಡಿನ ತೇಡಿಕ್ಕೊಡ್‌ತಕ ಅಯಿಂಗಕ್ಕೂ ಪಣಿ ಕಮ್ಮಿಯಾಚಲ್ಲಾ... ಬೋಂಡೇಂಗಿಬೋಂಡುಂದ್ ಪ್ರತಿಷ್ಠೆರ ತಕ್ಕು ಎದ್ದತ್. ಇನ್ನನೇ ಉಯ್ಯಾಲೆರ ಮಾದರಿ ಮನಸ್ಸ ಓಲಾಡಿಯಂಡಿಪ್ಪಕ್ಕಲೇ. ಹಾಯ್‌ಂದ್ ಗಿರೀಶ್‌ರ ಕೂಡೆ ಬಂದ ಕೋಗಿಲೆ ಸ್ವರಕ್ಕ ತಾನಾಯ್ತೆ ಮಂಡೆ ನೇಂದತ್. ಓಹ್ ಅದೆಂತ ಮಿನ್ನಲ್ ಆ ಕಣ್ಣೆಲ್ ಪಟಪಟಾಂದ್ ರೆಪ್ಪಿಬಡ್‌ಚಂಡ್ ಮುಚ್ಚಿತೊರಂದತ್ ಹಾ.....ಯ್... ಹಲೋ... ನಾನ್ ವಿವೇಕ್. ಅದೆಲ್ಲ ನಾಕ್ ಮೊನಿಯಾಂದೇ ಗೊತ್ತುಂಡ್. ಕೆಲಸತ್ತರ ಜೊತೆಲ್ ತಕ್ಕ ಪರಂದಿತಿಲ್ಲೆ. ಇಕ್ಕ ಗಿರೀಶ್ ಕಾಕ್‌ಚಲ್ಲ. ಅನ್ನನೆ ಬಂದಿಯೆ. ನಾನ್ ಇಕ್ಕ ಪೋಯಂಡುಳ್ಳ. ಇಂಞ ಎಕ್ಕೇಂಗಿ ಕಾಂಗನಾಂದ್ ಕೈ ಬೀಜಿಯಂಡ್ ಗಿರೀಶ್‌ರ

ಕೂಡೆ ಮಾಯವೇ ಆಯಿರ್ದು.

ಮನೆಕ್ ಪೋನ ಪಿಂಞ ನಿಂದಲ್ಲಿ ಅಳಾತಲ್ಲಿ ಹಾಯ್ ಹಾಯ್ಂದ್ ಆ ಸ್ವರ ಕೇಟನ್ನನೇ ಆಪಂತ. ಬೈಟ್ ಅಮ್ಮಂಡ ಕೂಡೆ ವಿಷಯತ್ನನ ಎಣ್ಣೆಚಿ ವಿವೇಕ್. ಸರಿ ಪಿಂಞ ಆರ್ ತಿಂಗತ್ತರೊಳಲ್ ನೋಟಿತ್ ತಕ್ ತೇತಿತ್ ಮಂಗಲವೂ ಆಚಿ.

ಮೈತ್ರಿ ಬೆಂಗಳೂರ್‌ಳಲ್ ನೋಟಿತ್ ತಕ್ ತೇತಿತ್ ಮಂಗಲವೂ ಆಚಿ.

ಮೈತ್ರಿ ಬೆಂಗಳೂರ್‌ಲ್ ಅಲಸೂರ್‌ಲ್ ವಾಸ ಉಳ್ಳ ರಿಟೆಡ್ ಆಫೀಸರ್ ಮುತ್ತಣ್ಣ, ಮುತ್ತಕ್ಕಿಯಡ ಒಂದುಳ್ಳ ಮೋವ. ಕೊಡಗಲ್ ಪೊಣ್ಣೆಮಕ್ಕಳ ಆಕಿತ್ ತಾನ್ ಅಲ್ಲಿ ಇಲ್ಲಿ ಕೆಲಸಮಾಡಿಯಂಡ್ ಇಂಜತ್. ಇಕ್ಕ ಬೆಂಗಳೂರ್‌ಲೇ ಉಳ್ಳವು. ಇಯಂಗಕ್ ಓರ್ ಕಣ್ಣ ಓರ್ ಮೂಡಿ. ಕಣ್ಣ ಇಂಜಿನಿಯರಿಂಗ್ ಓದಿಯಂಡಿಂಜವ ಸ್ನೇಹಿತಂಗಡ. ಗಿಡ ಕೂಡೆ ಅಬ್ಬಿಫಾಲ್ಸ್‌ಕ್ ಪೋನಲ್ಲಿ ಆಕಸ್ಮಿಕವಾಯ್ ಪೋಳೆಕ್ ಬುದ್ಧಿತ್ ಚತ್ ಪೋಯಿತಿತ್. ಇಕ್ಕ ಒಂದುಳ್ಳ ಮೋವಳೂ ಪೊಣ್ಣೆ ಮುತ್ತಕ್ಕಿಯೂ ಮಾತ್ರ ಇಂಜ ಚೆರಿಯ ಸಂಸಾರ. ಮೋವ ಚತ್ತ ಪಿಂಞ ಮೈತ್ರಿಕ್ ಎರ ಸ್ವಾತಂತ್ರವೂ ಮಂಞಣಿಯೂ ಆಚಿ. ಎಂ.ಎ. ಮಾಡುವಕ್ ಕಾಲೇಜ್‌ಕ್ ಪೋಪಂಜಲ್ಲಿ ಇವಡ ಚಾಯಿಕ್ ಬೋಂಡ್ಯಚ್ಚಕ್ ಫ್ರೆಂಡ್ಸ್ ಬಾತೇಂಗಿಯೂ ಪ್ರೀತಂ ಎಣ್ಣೆವ ಕಣ್ಣನ ಇವಳೂ ಇಷ್ಟಪಟ್ಟಿತ್. ಜೊತೆಲೇ ಸಿನಿಮಾ, ಪಾರ್ಕ್‌ಂದ್ ಸುತ್ತಾಡ್‌ನವು ಏದೇಂಗಿ ನಮ್ಮೆ ನಾಳಕ್ ಮನೆಕ್ಕು ಕಾಕಿಯ ಬಪ್ಪಲ್ಲಿಕೆತ್ ಚಿ.

ಒಮ್ಮೊಮ್ಮೆ ಮುತ್ತಣ್ಣ ಮೂಡ್‌ನ ಇರ್‌ಗೂಟ್‌ಚೇಂಗಿಯೂ ಮಕ್ಕಲ್ಲ... ಈ ವಯಸ್ಸಲ್ ಇದೆಲ್ಲಾ ಮಾಮೂಲ್‌ಂದ್ ತೇಕಿಯಂಡತ್. ಓರ್ ವಾರ ಕಾಲೇಜ್ ಪಿಕ್‌ನಿಕ್‌ಂದ್ ಮನೆಂಜಿ ಪೋನವ ಬಂದಿಯ ಪತ್ತ ದಿನ ಕಯಿಂಜ ಪಿಂಞ ಮನೆರೊಳಲೇ ಇಷ್ಟ ಮುತ್ತಕ್ಕಿಕ್ ಒಂದೂ ಗೊತ್ತಾಪಿಂಜಲೆ.

ಒನ್ನಾಂದ್ ಕಾಲೇಜ್‌ಂಜಿ ಬಂದವ ಬಟ್ಟೆಯೂ ಬದಲಾಯಿಚಿಡತೆ

ಮೊರಟಂಡೇ ಬುದ್ಧಂಡವಳ ಅವ್ವ ಗಾಬರಿಲ್ ಎನ್ನಾಚಿ. ಪನಿಯಾ? ಮಂಡೆ ನೊಂಬಲವಾಂದ್ ವಿಚಾರ್‌ಚಿಡುವಕ. ಒಂದೂ ಇಲ್ಲೆಂದೂ ದುಖ್ಪಿಚಿಟ್ಟಿತ್ ಮೊರಡುವದೊಂದೇ ಉತ್ತರಾಚಿ. ಚೆನ್ನ ನೇರ ಅನ್ನನೇ ಬುಟ್ಟಿತ್ ಪುನಃ ಕೇಟಲ್ಲಿ ಪ್ರೀತಂ ಕಾಲೇಜ್‌ಕ್ ಬಂದಂಡಿಲ್ಲೆಂದೂ ಅಯಿಂಗಡ ಅಪ್ಪಂಗ್ ಎಲ್ಲಿಕೋ ವರ್ಗ ಆಯ್ತ್ ಎಲ್ಲಾರೂ ಪೋಯಿರ್‌ತ್‌ಂದೂ ಎಣ್ಣೆಚಿ. ಅಚ್ಚೆಕೆನ್ನೆ ಪೋಚೇಂಗಿ ಪೋಚಿ. ಅವನೆನ್ನ ನಂಗಡ ಬೆಂದುವಾ ಚಾಚಿಯಾ? ಏದೋ ಎನ್ನೋ ನಾನೆನ್ನೋ ಬಲ್ಯ ಸಂಗತೀಂದ್ ಗ್ಯಾನ ಮಾಡ್‌ನ.... ಬಾ ಬಾ ಮೂಡ್ ಕತ್ತಿತ್ ಕಾಫಿ ಕುಡಿಂದ್ ಮುತ್ತಕ್ಕಿ ಮೋವಡ ಮೂಡ್‌ನ ತ್‌ಟ್ಟಿತ್ ಎದ್ದತ್. ಅವ್ವಂಡ ಕೈ ಪುಡಿಚಂಡ ಮೈತ್ರಿ ಅಮ್ಮಾ ನಾನ್ ಬಲ್ಯ ತಪ್ಪ್‌ಮಾಡಿಟಿಯಮ್ಮಾ... ಪ್ರೀತಂ ನನ್ನ ಮಂಗ್‌ಲ ಕೈಪೀಂದ್ ನಂಬ್‌ಚಿಟ್ಟಿತ್. ಇಕ್ಕ ನಾಕ್ ನಾಲ್ ತಿಂಗಮ್ಮಾಂದ್ ಬಿಕ್ಕುವ ಕೂಡ್‌ಚಿ.

ಮುತ್ತಕ್ಕಿಕ್ ನಿಂದನೆಲ ಬಾಯಿ ಬುಟ್ಟಿನ್ನನೆ ಆಚಿ. ಬಾಯಿ ಕಂಡಿಲ್ ಮೋವಡ ಮೊರಡಲಾನ ಕೇಟಿತ್ ಬಂದ್‌ನಿಂದ ಮುತ್ತಣ್ಣ ರಭಸತ್ ಬಂದವನೇ ಎಂತೆಣ್ಣಿಯಾ... ಹ... ನಾಕ್ ಅಕ್ಕಲೇ ಸಂಶಯ ಉಂಡ್. ನಾಡ ಪುಂಡ್ ಅಂದೋರ್ ದಿನ ಎಣ್ಣೆತಿಂತ್. ನೀಡ ಮೋವಳ ಅಲ್ಲಿ ಇಲ್ಲಿಏದೋ ಕ್‌ಣ್ಣೆಂಡ ಕೂಡೆ ಸುತ್ತುವದ್ ಕಂಡೆ..ಎನ್ನ...ಎಚ್ಚಿರಾಂದೆಣುವಕ ನಾನ್ ತಕ್ಕಾನ ಬೆಲೆಕೇಟ. ಕ್‌ಣ್ಣ ಚತ್ತ ಪಿಂಞ ನೀಕ್ ಸ್ವಾತಂತ್ರ್ಯ ತಂದದ್ ತಪ್ಪಾಚಿ. ಒಂದೋ ಅರೆಯೋ ಮಕ್ಕಳ ಬೆಪ್ಪನ್ನನೇ ಬೆಕ್ಕಂಡು. ನಂಗಡ ಮಂಡೆ ನೇತತನ್ನನೆ ಮಾಡೀಟಿಯಲ್ಲಾ. ನಾನೇ ಚತ್ ಪೋಯಿತುಂಡೇಂಗಿ ರಗಳೇ ಇಂಚ್‌ಲೆಂದ್ ಅವಳ ಪೊಯ್ಯುವಕ್ ಓಡಿ ಬಂದಲ್ಲಿ ಮುತ್ತಕ್ಕಿ ತಡ್‌ತಿತ್. ನಿಂಗಳ ದಮ್ಮಯ್ಯಾಂದೆಣ್ಣಿವಿ. ಚೆನ್ನ ಸಮಾಧಾನ ಮಾಡಿ. ನಂಗಳೇ ಎನ್ನೇಂಗಿ ಉಪಾಯ ಗೇನಮಾಡನ. ಆಕ್‌ಣ್ಣ ನ ತೇಡಿಯಂಡ್ ಬಂತ್ ಮಂಗ್‌ಲಮಾಡನ. ಅದ್ ಬುಟ್ಟಿತ್ ಇನ್ನನೆ ಪಾರಿಕಳ್‌ಚಿಕ್ಕ ಎನ್ನಗತೀಂದ್ ಅವನ ಪೊರಮೆಕಾಕಿಯ ಬಾತ್. ನಂಗಡ ಈ ರಂಪಕ್ ಮೂಡಿ

ಎನ್ನೇಂಗಿ ಮಾಡಿಯಂಡಕ ಅದೂ ನಂಗಳೇ ನೋಟಂಡುವಲ್ಲಾಂದ್ ಮಂಡೆಕ್ಕ ಕೈಬೆಚ್ಚಳತತ್ ದಂಪತಿಯ.

ಮೈತ್ರಿ ಕಾಲೇಜ್‌ಕ್ ಪೋಪಾನೇ ಮರಂದತ್. ಒಂದ್ ದಂಡ್ ಕುರಿ ಅವಡ ಜೊತೆಕಾರ್ತಿಯ ಬಂತ ಕಾಕ್‌ನಕ್ಕಲೂ ನಾಕ್ ಓದ್ ಮದಿ. ನಾನಿಂಞಾ ಬಪ್ಪಲೇಂದೇ ಎಣ್ಣೆತ್ ಅಯಿಚಿರ್‌ತ್ ಮೈತ್ರಿ. ಮುತ್ತಣ್ಣ ಗೊತ್ತುಳ್ಳಯಿಂಗಡ ಕೂಡೆಲ್ಲಾ ಪ್ರೀತಂರ ವಿಚಾರ ಕೇಟತೇಂಗಿಯೂ ಪ್ರಯೋಜನವಾಯಿಲೆ. ಈಂಡೆಲ್ ಮುತ್ತಕ್ಕಿ ಅಸ್ಸತ್ತೆರ ಬರಿಕೂ ವಿಚಾರಮಾಡುವಕ ಇಚ್ಚಕ್ಕ ತಿಂಗತ್ತರ ಮೇಲೆ ಎಡ್‌ಪಾಲೆಂದೂ ಮೈತ್ರಿ ಆಂಗುಂಜಿ ಮಿಂಞಾಲೇ ಆಂಗ್ ಒತ್ತಂಡದೂ ಇಲ್ಲೆ.

ಮನೆಲ್ ತಕ್ಕ ಕಮ್ಮಿಯಾಚಿ. ಊಟ ಉಪಹಾರ ಕಾಟಾಚಾರಕ್ಕಾಚಿ. ಬೇರ್‌ಚಿಟ್ಟಳಪದೊಂದೇ ಅಯಿಂಗಡ ಪಾಲಕ್ ಇಕ್ಕ ಬಟ್ಟೆ ಮುತ್ತಕ್ಕಿಕ್ಕ ಮೋವಳ ಕಾಂಬಕ ಚೆಡಿಯೂ ಅನ್ನನೇ ಮೋವಡ ಆದ್ಯತ್ ಕುಳಿಯಮೆ ಎನ್ನನೆಲ್ಲಾ ಚಾಕಂಡು ಪೋತಂಡುಂದ್ ಕುಂದ್‌ನಚ್ಚಕ್ ಬಲ್ಯ ಆಸೆ ಬೆಚ್ಚದ್. ಜೊತೆಕಾರ್ತಿಯಡ ಮಕ್ಕಡ ಕೇಳಿ ಒಂದೋ ದಂಡೋ ಕೇಟಲ್ಲಿ ತಾನ್ ಅಯಿಂಗಳ ಹೀಯಾಳ್‌ಚಿಟ್ಟದ್ ಒಂದಾಂಡ ಬಯ್ಯ ಒಂದ್ ಸಿನೇಮಾತ್ ನನ್ನನೆ ಕಣ್ ಮಿಂಞ ಪಾಂಜತ್. ಆ ಕ್ಕಣ್ಣನ ಕ್ಕಟ್ಟುತುಂಡೇಂಗಿ ಮುತ್ತಣ್ಣ ಗಂಜಿ ಮುತ್ತಕ್ಕಿಯೇ ಎನ್ನೇಂಗಿ ಮಾಡಿರುವಚ್ಚಕ್ಕ ರೋಶ ಉಕ್ಕಿ ಬಂಪ್ಪಂತ. ನಂಗಡದೇ ಸರಿ ಇಲ್ಲತ ಪಿಂಞ ಬೋರೆಯಂಗಳ ಪರೆವ ಎನ್ನಂಗ್. ಅವ ಆಣ್ ಕೆತ್ತೆ ಚವುಚುವಾ ಕತ್ತಿಯಂಡ್ ಪೋಯಿರುವಾ. ಇವ ಪೊಣ್ಣಾಯ್ ವಿದ್ಯೆಯೂ ಇಂಜಿತ್ ಇದೆನ್ನ ಕೇತರೆ ಮಾಡಿಯಂಡತಲ್ಲಾ. ಪೊರಮೆ ಅಳಾತಂಡ್ ದಂಡಾಳೂ ಈ ವಿಚಾರತ್ ಪರಂದಂಡ್ ಉಂಬ. ನೇರಾಚೀಂದ್ ಮೂಡಿ ಕಾಕುವಕ ಮೋವಡ ಕೋಂಬರೆನೊಮ್ಮ ಬಗ್ಗಿ ನೋಟಿತ್ "ಬಾಮ್ಮಾ ಮೈತ್ರಿ ಆನದ್ ಆಚಿಲ್ಲ ಇಂಞಾ ಮುಂಞಾ ಕುಳ್ಳದ್ ಗೇನಮಾಡನಾ ಉಂಬಕ್ ಬಾ" ಎಣ್ಣೆತ್ ಕಾಕ್ಕಕ "ನಾಕ್

ಬೋಂಡಾಂಡ್ ಎಣ್ಣೆತ್ ಬುದ್ದಂಡತ್. ಹೆಚ್ಚಿಗೆ ವರಾತ ಮಾಡತೆ ಮುತ್ತಕ್ಕಿಯೂ ವಡಿಯಂಡ ಕೂಡೆ ಸೇರ್ನಚ್ಚಕ್ಕಾನ ತಿಂದಿತ್ ಎದ್ದತ್.

ಪಿತ್ಯಾಂಡ್ ಪೊಲಾಕ ಎಟ್ಪ್ ಗಂಟೆ ಆಚೇಂಗಿಯೂ ಮೈತ್ರಿ ಪೊರಮೆ ಬಂದ್ಲೆ. ಮುತ್ತಕ್ಕಿರ ಪೂಜೆ ಪುರಸ್ಕಾರ ಎಲ್ಲಾ ಆಯ್ತ್ ಎಟ್ಪ್ ಗಂಟೆಕ್ಕ್ ಕಾಫಿ ಕುಡ್ಚಿತ್ ಪಿಂಞ ಪೂ ತೋಟಕ್ಕಾಲೆ ಓರ್ಸುತ್ ಬಂತ ಪಿಂಞವೇ ಮೂಡಿರ ಕೂಡೆ ಒಟ್ಟಿ ಕಾಪಿ ತಯಾರಿಕ್ಕ್ ಕೂಡುವಂಜಿಯೆ. ಅಕ್ಕಣೆ ಮುತ್ತಣ್ಣಂಡ ತೋಟತ್ತರ ಓರ್ರಾಂಡ್ ಆಯಿತ್ ಬಪ್ಪಂಜಿಯೆ. ಆಚೇಂಗಿ ಇಲ್ಲಿ ತೋಟತ್ತರ ಬದ್ಲೆ ವಾಕ್ ಪೋಯಿತ್ ಬಪ್ಪಂತ. ಎನ್ನನೆಯೋ ಒಯಿಂಬದ್ ಗಂಟೆಕ್ಕೇ ಅಯಿಂಗಡಲ್ಲಿ ಪೊಲಾಕತ್ತರ ಟಿಫನ್. ಆಚೇಂಗಿ ಮೈತ್ರಿ 6 ಗಂಟೆಕ್ಕೇ ಎದ್ದಿತ್ ತಾಂಡ ಕೆಲಸ ಮಾಡಿಯಂಡ್ ಓರ್ ಕಪ್ ಕಾಫಿಯೋಡೆ ಲಾನ್ಲ್ ಅಳಪದ್ ನಿತ್ಯ ಆಯಿತಿತ್. ಇಂದ್ ಇಂಞು ಎದ್ದಿತೇ ಇಲ್ಲೆ ಎಣ್ಣೆಕ್ ಮುತ್ತಕ್ಕಿ ಅವಡ ಕೋಂಬರೆಕ್ಕ್ ಬಕ್ಕಣೆ ವರಿಯಂಡೇ ಇಂಜವಳ ಬಜ್ಜಂಡೇ ಒಪ್ಪುವಕ್ಕ್ ಪಕ್ಕ ಪೋಯಿ ಕಂಬಳಿ ನೀಕ್ಚಿ. ಇಂಞು ವರಿಯಂಡೇ ಉಂಡ್. ಪಾಪ ಬಯಿಟ್ ನಂಗ ಪರಂದಾನ್ನೆಲ್ಲಾ ಕೇಟಂಡ್ ಬೇಜಾರತ್ ವರೀತಿಲ್ಲೆ ಕಾಂಬ ಇಕ್ಕ ವರಿಯದೋ ಎನ್ನೋ. ವರಡ್ಂದ್ ಬಯ್ಯಕ್ ಪೋಚಿ. ಮುತ್ತಣ್ಣ ವಾಕ್ ಪೋಯ್ ಬಂದವಂಗ್ ಮೈತ್ರಿಯೇ ಕಾಫಿ ಕೊಡ್ಪಂಜಿಯೆ. ಇಂದ್ ಕಾಂಗತಿಪ್ಪಕ ಅವನೂ ಬಂತ ಕೋಂಬರೆರ ಪಡಿ ತೊರಂದಾನ ಕಂಡಿತ್ ಒಳ್ಳೆಕ್ ಪೋಯ್. ಮೈತ್ರೀ ಎನ್ನಂಗವ್ವಾ ಮಂಡೆನೊಂಬಲವಾಂದ್ ಮುಟ್ಟಿ ನೋಟ್ಚಿ. ಅನ್ನನೇ ಮೇಜಿಲ್ ಓರ್ ಕುಪ್ಪಿ ಕಾಲಿ ಇಂಜತ್. ಅದ್ ಮರಕ್ಕರ ಪಿಲ್ರ ಕುಪ್ಪಿ. ಸಂಶಯತ್ ಅವಳ ಕುತ್ಕಚಿ ಊಹುಂ. ಇಲ್ಲೆ ಅಕ್ಕಣೆ ಕೈಲ್ ಓರ್ ಪೇಪರ್ ಕಂಡತ್ ಗಾಬರಿಲ್ ಮೈತ್ರೀ ಮೋಳೆ ಎನ್ನ ಮಾಡಿಯಂಡಿಯವಾ ಎಣ್ಣೆತ್ ಮುತ್ತಕ್ಕೀಂದ್ ಕೂತಟ್ಟತ್. ಬೆರಿಯ ಡಾಕ್ಟರ್ಕ್ ಪೋನ್ ಮಾಡ್ಚೆಣ್ಣೆಚಿ. ದಾರ್ಕೇಂಗಿ ಗೊತ್ತಾಚೇಂಗಿ ಕಷ್ಟಾಂದ್ ಬೆರಿಯ ಕಾಕಿಡ್ತಂಡ್ ಮುತ್ತಕ್ಕಿಯೋಡೆ

ಡಾಕ್ಟರ್ ಬಪ್ಪಾಂಗ್ ಮಿಂಞಿಲೇ ಅವಂಡ ಶಾಪ್‌ಕೆತ್ತಚಿ. ಡಾಕ್ಟರ್ ಬೆರಿಯ ಓರ್ ಇಂಜೆಕ್ಷನ್ ಕೊಡ್‌ತತ್. ಗಾಬರಿ ಬೋಂಡ ನಿಂಗ ಬೆರಿಯ ಕಾಕಿಯ ಬಂದದ್ ನಲ್ಲದಾಚೀಂದ್ ಎಣ್ಣೆಚಿ. ಮುತ್ತಣ್ಣ ವಿಷಯತ್ತನ ಡಾಕ್ಟರ್‌ರ ಕೂಡೆ ಎಣ್ಣೆಚಿ. ಡಾಕ್ಟರ್ ಇಕ್ಕ ಇದ್‌ನ ಎಡ್‌ಪಕಯ್ಯುಲೇಂದೂ, ನಿಂಗ ಬೆರಿಯ ಆ ಕ್ಕಣ್ಣನ ತೇಡಿತ್ ಮಂಗಳ ಮಾಡೀಂದೂ ಬುದ್ಧಿವಾದ ಎಣ್ಣೆಚಿ. ಎಲ್ಲಾಂಗೂ ಮಂಡೆ ಆಟಿತ್ ಪಿತ್ಯಾಂದ್ ಆಸ್ಪತ್ರೆಂಜಿ ಬಯ್ಯಕ್ ಬಾತ್.

ಇಲ್ಲಿಯೇ ಉಂಡೇಂಗಿ ನಾಡ ಮಾನಮೂಂದ್ ಕಾಸ್‌ಕ್ ಆಯಿಪೋಪ ಎನ್ನೇಂಗಿ ಬೋರೆ ಉಪಾಯ ಮಾಡ್‌ನಾಂದ್ ಗೇನ ಮಾಡ್‌ಚಿ. ಮೈತ್ರಿಕ್ ಬಯ್ಯವಕ್ ಪೋಯಿಲೆ. ಚಾವದೊಂದೇ ಪರಿಹಾರ ಅಲ್ಲ. ನೀನ್ ದಂಡ್ ದೋಶಕ್ ಗುರಿ ಆಪಂಜಿಯಾ. ವಯಸ್ಸು ಕಾಲಕ್ ನಂಗಕ್ ನಲ್ಲ ಟಾನಿಕ್ ಆಪಂಕಿಂತ್. ಅಣ್ಣನೂ ತಂಗೆಯೂ ನಂಗಡ ದುಃಖಕ್ಕೆ ಪುಟ್ಟಿ ಬಂದನ್ನನಾಚಿಂದ್ ಉದ್ದಕ್ ಭಾಷಣ ಬಿಗಿದಿತ್ ತಾಂಡ ಚೆಡಿನ ಪಾರಬೂಕಿಯಂಡತ್ ಮುತ್ತಣ್ಣ. ಮೈತ್ರಿಕ್ ಇಕ್ಕ ತಾಂಡ ತಪ್ಪಾರ ಅರಿವಾಯ್ ಬುಗ್‌ಡ್‌ಕಳಿ ಎಲ್ಲಾ ಮಾಯವಾಯ್ ಬಲ್ಯ ಬುದ್ಧಿವಂತೆರನ್ನೆ ಗಾಂಭೀರ್ಯತ್ ಇಪ್ಪಾನ ಕಂಡಿತ್ ಮುತ್ತಕ್ಕಿ" ಈ ಬುದ್ಧಿ ಮಿಂಞಿಲೇ ಇಂಜಿತಿಂಜಕ ಎನ್ನಾಪಕಿಂತ್ ಮೂಡಿ ಆಂಗೇ ಪೆರಿಯವು ಎಣ್ಣೆಯೆ " ಅಟ್ಟಿ ಪಿಂಞ ಒಲೆ ಕತ್ತಚಿ ಕೆಟ್ಟಿ ಪಿಂಞ ಬುದ್ಧಿ ಬಾತ್‌ಂದ್ " ಎಲ್ಲಾನ ನೋಟ್ಟಕ್ಕ ಈ ಅವ್ವ ದೊಡ್ಡಿ ಒಂದುಂಡಲ್ಲ. ನಾಕ್ ಓರ್ ಚಾವೇಂಗಿ ಬಂತುಂಡೇಂಗೀಂದ್ ಎಂಗ್ಯಂಡ್ ಅಳತತ್. ಅವ್ವನೋ ಅಪ್ಪನೋ ಓರೆಗಣ್ಣಲ್ ನೋಟಿಯಂಡ್ ಮುಂಡತೆ ಅಳತತ್ ಮೈತ್ರಿ. ಇಂಞಿ ಚಾವಂತ ಕೆಲಸ ಮಾಡುಲೇಂದ್ ದಂಡಾಳ್‌ಕ್ಕೂ ಭಾಷೆ ಕೊಡ್‌ತತ್ ಮೈತ್ರಿ.

ಓರ್ ವಾರ ಮುತ್ತಣ್ಣ ಎಲ್ಲಿಕೋ ಪೋಯ್ ಬಾತ್. ಪೋನ ಕೆಲಸ ಆಯಿತಿಲ್ಲೇಂದ್ ಮಾತ್ರ ಎಣ್ಣೆಚಿ. ಬಹುಶ್ ಪ್ರೀತನ ತೇಡ್ಡಕ್ಕ ಪೋಯೇಂದ್ ಮೈತ್ರಿಕ್ ಗೊತ್ತಿಂಜತ್. ಅವ ಚಾಲಾಕಿ ಪಪ್ಪಂಡ ಕಣ್ಣಕ್ ಬೂವತ್ತನ್ನೆ

ಎಲ್ಲಿಯೂ ತಪ್ಪಾಚಿಟ್ಟಿಕ್ಕೊಂದ್ ಗೊತ್ತಿಂತೆ. ಆಚೇಂಗಿಯೂ ಮೈತ್ರಿಕ್ಕ್ ಒಳ್ಳಲ್ ಓರ್ ಆಸೆ ಅವ ಬಪ್ಪ ಈ ಕುಂಞಿನ ಪಾಳಕುಲೆ. ಪಪ್ಪ ಮಮ್ಮ ಚಾಕತೆ ಪೋಚೇಂಗಿಯೂ ನಾನ್ ಎನ್ನನೆ ಆಚೇಂಗಿಯೂ ಚಾಕುವಿ. ಇದೇ ನಾಡ ಜೀವನ. ಆಂಗಾಯ್ ನಾನ್ ಎನ್ನ ಕಷ್ಟ ಬಾತೇಂಗಿಯೂ ಎದರ್ ಚಿಡುವಿಂದ್ ಧೈರ್ಯಬಂತಿಂತೆ.

ಒನ್ನಾಂದ್ ಬೈಟ್ ಉಂಡಿತಾನ ಪಿಂಞ ಮುತ್ತಣ್ಣ ಮೋವಳ ಅಳ್ ಪಾಚಿಟ್ಟಂಡ್ " ನೋಟ್ ಮೋಳೆ ನಂಗ ಚೆನ್ನ ದಿನಕ್ಕ್ ಬೋರೆ ಊರ್ಕ್ಕ್ ಪೋಯಿತ್ ಇಕ್ಕನಾ. ಇಲ್ಲಿ ಉಂಡೇಂಗಿ ನಂಗಡ ಸ್ನೇಹಿತಂಗ ಬೆಂದು ಚಂಜಾಂದಿಯ ಬಂದಂಡ್ ಪೋಯಂಡಿಪ್ಪಕ್ಕ ಸೆರಿಯಾಪಾಲೆ. ಆಂಗ್ ನಾಳೆಯೇ ನಂಗಪ್ಯಾಕ್ ಆಂಡು. ದಾರ್ಕ್ಕೂ ಗೊತ್ತಾಪಕಯ್ಯಾಂದ್ ಎಣ್ಣೆ ಚಿ. ಮೈತ್ರಿ ಇಕ್ಕ ಒಂದಾಂಗೂ ಎದರುತ್ತರ ಮಾಡ್ವಂಜಿಲೆ.

ಅನ್ನನೇ ಚೆನ್ನೆಕ್ಕ್ ಬಂತೆ ಮೈತ್ರಿಕ್ಕ್ 9 ತಿಂಗ ದುಂಬುವದೇ ಓರ್ ಪ್ರೈವೇಟ್ ನರ್ಸಿಂಗ್ ಹೋಂಕ್ಕ್ ಕೂಟ್ ಚಿ. ಚಾಯುಳ್ಳ ಓರ್ ಮೂಡಿ ಕುಂಞಿನ ಪೆತ್ತೆತ್. ಮುತ್ತಣ್ಣ ಮಿಂಞಾಲೇ ಏರ್ಪಾಡ್ ಮಾಡಿಂಜ ಪೋಲೆ ಓರ್ ಚರ್ಚ್ಕ್ ಆ ಕುಂಞಿನ ಎತ್ತ ಚಿಟ್ಟೆತ್. ಪ್ರಜ್ಞೆ ಬಂದ ಪಿಂಞ ಮೈತ್ರಿ ಕುಂಞಿನ ಕೇಟಿತ್. ಅದ್ ಪೊಟ್ಟೆಲೇ ಚತ್ತ ಪೋಯಿತಿಂತೂಂದೂ ನೀನ್ ವರಕಾರ ಪಿಲ್ಸ್ ಎಡ್ತಾಂಗ್ ಆದ್ ಊನತ್ತೋಡೆ ಇಂಜತ್ತಂದೂ ಮುತ್ತಕ್ಕಿ ಪೊಟ್ಸ್ ಪರಂದತ್. ನೇರೇಂದ್ ನಂಬ್ನ ಮೈತ್ರಿ ಮಂಕಾಯಿರ್ತ್ ಪ್ರೀತಂರ ಪೆದಕ್ಕ್ ಆ ಕುಂಞಿನೇಂಗಿ ಬೆಚ್ಚಂಡಿಜಕ ದೇವ ಅದ್ನೊ ತಂದ್ ಲೆಲ್ಲಾಂದ್ ಕೊರಗಾಲೇ ಏಳನೇ ದಿನ ಆಸ್ಪತ್ರೆಂಜಿ ಬಾತ್. ಓರ್ ತಿಂಗ ಆಪಕ್ಕಲೇ ವಾಪಾಸ್ಸ್ ಬಂದರ್ತ್ ಬೆಂಗಳೂರ್ಕ್ಕ್. ಮುತ್ತಣ್ಣ್ ಎಂತೋ ಆಪರೇಶನ್ಂದೂ ಆಂಡಡೆಲ್ ಮೈತ್ರಿ ಓರ್ ಟ್ರೈನಿಂಗ್ ಎಡ್ತಂಡತ್ಂದೂ ಇಲ್ಲಿಯ ತೇರಯಿಂಗಳ್ಕ್ ಬಲ್ಯ ಪೊಟ್ಟೇ ಪರಂದತ್. ಮಧ್ಯ ಮಧ್ಯ ಮುತ್ತಣ್ಣ ಚೆನ್ನೆಕ್ಕ್ ಪೋಯಿತ್ ಕುಂಞಿನ

ನೋಟಿಯಂಡ್ ಬಪ್ಪಂತ್ ಮೈತ್ರಿ ಒಬ್ಬಳೇ ಅಳತಂಡ್ ಅಪ್ಪವ್ವಂಗೆ ನಾನ್ ಬೇಚಾರ್ ಮಾಡಿಟಲ್ಲಾ!... ಪ್ರೀತಂ ಎಲ್ಲಿಕ್ಕ ಪೋಯಿತಿಕ್ಕು, ಇನ್ನನೆ ಗೇನಮಾಡೀ ಮಾಡೀ ಲಾಚಾರಾಯಿತಿಂತ್. ಒಮ್ಮ ಅವಡ ಪುಂಡ್ ಎಂತೋ ತಕ್ಕಲ್ ನಾನ್ ಡೆಲ್ಲಿಕ್ಕ ನಾಡ ಪುಂಡ್‌ರ ಮಂಗಲಕ್ಕ ಪೋನಲ್ಲಿ ಇಲ್ಲಿ ಇಂಜತಲ್ಲ! ಪ್ರೀತಂ ಅವನೂ ಅವಂಡ ಪೊಣ್ಣ ಕುಂಞಿನ ಕಂಡಂದೆಣ್ಣುವಕ ಮೈತ್ರಿಕ್ ಮೇಲ್ ಪುಳಿಗುಟ್ಟ್‌ಚಿ. ಛೇ... ಎಂತಾ ನೀಚನವ. ನಾನವನ ಪುನಃ ಬಕ್ಕುಂದ್ ಗೇನಮಾಡ್‌ನಲ್ಲಾ! ಆಣ್ ಕುಲತ್‌ನೇ ನಾಶ ಮಾಡುವಚ್ಚಕ್ಕ ರೋಷ ಬಾತವಕ್ಕ. ಆಚೇಂಗಿ ಎನ್ನ ಮಾಡುವ "ಪೊಣ್ಣ ಅಬಲೆ"ಂದೆಣ್ಣುವದ್ ಇಲ್ಲಿ ಸತ್ಯ.

ಮೋವ ಎಲ್ಲಾನೋ ಮರಂದಿತಿಕ್ಕುಂದ್ ಒಮ್ಮೊಮ್ಮ ಮಂಗಲತ್ತರ ಸುದ್ದಿ ಎಡ್‌ಪಂತ್ ಮುತ್ತಕ್ಕಿ. ಅಲ್ಲವ್ವಾ! ಆನದ್ ಆಚಿ ನಂಗೆಕ್ ವಯಸ್ಸ ಮಿಂಞಿಕಲ್ಲತೆ ಬಯ್ಯಕುಂಡಾ. ನೀಕ್ ಓರ್ ಬಟ್ಟೆಮಾಡಂಡವ್ವಂದೆಣ್ಣುವಕ ಕಣ್ಣಲ್ ನೀರ್ ಪೊಳೆಯಾಯ್ ಒಕ್ಕುವಂಜದಲ್ಲತೆ ಉತ್ತರವೇ ತಪ್ಪಂಜಿಲೆ. ಎಲ್ಲಾದೇವಕ್ಕ ಪರಕೆಮಾಡಿಯಂಡ್ ಮುತ್ತಣ್ಣನೂ, ಮುತ್ತಕ್ಕಿಯೂ ಮೋವಡ ನಲ್ಲಾಮೆನ ಕಾತಳಾತತ್.

ಅಂತಾ ಸಮಯತ್ ವಿವೇಕಂಡ ತಂದ್ ಮರುಭೂಮಿಲ್ ನೀರ್ ಕಂಡನನ್ನಾಚಿ ಆ ದಂಪತಿಯಕ್ ವಿವೇಕ್ ಸೋಮವಾರಪೇಟೆರ ಪ್ಲಾಂಟರ್ ಕಾವೇರಪ್ಪಂಡ ಒಂದುಳ್ಳ ಮೋವ, ಚಾಯಿಕಾರ , ಉದ್ದ ಬಣ್ಣ ಎಲ್ಲ ಚಾಯಿಂತ್. ನೋಟುವಕ್ಕೂ ಆಕರ್ಷಣೆ ಇಂಜತ್. ಪಣ ಉಳ್ಳಲ್ಲಿ ಗುಣ ಇಪ್ಪಾಲೆಂದೆಣ್ಣುವ ತಕ್ಕಕ್ಕ ಇವ ವ್ಯತಿರಿಕ್ತವಾಯಂತ್. ಚೆರಿಯಾತ್ ಸೋಮವಾರಪೇಟೆ ಕಾನ್ವೆಂಟ್‌ಲೇ ಓದಚೇಂಗಿಯೂ ಅಲ್ಲಂಜಿ ಊಟಲ್ ಓದಿತ್ ಇಂಜಿನಿಯರಾಯ್ ಚೆನ್ನೆಲೇ ಇಂಜಲ್ಲಿ ಈ ಮೈತ್ರಿರ ಪರಿಚಯ ಬೆಂಗಳೂರ್‌ಕಾರ್ತಿ ಆಚೇಂಗಿಯೂ ಮಡಿಕೇರಿ ಕೊಡವ ಸಮಾಜತ್ತರ

ಮಂಗಳತ್ ಆದ್ಯತ್ ಇಯಂಗಳ ಬೆಂದೂರ್ತ್‌ಕ್ ಬಟ್ಟೆ ಕಾಟಿತಿಂತ್.

ಕಾವೇರಪ್ಪ ಪ್ಲಾಂಟರ್ಸ್ ಕ್ಲಬ್‌ರ ಪ್ರೆಸಿಡೆಂಟಾನ ಪಿಂಇ ಮನೆ ವ್ಯವಹಾರ ರೈಟರ್ ಜೋಯಪ್ಪಂಡ ಪಾಲ್‌ಕ್ ಬುದ್ಧತ್. ವಿವೇಕ್ ಮನೆಕ್ ಬಂದಕ್ಕಲೂ ಬೆಂದ್ ಕಳನ್ನೇ ಆಯಿತಿಂತ್ ಅವ್ವ ಬಂದಕೆಲ್ಲಾ ಅಲ್ಲಿ ಇಲ್ಲಿ ಪ್ಲಾಂಟರ್ಸ್‌ಡ ಮೂಡಿಮಕ್ಕಡ ವಿಚಾರ ಪರಂದತೇಂಗಿಯೂ ಅವಂಗ್ ಒಂದಾಲೂ ಇಷ್ಟ ಇಲ್ಲತನ್ನೆ ಕಳಿಪಂತ್. ಅವ್ವಂಡ ಹರಕ್ ಮದಾಪುರತ್ತ ಮಂಡೇಟಿರ ಓರ್ ಮೂಡಿನ ನೋಟ್‌ನದ್ ಅಲ್ಲತೆ ಇಂಇ ಒಂದಾಂಗೂ ಮನಸ್ಸಡತ್ತೆ ಏರದಿನ ಮನೆ ಉಂಡೇಂಗಿ ಕಷ್ಟಾಂದ್ ಬೆರಿಯ ಬಯ್ಯಕ್ ಪೋಯಿರುವಂತ್. ಅವ್ವನೂ ಅಪ್ಪನೂ ಚೋತಿತ್ ನೀನ್ ಇಲ್ಲಿಕೇ ಬಂದ್‌ರ್ ನಂಗಕ್ ಮದೀ ಆಯ್ತೆಂದ್ ಎಣ್ಣಕ ನಿಂಗಳೇ ಅಲ್ಲಿಕ್ ಬಂದ್‌ರಿ ಅಕ್ ನಾಕೂ ನಲ್ಲದಾಪಲ್ಲಂದ್ ಮರು ಸವಾಲ್ ಇಟ್ಟುಂಡಿಂಜಲ್ಲಿ ಮೈತ್ರಿನ ಒತ್ತಂಡ್ ಅವ್ವಂಗ್ ಪೋನ್ ಮಾಡುವಕ ಅಬ್ಬ... ಅಂತೂ ಏದೇಂಗೊಂದಾನ ಒತ್ತಂಡತಲ್ಲಾಂದು ಬೆರಿಯ ಓಡಿಕ್‌ಚಿತ್ ಗೌಜಿಲೇ ಕ್ಯಾಪಿಟಲ್ ವಿಲೇಜ್‌ಲ್ ಮಂಗಳವೂ ಮಾಡ್‌ಚಿ.

ಮುತ್ತಣ್ಣಂಗ್ ಒಳ್‌ಲ್ ಓರ್ ಅಂಜಿಕೆ ಇಂಜಿತೇ ಇಂಜತ್. ಮೈತ್ರಿ ಎನ್ನಂಗೋ ಎಣ್ಣಾಗೆಲ್ಲ ಒತ್ತಂಡ್ ಸಹಕರ್‌ಚಿಟ್ಟಿದ್ ಆಶ್ಚರ್ಯವೂ ಆಚಿ. ಪಿತ್ಯಾಂದ್ ಬಯ್ಯಕ್ ಬಪ್ಪಕ ಕಾವೇರಪ್ಪಂಡ ಕೂಡ ನಿಂಗಡ ಕ್‌ಣ್ಣ ನಂಗಡ ಕುಂಇನ ಕುಶಿಪಟ್ಟಿತ್ ಮಂಗಳವೂ ಆಚಿ. ನಂಗ ಒಂದುಳ್ಳ ಮೋವಂದ್ ಕೋಪಟೆಲ್ ಚಾಕಿತ್ ಎನ್ನೇಂಗಿ ತಪ್ಪ್ ಮಾಡ್‌ನಕ ತಿದ್ದಿಯೋಳಿಂದೆಲ್ಲ ಮೂಮೂಲ್ ನನ್ನನೆ ಎಣ್ಣೆವಕ್ಕಲೇ ಅವ ಅದೆಲ್ಲ ನಂಗೊತ್ತಿಲ್ಲೆಯಾ, ಇವನೂ ಅಚ್ಚಕೇ ಬಾರೀ ಸಾಧು ಓರೂ ಅಭ್ಯಾಸ ಇಲ್ಲೆ. ಅಯಿಂಗ ಮತ್ಯಾಂದೇ ಚೆನ್ನೆಕ್ ಪೋಯಿರುವಾ. ಅಲ್ಲಿ ಸ್ವಂತ ಮನೆ ಉಂಡ್ ಆಳು ಕಾಳುನ ಎಲ್ಲಾ ಉಂಡ್. ನಂಗಳೂ ಜೊತೆಲೇ ಪೋಯ್ತೆ ಓರ್‌ವಾರ ಇಪ್ಪಂಜಿ ಬಪ್ಪ ನಿಂಗಕ್ ವರೀಸೇ ಬೋಂಡಂದ್ ಎಣ್ಣೆಚಿ.

ಮೈಮಳ ಕಾವೇರಿಕ್ಕೂ ಕುಶಿ ಆಚಿ. ಕ್ಲಬ್ಬಲ್ ಎಲ್ಲಾಕೂ ಕಾಟಂಡುಂದೆಲ್ಲ
ಇಂಜತೇಂಗಿಯೂ ಮೋವಂಗ್ ಇಷ್ಟಿಲ್ಲತಾಂಗ್ ಗೋಣಗಿಯಂಡೇ ಮುಂಡತಾಚಿ.

ಅಲ್ಲಿ ಮುತ್ತಕ್ಕಿಯೂ ಅಲ್ಲ... ಚೆನ್ನೆಲ್ ಎಲ್ಲೆಂಗಿ ಪ್ರೀತಂ ಇಕ್ಕುವಾ?
ಅಲ್ಲಿ ಎನ್ನೇಂಗಿ ಕಂಡತೇಂಗಿ ಈ ಮೂಡಿ ಪಳೆಯ ಚಾಲ್ ಎಡ್ತಕ ನಂಗಡ
ಮಾನ ಮರ್ಯಾದೆ ಎನ್ನಾಕು? ಈಶ್ವರಾ, ಇಗ್ಗುತಪ್ಪಾ ನಲ್ಲ ಬಟ್ಟೆ ಕಾಟಪ್ಪಾಂದ್
ಮನಸ್ಸಲೇ ದೇವಳ ತೊತ್ತಂಡ್. ಮನೆ ಮುಟ್ಟಿತ್ ಪೋಪಕ ಬೋಂಡ್ಯ
ಬುದ್ದಿವಾದ ಎಣ್ಣಿತ್ ಅಯಿಚತ್. ಎಲ್ಲಾಂಗೂ ಮಂಡೆ ಆಟ್‌ಚಿ.

ಚೆನ್ನೆಕ್ಕು ಪೋಯಿತ್ ಆರ್‌ತಿಂಗ ಚಾಯೋಡೆ ಇಂಜತ್. ದಿನಕ್ಕೊಮ್ಮೊ
ಪೋನ್ ಮಾಡುವಂಜತ್ ಮೈತ್ರಿ.

ಒನ್ನಾಂದ್ ವಿವೇಕ್ ಮುತ್ತಕ್ಕಿನ ಅರ್ಚೆಂಟ್ ಚೆನ್ನೆಕ್ ಬಪ್ಪಕ್ ಪೋನ್
ಮಾಡ್‌ಚಿ. ಕಾರಣ ಎಂತೇಂಗಿ ಬೋರೆಯಾಂದ್ ಬೊತ್ತ್‌ಚಿ ಮುತ್ತಣ. ಅಲ್ಲಿ
ಎಲ್ಲಾರ್‌ಕ್ಕು ವೈರಲ್ ಫಿವರ್ ಇಂಜದ್ ಮೈತ್ರಿಕ್ಕು ಬಂತ್ ಓರ್ ವಾರ
ಆಚೇಂಗಿಯೂ ಬುಡತಿಪ್ಪಕ ಡಾಕ್ಟರ್ ಎಡ್ಡಿಟ್ ಮಾಡುವಕೆಣ್ಣಿತ್ ಒರ್
ನರ್ಸಿಂಗ್ ಹೋಂಕ್ ಕೂಟಿತ್ ಮಾವಿಕ್ಕು ವಿವೇಕ್ ಪೋನ್ ಮಾಡಿಯೆ.
ಅವಂಗ್ ರಜ ಇಲ್ಲತಾಂಗ್ ಅವಡ ಕೂಡೆ ಇಪ್ಪಕ್ ಮುತ್ತಕ್ಕಿ ಪೋಚಿ. ಆಸ್ಪತ್ರೆಂಜಿ
ಪೊಲಾಕ ಮುತ್ತಕ್ಕಿ 10 ಗಂಟೆಕ್ಕು ಮನೆಕ್ಕು ಬಾತೇಂಗಿ ಕುಳಚಿತ್ ಉಂಡಿತ್
ರೆಸ್ಪ್‌ಮಾಡಿತ್ 4 ಗಂಟೆಕ್ಕು ಪೋಪಂತ್. ಅಕ್ಕಣೆ ಅಲ್ಲಿ ಓರ್ ನರ್ಸ್‌ನ
ಮಾಡಿತಿಂತ್. ಇದ್ ವೈರಲ್‌ಫಿವರ್ ಅಲ್ಲ ಪ್ಯಾರಾ ಟೈಫಾಯಿಡ್‌ಂದ್ ಪಿಂಞ
ಅಲ್ಲೇ ಇಕ್ಕಂಡಿಯಾಚಿ ಅನ್ನನೇ ಒನ್ನಾಂದ್ ಬಂದ ಓರ್ ನರ್ಸ್ ಮೈತ್ರಿನ
ಗೊತ್ತಂಡುಂದೂ ಎಣ್ಣೆಚಿ. ಮೈತ್ರಿಕ್ಕು ಒಮ್ಮಲೇ ಪನಿ ಬುಟ್ಟಿನ್ನನಾಚಿ
ಅಪ್ಪರಿಪ್ಪರ ನೋಟ್‌ಚಿ. ಅಕ್ಕುವಾ ನಿನ್ನ ನಾಕ್ ಗೊತ್ತಿಲ್ಲೆಲ್ಲಾ ನೀನ್ ದಾರ್‌ನೋ
ನಾನ್‌ಂದ್ ಗೇನಮಾಡಿಯಾ. ನಾಡ ಮಂಗ್‌ಲಾಯೆದೇ 6 ತಿಂಗಳ್ ಬಯ್ಯಂದ್
ತಕ್ಕು ಪಾರ್‌ಚಿಡುವಕ್ಕು ನೋಟ್‌ಚಿ. ಇಲ್ಲೆ ನಾನ್ ಇಂಜ ನರ್ಸಿಂಗ್ ಹೋಂಕ್

ನಿಂಗಳೇ ಬಂದಿಯೆ. ನಿಂಗ ಕೊಡಗ್ಕಾರ ಅಲ್ಲ... ನಿಂಗಡ ವಿಚಾರ ಎಲ್ಲ ಎಣ್ಣೆತೇ ಅಲ್ಲಿಕ್ ಕೂಟಿಂತಿಂಜಿಯೆ. ನಿಂಗಡ ಕುಂಞಿನ ನಾನೇ ಚರ್ಚಲ್ ಫಾದರಕ್ಕ ಕೊಡ್ತಿಯೇಂದ್ ಎಣ್ಣೆತ್ ಮೈತ್ರಿಕ್ ಶಾಕ್ಮಾಡ್ಚಿ.

ಮೈತ್ರಿಕ್ ನಾನೆಲ್ಲಿ ಉಳ್ಳ ಎಂತದ್ ಮರಂದ್‌ರುವಂಜಿ ಅಕ್ಕುವಾ ಎಲ್ಲಿ ಎಲ್ಲಿ ಉಂಡ್ ನಾಡ ಕುಂಞಿ ನಾಕಿಕ್ ನೋಟಂಡುಂದ್ ಎಣ್ಣೆಯಂಡ್ ಕೂತ್‌ಡುವಕ್ಕೂಡ್ಚಿ. ಆ ನರ್ಸ್‌ಕ್ ಇಕ್ ತಾಂಡ ತಪ್ಪರ್ ಅರಿವಾಚಿ. ಎನ್ನ ಮಾಡಡ್‌ಂದ್ ಗೊತ್ತಾಕತೆ ಸಮಾಧಾನ ಮಾಡ್‌ಚಿ. ಊಹುಂ.... ಒಂದಾಂಗೂ ಬಗ್ಗಲೆ ಮೈತ್ರಿ. ಬೆರಿಯ ದಂಡ್ ವರಕರ್ ಪಿಲ್ಸನ ಮುಗ್ಗ್ ಚಿಟ್ಟತ್. ಅದ್ ಕೆಲಕ್ ಪೋನದು ಮಂಕಾಚಿ ಮೈತ್ರಿ. ಬೆರಿಯ ಬೆವರ್ ತೀಟಿಯಂಡ್ ಒಮ್ಮೆ ಇಲ್ಲಿಂಜಿ ಜಾಗ ಖಾಲಿಮಾಡ್‌ಚೇಂಗಿ ಮದೀಂದ್ ಬೋರೆ ನರ್ಸ್‌ನ ಕಾಕಿತ್ ನಾಕ್ ಬೋರೆ ವಾರ್ಡ್‌ಲ್ ಕೆಲಸ ಉಂಡ್ ನೀನಿಲ್ಲಿರ್‌ಂದ್ ಬದಲ್ ಮಾಡಿತ್ ಪೋಯಿರ್‌ತ್ ಅವ.

ನಾಲ್ ಗಂಟೆಕ್ ಮುತ್ತಕ್ ಬಪ್ಪಕ ಮೈತ್ರಿ ವರಿಯಂಡಿಂಜತ್. ರೌಂಡ್ಸ್ ಬಂದ ಡಾಕ್ಟರ್ ಅವಳ ನೋಟುವಕ್ ಬುಟ್ಟ ಪನಿ ಪುನಃ ಬಂದಾನ ಕಂಡಿತ್ ಇದೆನ್ನಂಗ್ ಇನ್ನನೆ ಆಚಿಂದ್ ಎಳಾದ್‌ನ ಪಿಲ್ಸನ ಬದಲ್ ಮಾಡ್‌ಚಿ. ಮೆಲ್ಲೆ ಮಂಕ್‌ಮಂಕಾಯ್ ಅಂಜಿ ಗಂಟೆಕ್ ಎಚ್ಚರಾಚಿ. ಅಕ್ಕಲೂ ಎಂತಾನೋ ಎಣ್ಣೆಯಂಡ್ ಸುತ್ತ ತೇಡುವಂತ್. ಎನ್ನಂಗವ್ವಾ ಎಂತೇಂಗಿ ತಿಂದಿಯಾ? ಪನಿ ಎನ್ನಂಗ್ ಜೋರಾಚೀಂದ್ ಕೇಟ ಮುತ್ತಕ್‌ನ ಕಣ್ಣ್ ಮರಚಂಡ್ ನೋಟಿತ್ ಒಮ್ಮೆಕೇ ಕಿರ್‌ಚ್‌ಟಿ. ನಾಡ ಕುಂಞಿ ನಾಡಕುಂಞಿಂದ್ ಅರ್ಥ ಆಕತೆ ಎಣ್ಣುವಂತ್ ಮುತ್ತಕ್‌ಕ್ ಎದೆ "ಜಗ್"ಂದ್ ಎಣ್ಣ್‌ಚಿ. ಪೋಡಿಯೂ ಆಚಿ. ಅಂದೇ ಪೋನ್ ಮಾಡಿತ್ ಮುತ್ತಣ್ಣನ ಬರ್ತಿಯಂಡತ್. ವಿವೇಕನೂ ಒಂದೂ ಅರ್ಥ ಆಕತೆ ಬೊರಂಡ್ ಪೋಚಿ. ಆ ನರ್ಸ್ ಮಾತ್ರ ಮರಂದಿತೂ ಆ ವಾರ್ಡ್ ಕತ್ತಟಿ ಬಂದ್‌ಲೆ. ಪಿತ್ಯಾಂದ್ ಅಲ್ಲಿ ಯೇ ಬೋರೆ ಭಾಗತಿಂಜ ಸ್ವೇಯಾಷ್ಟಿಕ್‌ರ್

ಪಕ್ಕ ಕಾಕಿಯಪೋಚಿ. ಅಲ್ಲಿ ದಂಡ್‌ದಿನ ಆಕಿಯಂಡ್ ವಿಷಯತ್ತನ ವಿವೇಕಕ್ಕ ಎಣ್ಣೆಚಿ. ಇವಡ ಕುಂಞಿ ಎದೋ ಫಾದರ್‌ರಲ್ಲಿ ಉಂಡ್‌ಂದೂ ಅದ್‌ನ ಅವ ನೋಟುವಕ್ಕ ಇಷ್ಟಪಡುವಾಂದೂ ಅದ್‌ ಮಾಡತೆ ಪೋನಕ ಇದ್‌ ಪುಚ್ಚಿ ಆಪಕ್ಕ ಬಟ್ಟೆ ಉಂಡ್‌ಂದೂ ಎಣ್ಣೆಚಿ.

ಮಂಡೆಕ್ಕ ಕೈಕೊಡ್‌ತಿತಳತ ಮೈಮನ ತಕ್ಕ ಪರಿಚಿಡುವಕೂ ಬೊತ್ತ್‌ಚಿ ಮುತ್ತಣ. ವಿಧಿ ಇಲ್ಲತೆ ಅವಂಗ್ ವಿಚಾರ ಎಣ್ಣೆಚಿ. ಇಕ್ಕ ಎನ್ನೆಂಗಿ ಮಾಡಿತ್ ನಂಗಡ ಮೋವಳ ಬಚಾವು ಮಾಡ್‌ಂದ್ ಮಕ್ಕಡನ್ನೆ ದಂಡಾಳೂ ಮೊರಟತ್. ವಿವೇಕ್ ಅಪ್ಪವ್ವಂಗ್ ವಿಚಾರ ಅಪಾಲೆ. ವಾರ್ಡ್‌ಕ್ಕ ಬಂದ ಪಿಂಞ ಮುತ್ತಕ್ಕಿ ಬೊತ್ತ್‌ಚಿಟ್ಟತ್, ನೊಣೇ ಮಾಡ್‌ಚಿ. ಒಂದಾಂಗೂ ಒತ್ತಂಡ್‌ಲೆ ವಿವೇಕ್ ನನ್ನ ಬುಟ್ಟತೆಂಗಿಯೂ ಪರೋಲೆ ನಾಕ್ ನಾಡ ಕುಂಞಿನ ಕಾಟಿತಾರಿ, ಒಮ್ಮೆ ಒಮ್ಮೆ ನೋಟಿರುವಿ. ಪಿಂಞ ನಾನ್ ತೊಂದರೆ ಮಾಡುಲೆಂದ್ ಕೈಜೋಡ್‌ಚಿಟ್ಟತ್. ಕೇಟ್‌ವಂತ್. ನಾಡ ಕುಂಞಿನ ಚಿತ್ತ ಪೋಚೀಂದ್ ಪೊಟ್ಪ್ ಪರಂದಿರಾ? ನಿಂಗಳೂ ಓರ್ ಮನುಷ್ಯರಾ? ನಾನ್ ಮಂಗ್‌ಲವೇ ಆಪಕಿಂತಿಲ್ಲೆ. ಎಲ್ಲಾಂಗೂ ನಿಂಗಳೇ ಹೊಣೆಂದ್ ಜೋರೇ ಮಾಡುವ ಕೂಡ್‌ಚಿ.

ವಿವೇಕನ ಕಾಂಬಕ "ನನ್ನ ಮನ್ನಾಚಿಡ್. ನಾನ್‌ಮೋಸ ಮಾಡಿಟ. ನನ್ನ ಡೈವೋಸ್ ಮಾಡಿರ್. ಬೋರೆ ಎಲ್ಲೆಂಗಿ ನಲ್ಲ ಮೂಡಿನ ಮಂಗ್‌ಲಾಯ್ತ ಚಾಯಿಲಿರ್‌ಂದ್" ಕೈಜೋಡ್‌ಚಿಟ್ಟಂಡ್ ಮೊರಡುವಂತ್. ಆದ್ಯತ್ ವಿವೇಕ್‌ಕ್ ಇಂಗ ನಾಕ್ ಮೋಸ ಮಾಡೀರ್‌ತ್. ನಾಡ ಅಪ್ಪ ಅಪ್ಪಂಗ್ ಅರಾಂಜಕ ಎನ್ನಾಕು? ಅಯಿಂಗ ಏದೆಲ್ಲಾ ನಲ್ಲ ಮೂಡಿಯಳ ಕಾಟ್‌ಚಿ. ನಾನೆನ್ನಂಗ್ ಇವಕ್ಕ ಮರಳಾನ? ಛೇ..ಛೇ... ನಾನೇ ಅವಳ ಮೆಚ್ಚಿಯಂಡಿಯೆ. ನಾಡ ಆಂಟಿ ಇದ್ ಬೋಂಡ ಬೋರೆ ಮೂಡ ಮಾಡನಾಂದ್ ಈಂಗೇ ಎಣ್ಣೆಯೆಕಾಂಬ ಆ ಶಶಿ... ಕ್ಲೋಸ್ ಫ್ರೆಂಡ್‌ಂದ್ ಈನ ಮುಚ್ಚೀರ್‌ತಾ? ...ಅವಡದೂ ತಪ್ಪಿಲ್ಲೆ. ಡಿಗ್ರಿಕೆತ್ತನೆ ಒಕ್ಕಚೇ ಇಂಜತೆಂಗಿಯೂ ಈ ಮೂಂದ್‌ಕಾಲ ನಡಂದದ್ ಅವಕೆನ್ನ ಗೊತ್ತ್.

ಮೂಡಿಮಕ್ಕಡ ಮನಸ್ಸಿನ ಅರಿವದ್ ಕಷ್ಟಾಂದ್ ಈಂಗೇ ಪಂಡ್ ಪಳಂಜೊಲ್ಲುಳ್ಳಂದ್ ಕಾಂಬ. ಇಕ್ಕ ನಾನೆನ್ನ ಮಾಡಡ್ ಎಣ್ಣೆಚೋ ಮಾನಕೇಡ್. ಎನ್ನೇಂಗಿ ಮಾಡಿತ್ ಚಾಯಿ ಮಾಡುವಕ್ ಪೇಚಾಡಂಡುಂದ್ ಮಾವ ಮಾವಿಕ್ ಸವಾಧಾನ ಮಾಡಿತ್ ಮೈತ್ರಿಕ್ ಏದೆಲ್ಲೋ ತರತ್ ನಡಂದಾನ ಮರಂದ್‌ರೊಂದೂ ಆ ನರ್ಸ್ ಮುಂಡತೆ ಎಣ್ಣೆತಿಕ್ಕೊಂದೂ ಎಣ್ಣೆನೋಟ್‌ಚಿ. ಆಯಿಲೆ ಅವಡ ನಲ್ಲಾಮೆಕ್ಕೇ ನಂಗ ಇನ್ನನೆ ಪೊಟ್ಪ್ ಪರಂದಿಯೇಂದ್ ಅಯಿಂಗಳೂ ಎಣ್ಣೆಚಿ. ಮೈತ್ರಿಕ್ ಕುಂಞಿನ ಕಾಟುವದೊಂದೇ ಬಟ್ಟೆ ಇಕ್ಕ ಅಯಿಂಗಳ್ ಉಳಂದತ್. ದಿನೇ ದಿನೇ ಅವಕ್ ಪುಚ್ಚಿರ ಲಕ್ಷಣ ಜಾಸ್ತಿ ಆಚಿ. ವಿವೇಕ್‌ನ ಅಳಪ್‌ಚಿಟ್ಟುಂಡ್ ಕಾಲೇಜ್‌ಲ್ ಪ್ರೀತಂರ ಸ್ನೇಹ, ಮಂಗ್‌ಲಾಪೀಂದ್ ನಂಬ್‌ಚಿಟ್ಟದ್ ಒನ್ನಾಂದ್ ಎಣ್ಣೆತೇ ಊರ್ ಬುಟ್ಟಾನ ತೊರಂದ ಪುಸ್ತಕತ್ ನನ್ನನೆ ಬುಡ್‌ತೀ ಬುಡ್‌ತೀ ಎಣ್ಣೆತ್ ಇದ್‌ಲ್ ನಾಡ ತಪ್ಪುಂಡಾ?...ಂದ್ ಚೆರಿಯ ಮಕ್ಕಡನ್ನನೆ ಕೇಪಂತ್ . ಒಮ್ಮೇ ಒಮ್ಮೆ ನಾಡಕುಂಞಿನ ಕಾಟಿತಂದ್‌ರಿ ಇಂಞಿ ಕೇಪ್‌ಲೇಂದ್ ಬಂದಯಿಂಗಳ್ ಕಂಡಯಿಂಗಳೆಲ್ಲ ಕೇಪ ಕೂಡ್‌ಚಿ.

ಇಕ್ಕ ವಿವೇಕ್‌ಕ್ ಇದ್‌ನ ಇನ್ನನೇ ಬುಟ್ಟಕ್ಕ ನಾಕ್ ನಾಡ ಪೊಣ್ಣಿನ ಕಳಂದಂಡಿಯಾಪಂದ್ ಮಾವ ಮಾಂವಿರ ವಿಚಾರ ಎನ್ನ ಎಂತಂದ್ ಕೇಟರಿಂಜಂಡ್ ತಾನೇ ಸ್ವತಃ ಚರ್ಚೆಕ್ ಪೋಪ ಮನಸ್ಸುಮಾಡುವ. ಒನ್ನಾಂದ್ ಮೈತ್ರಿನ ಕಾಕಿಯಂಡ್ ಚರ್ಚೆಕ್ ಬಂತ ಫಾದರ್‌ಕ್ ವಿಚಾರ ಎಣ್ಣುವ. ಫಾದರ್ ಅದ್‌ನ ಅಚ್ಚಕ್ ಸುಲಭತ್ ಒತ್ತಂಡ್‌ಲೆ. ನಾನ್ ಮುತ್ತಣ್ಣಂಡ ತಕ್ ಪೋಲೆ ಇಲ್ಲಿ ಚಾಕಿಯಂಡುಳ್ಳ. ಎದ್ ಕಾಲಕ್ಕೂ ಕುಂಞಿರ ಅವ್ವಂಗೆ ವಿಚಾರ ಗೊತ್ತಾಪಕ್ಕಾಗಂದ್ ಭಾಷೆ ಕೊಡ್‌ತಿಯೆಂದೆಲ್ಲಾ ಎಣ್ಣೆಕ್ಕಲೂ ಇಕ್ಕ ಓರ್ ಜೀವತ್‌ರ ಉಳಿಕೆರ ಪ್ರಶ್ನೆಯಾನಾಂಗ್ ದೂರತ್‌ಂಜಿ ಕಾಟುವಿಂದೂ ಅವಡ ಮಾತೃಪ್ರದಯ ಕುಂಞಿ ಏದ್‌ಂದ್ ಅರ್‌ಂಜಿತ್ ನೋಟಿಯವಡ್‌ಂದೂ

ಎಣ್ಣೆಚಿ. ಕಾರ್ಲ್ ಮುಂಡತೇ ಅಳಾತ ಮೈತ್ರಿನ ಚರ್ಚೆ ಪೂ ತೋಟತ್ತರ
 ಕಲ್ಲ ಬೆಂಚ್ಲಾ ಅಳಾಪ್ಚಿಟ್ಟತ್ ವಿವೇಕ್. ಮೈತ್ರಿರ ಕಣ್ಣ ಓರ್
 ಪತ್ತೇದಾರಂಡ ಪೋಲೆ ಅಪ್ಪರಿಪ್ಪರ ತೇಡುವಂತ್. ಬೋಂಡೂಂದೇ ಅವಡ
 ಕೂಡೆ ತಕ್ಕಾಕ್ಳಂಜ ವಿವೇಕ್ ದೂರತ್ ನಾಲ್ ಮಕ್ಕಡ ಕೂಡೆ ಬಂದ ಫಾದರಾನ
 ಕಾಂಬದು ಎದ್ ನಿಂದ ಮೈತ್ರಿ ಅಯಿಂಗಡತ್ತಟ ಓಡ್ಚಿ. ಪಕ್ಕ ಎತ್ತುವಕ್ಕ
 ಒಮ್ಮೆಕೇ ನಿಂದತ್. ಓರ್ ಮೂಡಿ ಕುಂಞಿರತ್ತಟ ಕೈ ನೀಟಿತ್ ಇದೇ.. ಇದೇ
 ..ನಾಡ ಂದ ಉದ್ದೇಗತ್ತ ಎಣ್ಣಿತ್ ಮಂಕಾಚಿ. ಒಡನೇ ಪುಡ್ಚಂಡ್ ವಿವೇಕ್
 ಅಲ್ಲಿಯೇ ಪಿಲ್ಲ್ಲ್ ಅಳಾಪ್ಚಿಟ್ಟಂಡತ್. ಅಂಜಿ ನಿಮಿಷತ್ತ ಕಣ್ಣ
 ತೊರಂದಿತ್ ಎಲ್ಲರನೋ ನೋಟಿತ್ ಆ ಕುಂಞಿ ಕತ್ತಟ ಕೈ ನೋಟ್ಚಿ.
 ಫಾದರ್ ಕಣ್ಣ ಸನ್ನೆ ಮಾಡ್ಚಿ. ಎಡ್ತ ಬಂದ sweetsನ ಎಲ್ಲಾ ಮಕ್ಕಕೂ
 ವಿವೇಕ್ ಕೊಡ್ತತ್. ಮಕ್ಕಳ ಒಳಕ್ ಆಯಿಚತ್. ಅಲ್ಲಿಯೇ
 ನೋಟಿಯಂಡಿಂಜತ್ ಮೈತ್ರಿ. ಕಣ್ಣ ಅರಿಯತಾನ ಕರ್ ಅರಿವಾಂದ್ ಇದ್ಂಗೆ
 ಎನ್ನುವಾಂದ್ ವಿವೇಕಂಗಾಚಿ. ಅವಂಡ ಮನಸ್ಸು "ಚುರ್" ಎಣ್ಣೆಚಿ.

ಅಲ್ಲಿಂಜಿ ಚೆನ್ನ ಚಾಯಾಚಿ ಮೈತ್ರಿಕ್. ಆಚೇಂಗಿ ಮುತ್ತಕ್ಕಿನ ಕಂಡಕಾಗ.
 ಚಿಡ್ಚಿಡ್ಂದ್ ಕಳಿಪಂತ್ ವಿವೇಕ್ನ ಕಾಂಬಕ ಎಂತೋ ತಪ್ಪ್ ಮಾಡಿಯೇಂದ್
 ಅಪರಾಧಿ ಭಾವ ಕಾಂಬಂತ್ ಯಂತ್ರತ್ ನನ್ನನೆ ಓರ್ ಜೀವನ ಅವಡದಾಚಿ.
 ವಿವೇಕಂಡ ವಿಶಾಲ ಮನಸ್ಸಿನ ಮುತ್ತಣ್ಣ ಮುತ್ತಕ್ಕಿ ಮೆಚ್ಚಿಯಂಡತ್.
 "ಮೋಂವನ ಕಳಂದಂಡ ನಿಂಗ ಮೋವಕ್ಕ ಕೊಡ್ತ ಸ್ವತಂತ್ರತ್ನ
 ಸ್ವೇಚ್ಛಾಚಾರಕ್ ಬಳಸಿಯಂಡ್ ಬಟ್ಟೆ ತಪ್ಪನದ್ ಅವಡ ವಯಸ್ಸರ ಗುಣ,
 ಒಂದೂ ಅರಿಂಜವತೆ ಮನಸ್ಸನೋ ಅರಿವತೆ ಮಂಗ್ಲಾನದ್ ನಾಡದೂ
 ತಪ್ಪಂದ್" ವಿವೇಕಂಡ ಅಭಿಪ್ರಾಯ. ಇಕ್ಕ ತಿಂಗಕ್ಕೊಮ್ಮೆ ಚರ್ಚೆಕ್
 ಪೋಯ್ತ ದೂರತ್ತಿಂಜೇ ಕುಂಞಿ ನ ನೋಟಿತ್ ಎಂತೇಂಗಿ ಎಡ್ತ ಪೋಯ್ತ

ಕೊಡ್ತಿತ್ ಬಪ್ಪದ್ ಮಾಮೂಲಾಯಿತಿಂತ್. ಇದ್‌ಂಗ್ ದಾರೂ ಅಡ್ಡಿಮಾಡುವಂಜಿಲೆ. ಆನಗುಂಡ್ ಚೆನ್ನ ಶಾಂತಿ ಮನೆಲ್ ಉಳ್ಳನ್ನನೆ ಆಚಿ.

ಇಕ್ಕ ಇದೆಲ್ಲಾ ಆಯ್ತ್ ದಂಡ್‌ಕಾಲ, ಆನ ಪಿಂಞ ಇದೆಲ್ಲಾ ಎನ್ನಂಗೆಂದ್ ನಿಂಗಕಾಯ್ತಿಕ್ಕು. ಎಣ್ಣೆ ತಪ್ಪಿಕೇಳೆಂದ್ ತಾಂಡ ವಾಚ್‌ನ ನೋಟಿಯಂಡ್ ನಿಂಗಕ್ ತೊಂದರೆ ಆಚೇಂದ್ ಕಾಂಬ ಆಚೇಂಗಿ ನಾಕ್ ಎಣ್ಣೆ ತೆ ವಿಧಿ ಇಲ್ಲೆ.

ಒನ್ನಾಂದ್ ಒಬ್ಬಳೇ ಚರ್ಚ್‌ಕ್ ಪೋಯ್ತ್ ಬಂದಲ್ಲ್‌ಂಜಿ ಪನಿ ಬಂತ್ ಬುದ್ಧಂಡತ್. ಮಿಂಞಾಲೇ ಡಾಕ್ಟರ್ ಈ ವಿಚಾರತ್ತ್ ಎಚ್ಚರತಿಪ್ಪಕ್ ಎಣ್ಣೆ ತಿಂಜ ರೀತಿ ಪನಿ, ಜೋರ್ ಜೋರೇ ಆಯ್ತ್ ಪಳಿಯದ್ ಪುನಾರಾವರ್ತಿ ಆಚಿ. ಇದೆನ್ನಂಗೆ ಇನ್ನನೇಂದ್ ಚರ್ಚ್‌ಕ್ ಪೋಯ್ತ್ ಕೇಟಲ್ಲಿ ಅವ ಬಂದದ್ ಗೊತ್ತಿಲ್ಲೆಂದೂ, ಆಚೇಂಗಿ ಅವ ಏದ್ ಕುಂಞಿನ ತಾಂಡದ್‌ಂದ್ ಎಣ್ಣೆ ವಂತೋ ಅದ್‌ನ ದಾರ್‌ಕೋ ದತ್ತ್ ಕೊಡ್‌ತರ್‌ತ್‌ಂದೂ ಗೊತ್ತಾಚಿ. ನಿಮಾನ್ಸ್‌ಲುಳ್ಳ ಅವಡ ಪುಚ್ಚಿ ಜೋರಾಯ್ತ್‌ಂದೂ ತಾಂಡ ಕುಂಞಿನ ನೋಟಂಡೂಂದ್ ಹಟಮಾಡುವಾಂದೂ ಆಂಗಾಯ್ತ್. ದಿನಕ್ಕೋರ್ ಕುಂಞಿನ ಕಾಟ್‌ಚೇಂಗಿಯೂ ಅದ್ ನಾಡದಲ್ಲ್‌ಂದ್ ಚಾಯ್ತ್ ಗೊತ್ತಮಾಡುವ ಅದಂಗಾಯ್ತ್ ನಿಂಗಡ ಸಹಾಯ ಬೋಂಡೂಂದ್ ಎಣ್ಣೆ ತ್ ನಿಪ್ಪಾಚಿಟ್ಟಿತ್.

ಓರ್ ಗಳಿಗೆ ವಸಂತಂಗೆ ನಿಂದ ನೆಲ ಅಡ್ಡಿಕ್ ತಾಂದನ್ನನೆ ಆಚಿ. ಅಯ್ಯೋ... ಶಿವನೇ ..ಇದೆಂತ ಮಾಡಿಯಾ... ಎಲ್ಲಾ ತೇಂದತ್‌ಂದ್, ನೆಮ್ಮದಿ ಆಚೇಂದ್ ಎಣ್ಣೆ ವಕ ಎಂತ ಮಾಡಿಟಿಯಾ? ನಾಡ ವಾಣಿ.....ಛೇ.... ಇವ ಎಣ್ಣೆ ಕ್‌ತೇಂಗಿ ನಾನ್ ಕೇಂಕಂಡುವಾ?... ಇವ ಯಾವ... ಇವಡ ಮುಲಾಚ್ ನಾಕೆನ್ನಂಗೆ. ದತ್ತ್ ಎಡ್‌ತವ ನಾನ್‌ಂದೇ ಎನ್ನಂಗೆ ಎಣ್ಣೆ ಡಿಯೆ.... ಇವಂಡ ಪೊಣ್ಣ್ ಪುಚ್ಚಿಯಾಚೇಂಗಿ ನಾಕೆನ್ನೆ?. ನಾಡ ಬೆಂದುವಾ ಇಲ್ಲೆ ಚಾಚಿಯಾ?.

ನಿಧಾನತ್ ಎದ್ ಬಂದ ವಿವೇಕ್ ವಸಂತಂಡ ಬೆನ್ನ ತಟ್ಟಿತ್ relax

ವಸಂತ್ ನಾಕ್ ಗೊತ್ತ ನೀನ್ ಎಂತಾನ ಗ್ಯಾನ ಮಾಡಿಯಂಡುಳ್ಳಿಯಾಂದ್.
 ನಾನ್ ಅಂತ ಕಟುಕ ಅಲ್ಲ. ಆಚೇಂಗಿ ನೀನೊಮ್ಮೆ ನಾಡ ಕೂಡೆ ಆಸ್ಪತ್ರೆಕ್ಕ್
 ಬಾ.... ನಾಡ ಪೊಣ್ಣಾನ ಒಮ್ಮೆ ನೋಟ್ ಅಚ್ಚಕೇ ನಾಡ ಕೋರಿಕೆ come
 on....ಂದ್ ಕಾಕ್ಚಿ.

ಅಡಿಂಜ ಕೊಡಿಕ್ಕ್ ಅವನ ನೋಟ್ಚಿ ವಸಂತ್. ಇಚ್ಚ ಚೆರಿಯ ವಯಸ್ಸಲ್
 ಎಚ್ಚಕ್ ಅನುಭವ ತಾರವ್ಯಕ್ತಿ ಪೊಯಿಲ್ ಕಾಟ್ವನಚ್ಚಕ್ಕು ಏರ ಮಿನ್ನುವ
 ಪೊನ್ನಾರ ಗುಣತಾನನ್ನನೆ ಮನಸ್ಸಕ್ಕ್ ಕಷ್ಟ ಉಂಡೇಂಗಿಯೂ ಮೂಡಲ್
 ಪೊಂದೆಳಿ ಮಿನ್ನಂಗಣ್ಣ. ಇಂತ ವ್ಯಕ್ತಿಕ್ಕ್ ಎನ್ನಂಗ್ ದೇವಡ ಶಿಕ್ಷೆಂದ್ ಪತ್ತ
 ಪ್ರಶ್ನೆ ಒಮ್ಮೆಕೇ ಎದ್ದತ್. ಅವಂಡ ಪೊಣ್ಣಾನ ನೋಟ್ಚೇಂಗನ್ನೆ? ಅವಂಗೂ
 ನಾಡ ಕಷ್ಟತಾನ ನೋಟ್ಚಿಲ್ಲಾಂದ್ ಚೆನ್ನ ಸಮಾಧಾನವೇಂಗಿ ಆಕುವಲ್ಲ....!
 ಕಾರ್ನ ಓರ್ ಬರಿಲ್ ಪಾರ್ಕ್ ಮಾಡಿತ್ ಗೂರ್ಕಂಗ್ ಪತ್ತ ನಿಮಿಷತ್ತ
 ಬಪ್ಪಿಂದೆಣ್ಣಿತ್ ವಿವೇಕಾರ ಕಾರ್ ಪತ್ತಚಿ ವಸಂತ್.

ನಿಮಾನ್ಸರ ಬಲ್ಯ ಬೋರ್ಡೇ ಓರ್ ಇಷ್ಟ ಆಕತದ್. ಎಂತವಂಡ ಮನಸ್ಸೂ
 ಮುದುಡುವ ಸ್ಥಿತಿ ರೋಡಲ್ ಎಲ್ಲಿಯೇಂಗಿ ಓರ್ ಪುಚ್ಚನ ಕಾಂಬಕ್ಕಲೇ
 ಮನುಷ್ಯಂಡ Main part ವೆದ್ಗಳ್ ಕೆಲಸಮಾಡತೆ ಪೋಚೇಂಗಿ
 ಎನ್ನಾಯಿರುವಲ್ಲಾಂದ್ ಮನೆಕೆತ್ತಣೇ ಗೇನ ಮಾಡುವಲ್ಲಿ ಇಲ್ಲಿ ಎಲ್ಲಾರೂ
 ಅನ್ನತಯಿಂಗಳೇ ಉಳ್ಳಲ್ಲಿ ಮೇಲ್ "ಜು"ಂದ್ ಆಪಂತ್. ವಸಂತಂಗ್ ವಾಣೆನ
 ಇಲ್ಲಿ ಚೆನ್ನ ದಿನ ಕೂಟತಿಂಜಾಂಗ್ ಚೆನ್ನ ಅಭ್ಯಾಸ ಆಯಿತಿಂತ್. ಸಿನಿಮಾತ್ತ
 ಕಾಟುವನ್ನನೆ ಬಸ್ ಬುಡುವ, ಹರಿಕತೆಮಾಡುವ ಕಂಬ ಪತ್ತುವ, ಭಾಷಣ
 ಮಾಡುವ, ಮೊರಡುವ, ತೆಲಿಪ, ಇನ್ನನೆ ವ್ಯವಹಾರಿಕ ಜೀವನತ್ತರ ಅಪರಿಪೂರ್ಣ
 ಜೀವನ ಇಲ್ಲಿ ಕಾಂಗಲು. ಕಾಲ, ನೇರ, ಪಯಿಪ್, ಬಟ್ಟೇ ಬರೆ ದಯ ದಾಕ್ಷಿಣ್ಯ
 ಇಲ್ಲಿ ಉಳ್ಳಯಿಂಗಳಲ್ಲಿ ಅಸಾಧ್ಯ. ಇಯಂಗಳೆಲ್ಲಾ ನೋಟತೂ ನೋಟತನ್ನನೆ

ಸರಸರಾಂದ್ ವಿವೇಕ್‌ರ ಮೊಟ್ಟಾ ಬಯ್ಯ ನಡಂದತ್ ವಸಂತ್.

ಓರ್ ವಾಡಾರ ಪಡಿನ ನೂಕಿತ್ ಒಳಕ್ ಪೋಚಿ. ಅಲ್ಲಿಯತ್ತಾರ ದೃಷ್ಟಿ ವಸಂತಂಡ ಕರ್ ಬಾಯಿಕ್ ಬಪ್ಪನ್ನನೆ ಮಾಡ್‌ಚಿ.

ಓರ್ ಕಟ್ಪಾಕ್ಕ್ ಓರ್ ಬಾಲೆಕಾರ್ತಿ (ಮೈತ್ರಿ)ನ ಕೆಟ್ಪಾತಿಂತ್. ಮಂಡೆ ಕೆದರಿಯಂಡ್ ಮೇಲಲ್ ಬಟ್ಟೆರ ಪ್ರಜ್ಞೆ ಇಂಚಾಲೆ. ಓರ್ ನರ್ಸ್ ಸೆರಗ್‌ನ ಪೊಲತಿತ್ ಪುಡ್‌ಚಂಡತ್. ಆ ಬರಿಂಜಿ ದಂಡ್ ಆಣಾಳ್ ಓರ್ ಮೂಂದ್ ಬಯತ್‌ರ ಮೂಡಿ ಕುಂಞಿನ ಅವಡ ಎದಿಕೆ ಕೊಂಡಬಪ್ಪ. ಇವ ಅದ್‌ನ ನೋಟಿತ್ ಇದಲ್ಲ. ಇದ್ ನಾಡ ಕುಂಞಿ ಅಲ್ಲ. ಇದ್ ಅಲ್ಲವೇ ಅಲ್ಲ. ನಾಡ ಕುಂಞಿ ಬೊತ್ತಿತ್ ಮೊರಟಂಡಿಂಜನ್ನನೇ ವಾರ್ಡ್‌ಬಾಯ್ಸ್ ಅಪ್ಪರ ಕಾಕಿಯ ಪೋಟಿ. ಅಲ್ಲಿಕ್ ಬಂದ ಡಾಕ್ಟರ್ ಇದೇಮ್ಮ ನೀಡ ಕುಂಞಿ ಚಾಯಿತೆ ನೋಟ್‌ಂದೆಣ್ಣುವಕ ಅವಂಗ್ ಪೊಯ್ಯುವನ್ನನೆ ಕೈ ನೇತುವಕ್ ಪೇಚಾಡಿಯಂಡ್ ಎಂತಾನೋ ಎಣ್ಣಿಯಂಡಿಂಜತ್. ಪರದೆರ ಮರೆಂಜಿ ಇದ್‌ನ ನೋಟಿಯಂಡಿಂಜನ್ನಕೇ ವಸಂತಾರ ಕಣ್ಣಂಜಿ ನೀರ್ ತಾನಾಯ್ತ್ ಒಕ್ಕಿಯಂಡಿಂಜತ್. ಅವನ ಅಲ್ಲಿಯೇ ನಿಪ್ಪಕೆಣ್ಣಿತ್ ವಿವೇಕ್ ಒಳಕ್ ಪೋಚಿ. ಮೈತ್ರಿನ ತಕ್ ಪರಿಚಿಟ್ಟಿತ್. ಕೈರ ಕಾಟ್ವನ ಉತ್ತುವ ಕೆಣ್ಣಿಚಿ ನರ್ಸ್‌ಕ್ಕ್ ಓರ್‌ಗಳಿಗೆ ಅವನೇ ನೋಟಿತ್ ನಾನ್ ಮೋಸ ಮಾಡಿಟ ವಿವೇಕ್ ನೀಕ್ ಆಂಗೇ ನಾಡ ಕುಂಞಿ ನಾಕಿಲ್ಲೆ, ಕುಂಞಿನ ಕಾಕಿಯ ಬಾ ಪೋ...ಪೋ...ಂದ್ ಮೂಡ್ ಮುಚ್ಚಿತ್ ಮೊರಡುವಾನ ಸಮಾಧಾನ ಮಾಡಿತ್ ಕಣ್ಣ್ ತೀಟಿಯಂಡ್ ಪೊರಮೆ ಬಾತ್ ವಿವೇಕ್.

Very sorry I very sorry ಂದ್ ಮಾತ್ರ ಬಾತ್ ವಸಂತಂಡ ಬಾಯಿಂಜಿ. ದಂಡಾಳೂ ಅಫಿಸ್‌ಕೆತ್ತನೆ ಓರೂ ತಕ್ ಪರಂದಾಲೆ. ಪೊರಡುವಕ ಒಮ್ಮ ಒಮ್ಮೇ ಒಮ್ಮೇ ಕುಂಞಿನ ಕಾಟಿತ್ ಪೋಪ ಮನಸ್ಸ್ ಮಾಡ್ ನೋಟಿನ

ಗೊತ್ತಮಾಡುವಾಂದ್ ವರ ಕೇಪನ್ನನೆ ಕೇಟಿತ್ ಮರೆಯಾಚಿ ಕಾರ್.

ತಾಂಡ ಕಾರ್ನ ಎಡ್ತಂಡ್ ಮರೆಕೆತ್ತ್ಚಿ ವಸಂತ್. ಮೋವಳೊಮ್ಮೆ ಮಾಮೂಲಾನನ್ನನೆ ಎಡ್ತಿತ್ ಜೋಬುಂಜಿ ಚಾಕೋಲೇಟ್ ಕೊಡ್ತಿತ್. ಅಡ್ಕಿ ಬುಟ್ಟಿತ್ ಬಟ್ಟೆ ಬದಲಾಯಿಚಿಟ್ಟಿತ್. ವೆರಾಂಡ ತಳಾತತ್ ವಸಂತ್. ಎನ್ನಂಗ್ ಲೇಟ್ ? ಎಲ್ಲಿಕ್ ಪೋಯೆಂದ್ ಕೇಟಿ ವಾಣಿರ ಪ್ರಶ್ನೆಕ್ ಒಂದೂ ಇಲ್ಲೆ ಆಫೀಸ್‌ಲ್ ಕೆಲಸ ಇಂತ್ಂದ್ ಉತ್ತರ ಕೊಡ್ತಿತ್ ಕೈಲ್‌ಪೇ ಪರುಂಡೇಗಿಯೂ ಮನಸ್ಸು ನಿಮಾನ್ಸರ ವಾರ್ಡ್‌ಲೇ ಇಂಜತ್. ಚಿರಿಯ ಮಂಡೆ ನೊಂಬಲಾವೂ ಜತೆ ಕೂಡ್ಚಿ. ಉಂಬಕಳಾತಲ್ಲಿ ವಾಣಿ ಎನ್ನಂಗ್ ಓರ್‌ಥರಾ ಉಳ್ಳಿರಲ್ಲಾ... ಸೌಖ್ಯ ಇಲ್ಲಿಯಾ? ಆಫೀಸ್‌ಲೆನ್ನೇಂಗಿ ಆಚಾಂದ್ ಕೇಟಿ ತೇಂಗಿಯೂ ಇವಕ್ ಎಣ್ಣೇರಡಾ? ವಿವೇಕಂಡ ವಿಚಾರ ಎಣ್ಣೆಚೇಂಗಿನ್ನ?... ಮೈತ್ರಿರ ಬೋಂಡ... ಇಂಞೊಮ್ಮೆ ಕೇಟಿಕ ಎಣ್ಣನಾಂದ್ ಉಂಬಶಾಸ್ತ್ರ ಮಾಡಿತ್ ಎದ್ದತ್.

ವಸಂತಂಗ್ ವಿಚಾರತ್ತನ ಎಣ್ಣೆತೆ ಇಪ್ಪಕೂ ಕಯ್ಯ ಎಣ್ಣೆಚೇಂಗಿಯೂ ಕಷ್ಟ ಇನ್ನನೆ ಅಡಿಕೆ ಕತ್ತರಿಲ್ ಚಿಕ್ಕನ್ನನೆ ಒದ್ದಾಡಿ ಪೋಚಿ. ಪಿತ್ಯಾಂದ್ ನಾರಾಚೆ ಮನಸ್ಸಲೋ ಓರ್‌ಪ್ಲಾನ್‌ಟ್ಟಿತ್. ಕಬ್ಬನ್ ಪಾರ್ಕ್ ಪಿಕ್‌ನಿಕ್ ಪೋಕನಾಂದ್ ವಾಣಿಕೆಣ್ಣೆಚಿ. ಸರಿ ಎಲ್ಲಿಯೇಂಗಿ ಮನಶ್ಯಾಂತಿ ಕಾಟ್ಟಡ್ಂದ್ ತಯಾರಿ ಮಾಡ್ಚಿ. ಪತ್ತಗಂಟೆಕೆಲ್ಲಾ ಎತ್ತಿತ್ ನಲ್ಲ ನಳತ್ತರ ಜಾಗತ್ತನ ಆರ್ ಚಿಟ್ಟಿತ್ ವಸಂತ್. ರಶ್ಮಿಕಂತೂ ಕುಶಿಯೋ ಕುಶಿ. ಚಿಟ್ಟೆ ಪುಡಿಪ ಕಪ್ಪೆನ ಕೋಲ್‌ಲ್ ದವುತುವೋಂದ್ ಅವಡದೇ ಪ್ರಪಂಚತ್ ಮುಳಿ ಪೋಚಿ. ಪನ್ನಂದ್ ಗಂಟೆ ಆಪಕ ಕೊಂಡ್‌ಬಂದ ತಿಂಡಿ ಕುಡಿಪಕ್ ಎಲ್ಲಾ ತಿಂದತ್. ವಸಂತ್ ಕಾಲ್‌ನೀಟಿ ಜಮಖಾನತೆ ಬುದ್ದಂಡೇ ವಾಣಿಕ್ ವಿಚಾರತ್ತನ ಶುರುಮಾಡ್ಚಿ. " ನೋಟ್ ವಾಣಿ ನಿನ್ನಾಂದ್ ನಾನ್ ಎನ್ನಂಗ್ ಲೇಟ್‌ಂದ್ ಕೇಟಿಯಲ್ಲಾ ನಾನ್

ನಿಮಾನ್ಸಕ್ಯ ಪೋಯಿತಿಂಜ..."ಆಂ ಎನ್ನಂಗ್ ನಾನ್ ಇಕ್ಕ ಚಾಯಿಲುಳ್ಳಂದ್ ಬಾಯಿಂಜ ತಕ್ಕ ಬಲ್ಚತ ವಾಣಿ" ಆಂಗಲ್ಲರೇ ವಿವೇಕ್ ಬಂದದ್, ಅವಂಡ ಮೈತ್ರಿರ ಕಥೆ, ಆಸ್ಪತ್ರೆಲ್ ಎಡ್ಮಿಟ್ ಆನದ್ ಎಲ್ಲಾ ಚುಟುಕಾಯ್ ಎಣ್ಣೆ ಚಿ.

ಇಕ್ಕ ವಾಣಿರ ಮೂಡ್ ಮಂಕಾಚಿ. ಇದಂಗಾಯ್ ಪಿಕ್‌ನಿಕ್ ಕಾಕಿಯ ಬಂದಿಯೆ ಇವ. ಮನೆಲ್ ಎಣ್ಣವ ಕಯ್ಯತಾಂಗ್ ಇನ್ನನೆ ಮಾಡಿಯದಾ? ಅಂದಕ ನಂಗಡ ರಶ್ಮಿ... ಅವಕ್ಕ ಗೇನವೇ ಮಾಡುವಕಯ್ಯತಾಚಿ. ಇನ್ನನೆ ಗೇನಮಾಡಣೆ ವಸಂತ "ನೋಟಿಯಾ ಆಂಗೇ ನಾನ್ ನೀಕ್ ಏದೇಂಗೋರ್ ವಿಚಾರತ್ ನೋ ಎಣ್ಣವಕ್ಕ ಮಡಿಪ್ಪ. ಇಕ್ಕ ನೋಟ್ ನೀಡ ಮೂಡ್ ಅಡಿಕ್ಕಾಚಲ್ಲಾ!..ಎನ್ನ?

ಅಲ್ಲ!... ರಶ್ಮಿನ ಕೇಟತೇಂಗಿ ಎನ್ನ ಮಾಡನ? ಆ ಫಾದರ್ ಇದ್‌ನೊಂದೂ ಎಣ್ಣೆತೇ ಇಲ್ಲ! ಅವ್ವನಪ್ಪ ಉಳ್ಳ ಮಕ್ಕಳ "ಅನಾಥ"ಂದ್ ಎನ್ನಂಗ್ ಬೆಚ್ಚವ! ಅದ್ ತಪ್ಪಲ್ಲ... ನಂಕ್ ಇವಳ ಎನ್ನಂಗ್ ಕಾಟಂಡಿಂಜಿಯೆ. ಆ ಮೈತ್ರಿರ ಅಪ್ಪನವ್ವ ಎಂತ ಜನರಪ್ಪಾ! ಆಂಡ ಮೇಲೆ ವಿವೇಕ್‌ಕ್ ಮೋಸತ್ ಮಂಗ್‌ಲ ಬೋರೆ ಮಾಡ್‌ಚಿ. ಇನ್ನನೆ ಪ್ರಶ್ನೆಯೇ ಪ್ರಶ್ನೆ.

ಎಲ್ಲಾನೋ ಕೇಟಳತ ವಸಂತಂಗ್ ಇದೆಲ್ಲಾ ನೇರೇಂದಾಚಿ. ಆಚೇಂಗಿ ವಾಣಿ ಕೆಣ್ಣೆ ಚಿ. ಫಾದರ್‌ಕೆನ್ನ ಗೊತ್ ಮೈತ್ರಿ ಇನ್ನನೆ ಒನ್ನಾಂದ್ ಬಂತ ಕುಂಞಾನ ಕೇಪಾಂದ್!.. ಅಲ್ಲತೆ ನೀನೋ ಆ ಮಕ್ಕಡ ಕೂಟ್‌ಲ್ ಇದೇನ್ ಆರ್‌ಚಿಟ್ಟಿಯಾ....ಸರಿಬುಡ್ ನಂಗ ಆ ಮಕ್ಕ ಎಲ್ಲಾ ಅನಾಥಂಗಳೇಂದೇ ಗೇನ ಮಾಡ್‌ಚಲ್ಲ!.. ಇಕ್ಕ ಕಾನೂನ್ ಪ್ರಕಾರ ದತ್ ಎಡ್‌ತಂಡ ಪಿಂಞ ಕೊಡ್‌ಕಂಡೂಂದಿಲ್ಲೆ. ಅವಂಡ ಕಷ್ಟತಾನ ಎಣಿಯೆಂಡತ್, ನಾನೂ ಕಾಕ್‌ನಾಂಗ್ ನೋಟಿತ್ ಬಂದಿಯೆ ಅಚ್ಚಿಕೆ ಇಂಞೊಂದೂ ಇಲ್ಲೆ. ಆಚೇಂಗೂ ನಾಕೆನ್ನಂಗೋ ಅವಳ ನೋಟಾನ ಪಿಂಞ ಮನಸ್ಸ ಸರಿ ಇಲ್ಲೆ. ನೀಕೊಮ್ಮ ಎಣ್ಣಂಡೂಂದಾಚಿ. ನೀನೊಂದೂ ಮನಸ್ಸಕ್ಕ ಎಡ್‌ತವತೆ ಮಜ್ಜಣಾಪಕಾಚಿ. ರಶ್ಮಿನ ಕಾಕ್

ಪೋಕನಾಂದ್ ಎಣ್ಣೆತ್ ಎದ್ದತ್.

ಅಂದ್ ಬೈಟ್‌ಡೀ ವಸಂತಂಗ್ ವರಕಿಲ್ಲೆ. ಪೊರಮೆ ಅಳತಿತೂ ಸಿಗರೇಟ್ ಬಲ್‌ಚಿತೂ ಮದೀ ಆಚಿ. ಆಖೀರ್‌ಲ್ ಓರ್ ತೀರ್ಮಾನಕ್ಕ ಬಾತ್.

ವಾಣಿಯೂ ಅಪ್ಪರಿಪ್ಪರ ಮರಂಜಿತ್ ಪೊಲಾಕ ಚೆನ್ನವಕಚಿ. ಪಿತ್ಯಾಂದ್ ಮಕ್ಕಡ ದಿನಾಚರಣೆಂದ್ ರಜ ಇಂದತ್. ಒನ್ನಾಂದ್ ಪಿಕ್‌ನಿಕ್‌ಂದ್ ಪೋನ ರಸಕ್ಕ ಇಂದೂ ಎಲ್ಲಿಕೇಂಗಿ ಪೋಕನಾಂದ್ ರಶ್ಮಿರ ಹಠ ವಾಣಿ ಮಾತ್ರ ನಾಕ್ ಕಯ್ಯಲೆ ನಿಂಗ ಎನ್ನೇಂಗಿ ಮಾಡಿ ಓರ್ ಕಾಂಡ್ ಕಾಕಿಯಪೋಯಿತ್ ಬಾರೀಂದ್ ತಪ್ಪ್‌ಚಿಟ್ಟಂಡತ್. ಪೊರಮೆ ಪೋನಕ ಎಲ್ಲಿಯೇಂಗಿ ವಿವೇಕ್‌ನ ಕಾಂಗಡಿಯಾಕುಂದ್ ವಸಂತಂಗ್ ಓರ್ ಚೆರಿಯಪೋಡಿ. ಇದ್‌ನಲ್ಲಾ ಅರಿಯತ ರಶ್ಮಿ ಬಂತ್ ಬಲ್‌ಚಂಡಿಂಜತ್.

ಶೆಡ್ಡ್‌ಂಜಿ ಕಾರ್ ಎಡ್‌ತ ವಸಂತ್ ಕುಂಞಾನ ಅಳಾಪಚಿಟ್ಟಂಡ್ ನೇರೆ ಮೆಂಟಲ್ ಹಾಸ್ಪಿಟಲ್‌ಕ್ ಬಾತ್. ಅಲ್ಲಿಕೆತ್ತುವಕ್ಕೇ ಅವಂಗರಿಜಿಯೆ ನಾನೆಂತ ಮಾಡಿಯಂಡುಳ್ಳಂದ್.

ಅಲ್ಲಿಯೇ ವಿವೇಕ್‌ರ ಕಾರೂ ನಿಂತಿಂತ. ಬಟ್ಟೆಲ್ ಎಡ್‌ತ ಐಸಕ್ರೀಂನ ತಿಂದಂಡೇ ಇಂಜತ್ ರಶ್ಮಿ. ಅವಡ ಕೈ ಬಾಯಿನ ನೇಫ್‌ಕಿನ್‌ಲ್ ತೀಟಿತ್ ಕಾರ್‌ಂಜ ಇಳಾಂಜತ್. ವಿವೇಕ್ ಅವಸರತ್ತ್ ಇಯಂಗಡತ್ತಟಿ ಬಾತ್. ವಸಂತ ಇಂದ್ ಮೈತ್ರಿಕ್ ದುಂಬಾ ಸೌಖ್ಯ ಇಲ್ಲೆ. ನೇರ್ತ್ ಓರ್ ನರ್ಸ್‌ಕ್ ಪೂಜ್ಜಾರ್‌ತ್ ಎನ್ನ ಮಾಡಡ್‌ಂದ್ ಗೊತ್ತಾಪ್‌ಲೆ. ನೀನ್ ಇಂದೇ ಕುಂಞಾನ ಕಾಕಿಯ ಬಂದಿಯಾ? ನಾಕೆನ್ನಂಗೋ ಇಂದ್ ಬೋಂಡಾಂದಾಪಾಂದೆಣ್ಣೆ ಚಿ.

ಛೇ...ನಾನೆಂತ ಮಾಡಿಯಂಡುಳ್ಳ ವಾಣಿಕ್ ಅರಿಯತೆ ಕುಂಞಾನ ಕಾಕಿಯ ಬಂದದ್ ಬಲ್ಯತಪ್ಪಾ! ಇವ ನಾನ್ ಕಾಟುವಕ್ಕೇ ಕಾಕಿಯ ಬಂದಿಯೇಂದ್ ನಂಬಿತ್ ಎನ್ನ ಮಾಡಡ್?..

ನೋಟ್ ವಿವೇಕ್ ನಾಕ್ ಬೋರೆ ದಿನ ಬಪ್ಪಕಯ್ಯಲೆ. ಅಲ್ಲತೆ ವಾಣಿಕ್ಕಾ ಅರಾಂಜಿತ್ ಇಲ್ಲಿಕ್ ಕುಂಞಿನ ಕಾಕಿಯಬಪ್ಪಕ್ ಕಯ್ಯಲೆ. ಅವ ಒತ್ತವದೂ ಇಲ್ಲೆ. ದೇವಡ ಮೇಲೆ ಭಾರ ಇಟ್ಟಿತ್ ಎನ್ನಪೋ ಆಡ್. ಇಂದೇ ಪೋಕನಾಂದೆಣ್ಣೆ ಚಿ.

ಪುಚ್ಚುಗಳ ಕಂಡಿತ್ ಬೊತ್ತಿತ್ ಅಪ್ಪಂಡ ಬೋಳೆನಗಟ್ಟಿ ಪುಡ್ಚಂಡ ರಶ್ಮಿನ ಸಮಾಧಾನ ಮಾಡಿಯಂಡೇ ಒಳಕ್ಕಾ ಬಾತ್. ವಿವೇಕ್‌ರ ತಕ್ಕಾ ಪ್ರಕಾರ ಅವಕ್ಕಾ ಇಂದ್ ಪುಚ್ಚಿ ಚೆನ್ನ ಜಾಸ್ತಿಯಾನಾಂಗನ್ನೋ ಕಾಲನೋ ಕೈನೋ ಕೆಟ್ಟಿತಿತ್. ಮೆಲ್ಲೆ ಪಡಿ ತೊರಂದಂಡ್ ವಿವೇಕ್ ಒಳಕ್ಕಾ ಪೋಚಿ. ಅವಂಗ್ ಕಣ್ಣೆ ಮರಚಂಡ್ ಎಂತಾನೋ ಎಣ್ಣುವಂತ್. ಪೋಕನ ಡ್ಯಾಡಿ ಪೋಡಿ. ಆಪಾಂದ್ ಮೆಲ್ಲೆ ಮೆಲ್ಲೆ ಅವಡ ಎದಿಕೆ ಕೊಂಡ್‌ಪೋನನ್ನೆ ಮಂತ್ರವಾದಿರ ಮಂತ್ರಕ್ಕಾ ಬಗ್ಗನನ್ನನೆ ಅವಳೇ ಓರ್ ಗಳಿಗೆ ನೋಟಿತ್ ಕಂಡ್ಯಾ...ಕಂಡ್ಯಾ ಉಯೀ...ಇದೇ ನಾಡ ಕುಂಞಿ ಇಲ್ಲಿ ನೋಟ್ ನಾಡ ಕುಂಞಿ..ಂದ್ ಮೊರಡುವ ಕೂಡ್‌ಚಿ ಅಕ್ಕಣೆ ಓಡಿ ಬಂದ ಡಾಕ್ಟ್ರ "ಹೌದಾ...ಇದೇನಾ... ನಿನ್ನ ಮಗು ...ಂದ್ ರಶ್ಮಿನ ಎಡ್‌ತವಕ್ಕ ನಾಡ ಕುಂಞಿನ ಒಮ್ಮತಾ...ಒಮ್ಮೇ ಒಮ್ಮಂದ್ ಒಂದೂ ಆಕತವಡ ಮಾದರಿ ತಕ್ಕಾ ಪರೆವಾನ ಕಂಡಿತ್ ಎಲ್ಲಾರೂ ಮೂಡ್‌ಮೂಡ್ ನೋಟಿಯಂಡಿಕ್ಕಣೆ ಅವ ಮಂಕಾಯಿತ್ ಬುದ್ದಂಡತ್. ಅವಡ ಕೆಟ್ಟಾನ ಉತ್ತಚಿಟ್ಟಿತ್ ಓರ್ ಇಂಜಕ್ಷನ್ ಕೊಡ್‌ತಿತ್. ಪೊರಮೆ ಬಾತ್. ಬೊತ್ತಿತ್ ಇಂಜ ರಶ್ಮಿ ಇಕ್ಕ ಆಂಟಿಕೆನ್ನಾಯೆ ಡ್ಯಾಡಿ?... ಎನ್ನಂಗ್ ಕೆಟ್ಟಿಯೆಂದ್ ಕೇಪಕ್ಕಾಚಿ. ಕಾರ್‌ರತ್ತಟಿ ಬಂದಂಡಿಪ್ಪಕ ವಿವೇಕ್ "ನಾಡ ಪೋಣ್ಣಾನ ಉಳಿಕೆ ಮಾಡುವದ್ ನೀಡಕ್ಕಿಲುಂಡ್ ವಸಂತಂದ್ "ಎಣ್ಣೆತ್ ಪುನಃ ನಂಗಳ ಬುಟ್ಟಿತ್ ಆಸ್ಪತ್ರೆಕ್ಕೇ ಪೋಚಿ.

ಓರೇ ಓರ್ ವಾರತ್ ಅವಂಡ ಎಲ್ಲಾ ನೊಂಬಲತ್ತನ ಎಣ್ಣೆತ್

ಪರಿಹಾರತ್ನನೋ ಎಣ್ಣೆತಿಂತ್. ಆಚೇಂಗಿ...ವಸಂತಂಗ್ ಬಲ್ಲೋರ್ ಪೋರೆ ಮಂಡೆಕ್ ಬುದ್ಧನ್ನನೆ ಆಚಿ. ನೀಸುವಕಯ್ಯತ ಭಾರ...ನಾನೆನ್ನಂಗ್ ಪೋನ ಅಲ್ಲಿಕ್..? ಇದಾನ ಅರ್ಂಜಕ ವಾಣಿ ಎನ್ನಣ್ಣು ? ನಾನ್ ಮಾಡ್‌ನದ್ ಸರಿಯಾ ? ಈಂಡ ತೀರ್ಮಾನ ಎನ್ನನೆ...?

ಎಲ್ಲೆಲ್ಲಿಯೋ ತಿರಿತ್ ಮಜ್ಜಣಕ್ಕ ಮನೆಕೆತ್ತ್ಚಿ ವಸಂತ. ಉಂಬಕಳಾತಲ್ಲಿ ರಶ್ಮಿ ಎಂತೆಲ್ಲೋ ಎಣ್ಣುವಂತ. ಆಸ್ಪತ್ರ, ಆಂಟಿ, ಕೆಟ್ಟಿಯೆಂದಲ್ಲ...ಇದೆನ್ನ ತಾನ ಎಣ್ಣುವ ವಸಂತ ನಿಂಗ ಎಲ್ಲಿಕ್ ಪೋಯೆ? ನಾಕೆನ್ನೋ ಸಂಶಯ. ಕಡೇಕೂ ಅಲ್ಲಿಕ್ ಕಾಕಿಯಂಡೇಪೋಯಿಟಿಯಾ ? ನಾಡ ಕುಂಞಿನ? ಅವ ಪುಚ್ಚಿಂದ್ ಗೊತ್ತಿಂತೂ ಎನ್ನಂಗ್ ಕಾಕಿಯಪೋಯಿಯಾ? ಅವ ಗುರ್ತ್ ಮಾಡ್‌ಚಾಂದ್ ರಂಪೋ ರಂಪ ವಾಣಿರ.

ನಡಂದಾನ ಎಣ್ಣೆಚಿ ವಸಂತ. ನಾನ್ ಗೇನೇ ಮಾಡತದ್. ನಡಂದ್ ಪೋಚಿ ವಾಣಿ. ದೇವರೇ ಗೊತ್ತಾಕತಿರಡ್ಂದ್ ಗೇನ ಮಾಡಿಯಂಡೇ ಪೋನ. ನಾನೋರ್ ವಿದ್ಯಾವಂತನಾಯ್ ತಪ್ಪಿತಸ್ತ ನಾಪಕಾಗಂದ್ ಪೋನ ಆಚೇಂಗಿ ಅವ ಗೊತ್ತಮಾಡಿರ್ತ್. ಕರ್‌ಬಳ್ಳಿರ ಆಕರ್ಷಣೆನ ಮೀರುವ ಕಯ್ಯುವಾ? ಅವಡ ಪುಚ್ಚಿಯೂ ಒಮ್ಮಕೇ ಇಳ್ಳಂಜ್‌ರತ್.

ಇಕ್ಕ ನಾಡ ಮಂಡೆಕ್ಕ ಪುಳು ಕೂಡ್‌ನನ್ನಾಚಿ. ಬೋಂಡೂಂದ್ ಮರಕೆತ್ತಿತ್ ಮಂಡೆಕ್ ಬೂಕಿಯಂಡನ್ನನೆ ಆಚಿ. ಎನ್ನಮಾಡಡ್ಂದ್ ಗೊತ್ತಾಪ್‌ಲೆ ದುಡ್ಡ್‌ಕಾಸ್‌ಕ್ ಒತ್ತವಂತವೂ ಅಲ್ಲ.

ಒಳ್ಳಲೇ ಅವಂಗ್ ವಾಣಿರ ಮಂಡೆ ಪಳೆಯರೀತಿ ಆಯಿಟಕ ಎನ್ನ ಮಾಡಡ್. ಎಲ್ಲಾಂಗುಂಜಿ ರಶ್ಮಿ ಅವನೇ ಏರ ಒಗ್ಗಿಯಂಡಿಂಜತ್. ಮನೆಲ್ ಓರ್ ಗಳಿಗೆ ಅವಳ ಕಾಂಗತಿಪ್ಪಕಯಿವಂತಿಲೆ ವಸಂತಂಗ್ ಅವ ಇಲ್ಲತ ಮನೆನ ಗೇನವು ಮಾಡುವ ಕಯ್ಯತಾಚಿ. ಶಿವನೇ ...ಎನ್ನಮಾಡಡ್ಂದ್ ಗೇನಮಾಡಿ ಮಾಡಿ

ಪೊರಮೆ ಲಾನ್‌ಲ್ ಪೋಯ್‌ಲ್‌ಶತ್. ಒಂದೋ ಕುಂಞಿನ ಕೊಡ್‌ಕಂಡು. ಅದ್ ಈ ಜನ್ಮತ್ ಸಾಧ್ಯ ಇಲ್ಲೆ. ಇಲ್ಲೆ. ಈ ಊರ್‌ನೇ ಬುಟ್ಟಿತ್ ದಾರ್‌ಕೂ ಎಣ್ಣೆತೆ ಎಲ್ಲಿಕೇಂಗಿ ಪೋಯಿರಂಡು. ಇದ್ ದಂಡಾಲ್ ಕಡೇ ತ್‌ರದೇ ನಲ್ಲದ್‌ಂದ್ ಎದ್ದತ್. ಒಳ್‌ಕ್ಕ್ ಬಂದ್ ನೋಟಣೆ ರಶ್ಮಿರ ಪಾಡ್‌ಕ್ಕ್ ಕಳ್‌ಚ್ಚಡುಂಡ್ ವಾಣಿ ಎಲ್ಲಿಯೊ ನೋಟಿಯಂಡ್ ಪ್ರಪಂಚತ್‌ನೇ ಮರಂದನ್ನನೆ ಅಳ್‌ತತಿಂತ್.

"ವಾಣಿ ಒಂದೂ ಗೇನಮಾಡತೆ ನಂಗಡ ತೋಟಕ್ಕೆ ಪೋಯಿರನಾ...ದಾರ್‌ಕ್ಕ್ ಇದ್‌ನ ಎಣ್ಣೆಂಡ ನಾನ್ ಆಫೀಸ್‌ಕ್ಕ್ ಸಧ್ಯಕ್ಕ್ ಓರ್ ತಿಂಗ ರಜ ಎಳ್‌ದುವಿ. ಬಯ್ಯ ಎನ್ನ ಮಾಡಂಡು ಅದ್‌ನ ಮಾಡನ. ಇಕ್ಕ ನೆಮ್ಮದಿಲ್ ವರ್ ಎಳ್‌ಂದ್ ಎಣ್ಣೆತ್ ಒಳ್‌ಕ್ಕ್ ಪೋಚಿ. ವಾಣಿಕ್ಕ್ ಇದ್ ಸರೀಂದ್ ಕಂಡತ್. ಅಲ್ಲೇಂಗಿಯೂ ಅವಕ್ಕ್ ತೋಟವೇ ಕುಶಿ. ಇಕ್ಕ ನಲ್ಲ ಸಂದರ್ಭ ಬಾತಲ್ಲ! ಆರಾಮ್‌ಲ್ ಅಲ್ಲೇ ಇಕ್ಕನಾಂದ್ ಮನಸ್ಸ್ ಒರಕ್ಕಿತ್ ಎದ್‌ಪೋಚಿ.

ಪೊಲಾಕ ಆಫೀಸ್‌ಕ್ಕ್ ಪೋನವನೇ ಓರೂ ಕಾರಣ ಎಣ್ಣೆತೆ ರಜ ಎಳ್‌ದಿ ಬೆಚ್ಚಿತ್ ಬಾತ್. ಅವಂಡ ಆಪ್ತಸ್ನೇಹಿತನೊಬ್ಬ ಎನ್ನಂಗ್ ಇಕ್ಕ ರಜಾಂದ್ ಕೇಟಾಂಗ್ "ಇನ್ನನೇಂದ್" ತಕ್ಕ್ ಬೆಲಕ್ಕಿಶತ್ ವಸಂತ್.

ದಂಡ್ ಆಳುವಳ ಬಪ್ಪಕೆಣ್ಣಿತ್ ಸಾಮಾನೆಲ್ಲಾ ಪೇಕಾಚಿ. ಅವಶ್ಯ ಉಳ್ಳಾನ ಮಾತ್ರ ಎಡ್‌ತಂಡ್ ಬಾಕಿ ಅಲ್ಲಿಯೇ ಇಂಜತ್. ಎಕ್ಕೇಂಗಿ ಬಂದಕ ಇಪ್ಪುಕ್‌ಂದೇ ಇಲ್ಲಿಯತ್‌ರ ಫರ್ನಿಚರ್ ಎಲ್ಲಾ ಇಲ್ಲಿಕೇ ಇಪ್ಪನ್ನನೆ ಮಾಡಿತಿಂತ್.

ಮನೆಕೆಲ್ಲಾ ಬೀಗ ಇಟ್ಟಿತ್ ಕುಟ್ಟಿಕೋರ್ ಪೋನ್ ಮಾಡಿರುವಂಜಿ ಲಗ್ನೇಜ್ ಎಲ್ಲಾ ಕಾರ್‌ಲ್ ಬೆಚ್ಚಿತಾಂದ್ ನೋಟಿತ್ ಮಂಡೆ ಅಡಿಕ್‌ಟ್ಟಂಡೇ ಕಾರ್‌ರತ್ತಟಿ ಬಾತ್ ವಸಂತ್.

ವಾಣಿ switch Keyನ ಕೇಟಂಡ್ ನಾನ್ ಡ್ರೈವ್ ಮಾಡುವಿಂದ್

ಎಣ್ಣಾನಾಂಗ್ ಕುಂಞಾನ ಎಡ್ತಂಡ್ ಈ ಬರಿಲ್ ಅಳತತ್ ವಸಂತ್ ಏದೆಲ್ಲಾ ಆಶೆಲ್ ಬೆಂಗಳೂರ್ಕ್ ಬಂತ್ ಇಕ್ ಒಳ್ಚಿ ಪೋಪನ್ನಾಚೆಲ್ಲಾಂದ್ ಊಜಳೆ ಬುಟ್ಟಂಡ್ ಮನೆನೊಮ್ಮೆ ತಿರೀನೋಟ್ಚಿ.

ವಾಣಿಯೂ ನಲ್ಲ ದ್ರೈವರೇ ಆಯಿತಿಂತ್ ಓರೂತಕ್ ಪರಿಯತೆ ಮೌನಿಯಾಯಿತಿಂಜ ವಾಣಿ ರೋಡ್‌ನೇ ನೋಟಿಯಂಡ್ ಕಾರ್ ನಿಮಾನ್ಸರ ಡಬ್ಬಲ್ ರೋಡ್‌ಕ್ ತಿರುವಕ್ ಎನ್ನಂಗ್ ವಾಣಿ ಕೊಡಗ್ ರೋಡ್ ಆಲೆಲ್ಲಾಂದ್ ಕೇಟತೇಗಿಯೂ ಉತ್ತರವೇ ಇಲ್ಲತೆ ತಾಂಡ ಕಾರ್ಬಾರ್ ಮಾಡಿಯಂಡಿಪ್ಪಕ ಇಲ್ಲೆಲ್ಲೆಂಗಿ short cut ಇಕ್ಕುಂದ್ ಕಾಬಾಂದ್ ಮುಂಡತಾಚಿ.

ಆಡಿಪಾಡಿ ಕಾರ್ ಆಸ್ತೆರ ಗೇಟ್‌ರೊಳಕೇ ನುಗ್ಗುಚಿ. ವಸಂತ್ ನಾಕ್ ಮೈತ್ರಿನ ನೋಟಂಡು ಆಂಗೇ ಬಂದಿಯೇಂದೆಣ್ಣೆಚಿ. ಛೇ...ಬೋಂಡವಾಣಿ ...ಅವಳ ನೋಟುವ ಕಯ್ಯಲೆ. ಪೋಡಿ ಆಪ ಅವಳಕಾಂಬಕ ರಶ್ಮಿಯಂತೂ ದಂಡ್ ದಿನಕ್ ಬಯ್ಯ ಬಂದ ಪರಿಚಯತ್ ಮಮ್ಮೀ ನಾನ್ ಮಾತ್ರ ಬಪ್ಪಲೆಂದ್ ಅಪ್ಪನ ಗಟ್ಟಿಪುಡ್‌ಚಂಡತ್ ಅಮ್ಮಪ್ಪ ನೀನ್ ಬೋಡುವೇಂಗಿ ಪೋ ನಂಗ ಮಾತ್ರ ಇಲ್ಲಿಯೇ ಇಪ್ಪಂದ್ ಎಣ್ಣಾನಾಂಗ್ ನಿಂಗ ಬೋಂಡ ರಶ್ಮಿ ಬರಡ್‌ಂದ್ ಅವಡ ಒಪ್ಪಿಗ್ಕೂ ಕಾಕತೆ ಎಡ್ತಂಡ್ ಸರಸರಾಂದ್ ಒಳಕ್ ಪೋಯಿರತ್ ರಶ್ಮಿಯಂತೂ ಮಮ್ಮೀ ಅಲ್ಲಿಯೋರ್ ಆಂಟಿರ ಪಕ್ ಮಾತ್ರ ಪೋಕತೆ ನನ್ನ ಎಡ್ತವಕ್ ಅಂದ್ ಬಂತ್‌ಡಾಕ್ಪರ್ ಚುಂಯಿ ಮಾಡತೆ ಪೋಯಿತಿಂಜಕ...ನಾಕ್ ಪೋಡಿ ಆಪ... ನಾ ಬಪ್ಪಲೆಂದ್ ಇಳಿವಕ್ ಪೇಚಾಡ್‌ಚೇಂಗಿಯೂ ಬುಡತೆ ಎಡ್ತಂಡ್ ನಡಂದೇ ನಡಂದತ್ ಬಟ್ಟೆಲ್ ಮಾಮೂಲ್ ನನ್ನನೆ ಪುಚ್ಚಂಗಡ ಚೇಷ್ಟೆರ ಮಧ್ಯೆ ರಶ್ಮಿಕ್ ಸಮಾಧಾನ ಮಾಡಿಯಂಡೇ ವಾರ್ಡ್‌ನ ಕೇಟಂಡ್ ಅಲ್ಲಿಕೆತ್‌ಚಿ. ಪಕ್ ಪೋಯಿರತೆ ಮಮ್ಮೀ ನಾನ್ ಇಲ್ಲಿಯೇ ಇಪ್ಪಿಂದೆಣ್ಣಾನಾಂಡ

ಕೈ ಪುಡ್‌ಚಂಡ್ ಒಳಕ್ಕ ಬಗ್ಗಿ ನೋಟ್‌ಚಿ.

ಓರ್ ನರ್ಸ್ ಮಂಡೆ ಊಕಿತ್ ಜಡೆ ಇಟ್ಟುಂಡಿಂಜತ್ ಪಿಂಞೊಬ್ಬ ಎಂತಾನೋ ಸರಿ ಮಾಡಿಯಂಡಿಜತ್ ವಾಣಿರ ಬಯ್ಯತ್ ಒಳಚಂಡ್ ಮೆಲ್ಲೆ ನೋಟಿಯಂಡಿಂಜ ರಶ್ಮಿನ ಮೈತ್ರಿ ಕಂಡದೇ ಬೆಡ್ಡಾಂಜಿ ಇಳಾಂಜಿತ್ ಬಾ...ಬಾ... ಬಾಪ್ಪೀ... ನಾಡ Sweety ಬಾ...ಂದ್ ಬಾತಿ ತಬ್ಬಿಯಂಡ್ ಮಡಲ್ ಬೆಚ್ಚಂಡ್ ಮುತ್‌ಟ್ಟುಂಡೇ ಇಂಜತ್ ಮಮ್ಮೀ...ಮಮ್ಮೀ...ಂದ್ ಕೈ ನೋಟಿಯಂಡ್ ಕೂತ್‌ಟ್ಟುಂಡಿಂಜ ರಶ್ಮಿಕ್ ನೀಡ ಮಮ್ಮಿ ಅಲ್ಲಿ ಉಂಡಮ್ಮಾ ಇಂಞಿ ಅವಳೇ ನೀಡ ಮಮ್ಮೀ. ನಾನ್ ಬಪ್ಪೀಂದ್ ತಿರಣೆ ಅಲ್ಲಿಕ್ ಬಂದ ವಸಂತ್ ವಾಣಿ... ಕುಂಞಿ ಎಲ್ಲಿಯಾ? ಎನ್ನಂಗ್ ಅವಳ ಅಲ್ಲಿಯೇ ಬುಟ್ಟಿಯೆ. ಆ ಪುಚ್ಚಿ ಎನ್ನೆಂಗಿ ಮಾಡಿರುವಾ...ನರ್ಸ್ ನರ್ಸ್ ನೋಟಿ ಆ ಕುಂಞಿನ ಇಪ್ಪರ ತಾರೀಂದ್ ಬಾಯಿ ಬಡ್‌ಚಂಡ್ ಉಳ್ಳಾನ ಕಂಡಿತ್ ವಾಣಿ ಬಾ....ವಸಂತ್...ಅದ್ ಅವಡ ಕುಂಞಿ ನಾಡದೆನ್ನೆ ಆಪ ಅವ ಪುಚ್ಚಿ ಅಲ್ಲ....ಕುಂಞಿನ ಕಳದಂಡ್ ಅನ್ನನಾಯೆ. ಅಲ್ಲಿ ನೋಟ್ ಎಚ್ಚಚಾಯಿತೆ ಉಂಡ್ ಇಕ್ಕ.

ನೀಡ ಮಂಡೆ ಪಾಳಾಯಿ ಪೋಯಿತ್ ವಾಣಿ ಅದ್ ನಂಗದತ್ತ ಎಡ್‌ತಂಡ ಕುಂಞಿ ನಾಕ್ ಅವಳ ಬುಟ್ಟಿತ್ ಇಪ್ಪಕಯ್ಯುಲೇಂದ್ ಬಾತ್ ಡ್ಯಾಡೀ....ಮಮ್ಮೀ....ಂದ್ ರಶ್ಮಿರ ಕೂತ್‌ಕ್ ಕರ್ ಚುರ್‌ಕ್‌ಂದೆಣ್ಣವನ್ನೆ ಕೇಪಂತ್ ಕಾರ್‌ರೊಳಕ್‌ಕ್ ಅವನ ನೂಕಿತ್ ಅಳಾಪ್‌ಚಿಟ್ಟಿತ್ ವಾಣಿ ಜೋರಾಯ್ತ್ ಮೊರಡುವ ಕೂಡ್‌ಚಿ ವಸಂತ್

ಅಲ್ಲಿಯೇ ಕಾರ್‌ಲಳಾತಂಡೇ ನೋಟಿಯಂಟಿಜ ವಿವೇಕ್ ಓಡಿ ಬಂತ್ ವಾಣಿರ ಕಾಲ್‌ಕ್ ಬುದ್ಧತ್ your are great you are realy greatಂದ್ ಎಣ್ಣಿಯಂಡಿಜವನ ನೇತಿತ್ ಪ್ರಪಂಚತ್ ದಾರೂ ಮಾಡತಾನ

ನಾನ್ ಮಾಡಿತಿಲ್ಲೆ ಕುಂಞಾನ ಕಳಂದಂಡ ದುಃಖ ನಾಕ್ಚಾಯಿತೆ ಗೊತ್ತುಂಡ್.
ನಲ್ಲ ಅನುಭವ ನಾಕಾಯ್.

ಅವ್ವನಿಂಜಿತೂ "ಅನಾಥಂ"ದ್ ಪೆದ ಎಡ್ತಂಡ್ ಬೋಳಿಯುವದ್ ನಾಕಿಷ್ಟೆ
ಇಲ್ಲೆ ನಂಗ ಎನ್ನನೇ ಚಾಕ್ಚೇಂಗಿಯೂ ನೇರಾನ ಅವ್ವಂಡ ಪ್ರೀತಿ ಕ್ಕಟ್ಟುಲೆ
ಸಮಾಜ ಅನಾಥಂದೇ ಗುರುತ್ಚಿಟ್ಟುರುವಾ ಆನಗುಂಡ್ ನಾನ್ ಈ ಮನಸ್ಸು
ಮಾಡ್ನ ನಂಗಕ್ ಚಾಕುವಕ್ ಬೋರೆ ಏದೇ ಕುಂಞಿಯೂ ಆಕು ನಂಕ್
ಇಷ್ಟೆ ಬಪ್ಪಕ ರಶ್ಮಿನ ನೋಟಿಯಂಡ್ ಪೋಕ. ಮೈತ್ರಿ ಇಂಞು ಪುಚ್ಚಿ ಆಪುಲೆ
ಇಂಞೋರ್ ಕುಂಞಿ ಆಚೇಂಗಿಯೂ ರಶ್ಮಿಕ್ ಅವ್ವ ಮೈತ್ರಿಯೇ ಅಲ್ಲ...!
ನಿಂಕ್ ಇಷ್ಟೆ ಉಂಡೇಂಗಿ ಎಕ್ಕೇಂಗಿ ಅವಳ ನಂಗಡಲ್ಲಿ ಚೆನ್ನದಿನ ಇಪ್ಪಕ್ ಆಯಿರಿ
ಮೈತ್ರಿ ಚಾಯಾನ ಪಿಂಞ ರಶ್ಮಿ ಒಗ್ಗಿಯವಾ ಅವ್ವನ ಒಗ್ಗುವದ್ ಕುಂಞಿಕ್ಕ್
ಕಷ್ಟೆ ಅಲ್ಲ. ಅದ್ ನೈಸರ್ಗಿಕ ಅಕ್ಕ ತನ್ನಾಲೇ ನಂಗಳ ಮರಪ್ಪಾ.....ನಂಗಕ್ಕ್
ಚೆನ್ನದಿನ ಕಷ್ಟವೇ ಆಪ. ಆಚೇಂಗಿ ಅವಡ ಸುಖತ್ ನಂಗಡ ಸ್ವಾರ್ಥ
ಇಪ್ಪಕ್ಕಾಗಲ್ಲಂದ್ ವಿವೇಕ್ಕ್ ಓರ್ಚೆರಿಯ ಭಾಷಣವೇ ಬಿಗದತ್ ವಾಣಿ.

ನಂಗ ನಲ್ಲ ಸ್ನೇಹಿತಳಂಗಾಯಿತಿರನಾಂದ್. ವಸಂತಂಗ್ switch Keyನ
ಕೊಡ್ತಿತ್ ಇಕ್ಕ ನೀನೇ ಡ್ರೈವ್ ಮಾಡ್ಂದ್ ಚೋತವಳನ್ನೆ ಬಯ್ಯಲ್
ಸೀಟಲ್ ತಾಂಗಿ ಅಳತತ್ ವಾಣಿ ಕಾರ್ ಕುಟ್ಟತ್ತರ ರೋಡ್ ಪುಡ್ಚತ್.

- ಶುಭಂ -

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ, ಮಡಿಕೇರಿ

ಆಡಳಿತ ಮಂಡಳಿ



ಅಧ್ಯಕ್ಷ

ಶ್ರೀ ಚಿರಿಯಪಂಡ ಎಂ. ರಾಜಾ ನಂಜಪ್ಪ

ರಿಜಿಸ್ಟ್ರಾರ್

ಶ್ರೀ ಕೆ. ದಾಮೋದರ

ಸದಸ್ಯಂಗ

ಶ್ರೀ ಬಿದ್ದಾಟಂಡ ಎಸ್. ತಮ್ಮಯ್ಯ

ಶ್ರೀ ಮುಕ್ಕಾಟಿರ ಎ. ವಸಂತ

ಶ್ರೀ ತೆನ್ನೀರ ರಮೇಶ್ ಪೊನ್ನಪ್ಪ

ಶ್ರೀ ಚಕ್ಕೇರ ಎ. ತ್ಯಾಗರಾಜ್

ಮುಕ್ಕಾಟಿರ ಡಾ. ನೀಲಮ್ಮ ಮುತ್ತಣ್ಣ

ಶ್ರೀಮತಿ ತಾತಂಡ ಪ್ರಭಾ ನಾಣಯ್ಯ

ಶ್ರೀ ಅಮ್ಮಣಂಡ ಎಂ. ಅಣ್ಣಯ್ಯ

ಶ್ರೀ ಹೆಚ್. ಮುದ್ದು ಮೈತಾಡಿ

ಶ್ರೀ ಪಾಲಂದಿರ ಪಿ. ದೇವಯ್ಯ

ಶ್ರೀಮತಿ ಉಳ್ಳಿಯಡ ಡಾಟಿ ಪೂವಯ್ಯ

ಶ್ರೀ ಐತಿಚಂಡ ರಮೇಶ್ ಉತ್ತಪ್ಪ

ಶ್ರೀ ಪುತ್ತಾಮನೆ ಗಣೇಶ್ ಮುದ್ದಮ್ಮಯ್ಯ

ಶ್ರೀ ಪೊಕ್ಕಳಿಚಂಡ ಬಿ. ಪೂಣಚ್ಚ

ಎಳ್ಳೊ ಕರ್ತಿಯ ಪರಿಚಯ



ಕೋಕೇರಿ ಗ್ರಾಮತ್ತರ ಶ್ರೀ ಮಚ್ಚಂಡ ಸುಬ್ಬಯ್ಯ ಪಿಂಞ ಮಾಯವ್ವ (ತಾಮನೆ ಚೀಯಕಪೂವಂಡ) ದಂಪತಿಯಡ ಕಡೇ ಮೋವ. ಚೆಯ್ಯಂಡಾಣೆ, ಮೈಸೂರ್ಲೊ ವಿದ್ಯಾಭ್ಯಾಸ. ಉಪಾದ್ರಿಯಾಯ್ತ 36 ಕಾಲ ಸೇವೆ ಮಾಡಿತ್ ಸರಕಾರಿ ಜ್ಯೂನಿಯರ್ ಕಾಲೇಜ್ ಪೊನ್ನಂಪೇಟೆಂಜಿ ನಿವೃತ್ತಿಯಾಯ್ತ ಪೊನ್ನಂಪೇಟೆಲ್ ನೆಲೆಸಿತ್. ಪೊಲ್ಲಪಣಿ, ತಿಂಡಿ, ಸ್ವತಃ ಕವನ ಎಳ್ಳೊದಿತ್ ಪಾಡುವೊ, ಕೊಡವ, ಕನ್ನಡ ವಾರಪತ್ರಿಕೆಲ್ ಲೇಖನ, ತಮಾಷಿ ಕಥೆ ಎಳ್ಳೊದುವೊ ಇಯಂಡ ಹವ್ಯಾಸ. ನಾಲೆಬದ್ ಕೊಂದೆಣ್ಣುವ ಚೆರ್ಕಾದಂಬರಿ ಎಳ್ಳೊ ಕಾರಡ್ ಕ್ಕೂಟಿತ್ ಬೊಳಿಕ್ಕಂಡಿತ್.

ಬಲ್ಯಮಾಡ ಸಿ. ಗಣಪತಿನ ಮಂಗಲಾನ ಇವು ಇಕ್ಕ ಸಮಾಜ ಸೇವೆ ಮಾಡ್ಯಂಡುಂಡ್. ಪೊನ್ನಂಪೇಟೆ ಕೊಡವ ಸಮಾಜತ್ ಗೌರವ ಕಾರ್ಯದರ್ಶಿ, ಅಪ್ಪಚ್ಚಿಕವಿ ಸ್ಕೂಲಾರ ನಿರ್ದೇಶಕಿ, ಪಿಂಞ ಪೊನ್ನಂಪೇಟೆ ಟೌನ್ ಬ್ಯಾಂಕ್‌ರ ನಿರ್ದೇಶಕಿಯೂ ಆಯಿತುಂಡ್.

ಇಯಂಡ ವಿಳಾಸ:

ಶ್ರೀಮತಿ ಬಲ್ಯಮಾಡ ದೇವಕಿ ಗಣಪತಿ

"ದೀಪ್ತಿ ನಿವಾಸ"

ಯಂ.ಟಿ. ರಸ್ತೆ, ಪೊನ್ನಂಪೇಟೆ

ದೂರವಾಣಿ : 249098